

ओं नमः परमात्मने, श्री महागणपतये नमः,
श्री गुरुभ्यो नमः
हरिः ओं ॥
--

कृष्ण यजुर्वेदीय तैत्तिरीय ब्राह्मणम्

प्रथमाष्टके प्रपाठकः 5 to 8

Table of Contents

1 कृष्ण यजुर्वेदीय तैत्तिरीय ब्राह्मणे प्रथमाष्टकं.....	5
1.5 प्रथमाष्टके पञ्चमः प्रपाठकः – नक्षत्रेष्टिकाण्डे	5
1.5.1 अनुवाकं 1– नक्षत्रेष्टिकामन्त्राः, विकृतिरूपचयनगताः.....	5
1.5.2 अनुवाकं 2 – कर्मानुष्ठानार्हः नक्षत्ररूपः पुण्यकालः.....	7
1.5.3 अनुवाकं 3 – कर्मानुष्ठानार्हः दिवसभागरूपः हेयोपादेयकाल विभागः	11
1.5.4 अनुवाकं 4 – सोमशेषभूता पात्रस्तुतिः.(आध्वरब्राह्मणशेषः)...	13
1.5.5 अनुवाकं 5 – चातुर्मास्यशेषा वपनमन्त्राः, (राजसूयब्राह्मणम्)..	14
1.5.6 अनुवाकं 6 – चातुर्मास्यशेषा वपनविधिः (राजसूयब्राह्मणम्)..	17
1.5.7 अनुवाकं 7 – अग्निचयनशेषा इष्टकोपधानमन्त्राः, तत्र संतत्याख्येष्टिकामन्त्राः	20
1.5.8 अनुवाकं 8 – अग्निचयनशेषा थर्वशिरोऽभिधानानामिष्टिकानां मन्त्राः.....	20
1.5.9 अनुवाकं 9 – सोमशेषभूता इष्टयः. (आध्वरब्राह्मणम्).....	21
1.5.10 अनुवाकं 10 – त्रिवृदादिस्तोमरूपाणि सोमङ्गानि. (आध्वरब्राह्मणम्).....	26
1.5.11 अनुवाकं 11 – सवनीयपशुपुरोडाशाः (आध्वरब्राह्मणम्)	29
1.5.12 अनुवाकं 12 – सप्तछन्दांसि प्रपञ्च्यन्ते (आध्वरब्राह्मणम्).....	31

1.6 प्रथमाष्टके षष्ठः प्रपाठकः – राजसूयानुब्राह्मणं	36
1.6.1 अनुवाकं 1 – अनुमत्याद्या इष्टयः.....	36
1.6.2 अनुवाकं 2– चातुर्मास्ये वैश्वदेवहवींषि.....	40
1.6.3 अनुवाकं 3 – वैश्वदेवपर्गतानि विश्वेषाङ्गानि	43
1.6.4 अनुवाकं 4 – वरुणप्रघासाः	47
1.6.5 अनुवाकं 5 – तच्छेषः.....	49
1.6.6 अनुवाकं 6 – साकमेधाः	52
1.6.7 अनुवाकं 7 – तच्छेषः.....	54
1.6.8 अनुवाकं 8 – पितृयज्ञः	57
1.6.9 अनुवाकं 9 – तच्छेषः.....	60
1.6.10 अनुवाकं 10 – त्र्यम्बकहवींषि.....	64
1.7 प्रथमाष्टके सप्तमः प्रपाठकः – राजसूयानुब्राह्मणं.....	69
1.7.1 अनुवाकं 1 – शुनासीरीयेन्द्रतुरीयपञ्चावत्तीयापामार्गहोमाः.....	69
1.7.2 अनुवाकं 2 – देविकावहवींषि.....	72
1.7.3 अनुवाकं 3 – रत्निनां हवींषि.....	75
1.7.4 अनुवाकं 4 – देवसुवां हवींषि.....	78
1.7.5 अनुवाकं 5 – अभिषेकार्थमपांग्रहग्रहणम्.....	80
1.7.6 अनुवाकं 6 – अभिषेकार्थजलसंस्कारः.....	82

1.7.7 अनुवाकं 7 – दिग्व्यास्थापनम्.....	85
1.7.8 अनुवाकं 8 – अभिषेकः.....	88
1.7.9 अनुवाकं 9 – स्थारोहणम्. विजयः.....	91
1.7.10 अनुवाकं 10 – आसने समुपवेशः सर्वैस्सेव्यत्वं च	94
1.8 प्रथमाष्टके अष्टमः प्रपाठकः – राजसूयानुब्राह्मणं.....	99
1.8.1 अनुवाकं 1 – संस्पृपां हवींषि दश	99
1.8.2 अनुवाकं 2 – दशपेयः	100
1.8.3 अनुवाकं 3 – दिशामवेष्टयः, पशुबन्धः, सात्यदूतहवींषि च...	102
1.8.4 अनुवाकं 4 – प्रयुजां हवींषि द्वादश	104
1.8.5 अनुवाकं 5 – सौत्रामणिः, पशवः, हवींषि च.....	105
1.8.6 अनुवाकं 6 – सौत्रामणिः, पशवः, हवींषि च.....	107
1.8.7 अनुवाकं 7 – राजसूयस्याग्रे कर्तव्यं पवित्राख्यमग्निष्टोममहः	110
1.8.8 अनुवाकं 8 – अभिषेचनीये साममन्त्रविशेषः	111
1.8.9 अनुवाकं 9 – अभिषेचनीयविषययो रुक्मयोः स्तुतिः.....	113
1.8.10 अनुवाकं 10 – व्युष्टिद्विरात्रं राजसूयान्ते कर्तव्यम्	114

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

1 कृष्ण यजुर्वेदीय तैत्तिरीय ब्राह्मणे प्रथमाष्टकं

1.5 प्रथमाष्टके पञ्चमः प्रपाठकः – नक्षत्रेष्टिकाण्डे

1.5.1 अनुवाकं 1– नक्षत्रेष्टिकामन्त्राः, विकृतिरूपचयनगताः

T.B.1.5.1.1

अ॒ग्नेः कृ॒त्तिकाः । शु॒क्रं पर॒स्ता-ज्ज्योति॑-रव॒स्तात् । प्र॒जाप॑ते
रोहि॑णी । आपः॑ पर॒स्तादोष॑धयो ऽव॒स्तात् । सोम॑स्ये॒न्वका॑ वि॒त॒तानि॑ ।
पर॒स्ताद्व॑यन्तो ऽव॒स्तात् । रु॒द्रस्य॑ बा॒हू । मृ॒गय॑वः पर॒स्ताद्वि॑क्षारो ऽव॒स्तात् ।
अदि॒त्यै पुन॑र्वसू । वातः॑ पर॒स्तादा॒र्द्र-म॑व॒स्तात् । 1 (10)

T.B.1.5.1.2

बृ॒हस्प॑तेस्ति॒ष्यः । जु॒ह्वतः॑ पर॒स्ताद्व॑यज॒माना॑ अव॒स्तात् ।
सर्पा॑णा-माश्रे॒षाः । अ॒भ्याग॑च्छन्तः पर॒स्ताद॒भ्यान्त्य॑न्तो ऽव॒स्तात् ।
पि॒त॒ृणां॑ म॒घाः । रु॒दन्तः॑ पर॒स्ताद॒पभ्र॑श्चो ऽव॒स्तात् ।
अ॒र्य॒म्णः पूर्वे॑ फल्गु॒नी । जा॒या पर॒स्ताद्व॑ष॒भो ऽव॒स्तात् । भ॒गस्यो॑त्तरे ।

व॒हत॑वः॒ पर॑स्ता॒द्वह॑माना॒ अव॑स्तात् । 2 (10)

T.B.1.5.1.3

दे॒वस्य॑ स॒वितु॑र् ह॒स्तः । प्र॒सवः॑ पर॒स्ताथ्-स॑निर॒वस्तात् ।

इन्द्र॑स्य चि॒त्रा । ऋ॒तं पर॑स्ताथ्-स॒त्य-म॑वस्तात् ।

वा॒योर्-नि॒ष्ट्या व्र॑ततिः । पर॒स्ता-द॑सि॒द्धि-र॑वस्तात् ।

इन्द्रा॑ग्नियो॒र् वि॒शाखे॑ । यु॒गानि॑ पर॒स्तात्-कृ॑षमा॒णा अव॑स्तात् ।

मि॒त्रस्या॑-नू॒राधाः । अ॒भ्यारो॑हत्-पर॒स्ता-द॑भ्या॒रूढ-म॑वस्तात् । 3 (10)

T.B.1.5.1.4

इन्द्र॑स्य रो॒हिणी॑ । शृ॒णत्-पर॑स्तात्-प्र॒तिशृ॑ण-द॒वस्तात् ।

नि॒र्ऋ॑त्यै-मू॒लव॑र्ह॒णी । प्र॒तिभ॑ञ्जन्तः पर॒स्तात्-प्र॒तिशृ॑णन्तो॒ऽवस्तात् ।

अपां॑ पूर्वा॑ अषा॒ढाः । वर्चः॑ पर॒स्ताथ्-स॑मि॒ति-र॑वस्तात् ।

विश्वे॑षां दे॒वाना॑-मु॒त्तराः॑ । अ॒भिज॑यत्-पर॒स्ता-द॑भि॒जित॑-म॒वस्तात् ।

वि॒ष्णोः श्रो॑णा पृ॒च्छमा॑नाः । पर॒स्तात्-प॒न्था अव॑स्तात् । 4 (10)

T.B.1.5.1.5

वसू॑ना॒ञ् श्र॑वि॒ष्ठाः । भू॒तं पर॑स्ताद्-भू॒तिर॑वस्तात् ।

इन्द्र॑स्य-श॒तभि॑षक् । वि॒श्वव्य॑चाः पर॒स्ताद्-वि॒श्वक्षि॑ति-र॒वस्तात् ।

अजस्यैकपदः पूर्वे प्रोष्ठपदाः । वैश्वानरं परस्ताद्-वैश्वावसव-
मवस्तात् । अहेर्बुध्निय-स्योत्तरे । अभिषिञ्चन्तः परस्ता-
दभिषुण्वन्तोऽवस्तात् । पूष्णो रेवती । गावः परस्ताद्-वथ्सा
अवस्तात् () । अश्विनोरश्वयुजौ । ग्रामः परस्तात्सेना ऽवस्तात् ।
यमस्यापभरणीः । अपकर्षन्तः परस्ता-दपवहन्तोऽवस्तात् ।
“पूर्णा-पश्चाद्{1}”, “यत्ते देवा अदधुः{2}” । 5 (15)

(आर्द्रमवस्ताद् – वहमाना अवस्ता – दध्यारूढमवस्तात् –
पन्था अवस्ताद् – वथ्सा अवस्तात् पञ्च च) (A1)

1.5.2 अनुवाकं 2 – कर्मानुष्ठानार्हः नक्षत्ररूपः पुण्यकालः

T.B.1.5.2.1

यत् पुण्यं नक्षत्रम् । तद्-बट् कुर्वीतोपव्युषम् । यदा वै सूर्य उदेति ।
अथ नक्षत्रं नैति । यावति तत्र सूर्यो गच्छेत् । यत्र जघन्यं पश्येत् ।
तावति कुर्वीत यत् कारी स्यात् । पुण्याह एव कुरुते । एव ह वै
यज्ञेषु च शतद्युम्नं च माथ्स्यो निरवसाययां चकार । 6 (9)

T.B.1.5.2.2

यो वै नक्षत्रियं प्रजापतिं वेद । उभयोरेनं लोकयोर्विदुः ।
हस्त एवास्य हस्तः । चित्रा शिरः । निष्च्या हृदयम् ।
ऊरू विशाखे । प्रतिष्ठा ऽनूराधाः । एष वै नक्षत्रियः प्रजापतिः ।
य एवं वेद । उभयोरेनं लोकयोर्विदुः । 7 (10)

T.B.1.5.2.3

अस्मिञ्श्चा-मुष्मिञ्श्च । यां कामयेत दुहितरं प्रिया स्यादिति ।
तां निष्च्यायां दद्यात् । प्रियैव भवति । नैव तु पुनरागच्छति ।
अभिजिन्नाम नक्षत्रम् । उपरिष्ठा-दषाढानाम् ।
अवस्ताच्छ्रोणायै । देवासुराः सम्यक्ता आसन् ।
ते देवास्तस्मिन्-नक्षत्रेऽभ्यजयन् । 8 (10)

T.B.1.5.2.4

यदभ्यजयन् । तदभिजितोऽभिजित्वम् । यं कामयेता-नपजय्यं
जयेदिति । तमेतस्मिन्-नक्षत्रे यातयेत् । अनपजय्यमेव जयति ।
पापपराजितमिव तु । प्रजापतिः पशूनसृजत ।
ते नक्षत्रं नक्षत्र-मुपातिष्ठन्त । ते समावन्त एवाभवन् ।

ते रेवती-मुपातिष्ठन्त । 9 (10)

T.B.1.5.2.5

ते रेवत्यां प्राभवन् । तस्माद्-रेवत्यां पशूनां कुर्वीत ।
यत् किंचार्वाचीनं सोमात् । प्रैव भवन्ति । सलिलं वा इदमन्तरासीत् ।
यदतरन् । तत् तारकाणां तारकत्वम् । यो वा इह यजते ।
अमुं सलोकं नक्षते । तन्नक्षत्राणां नक्षत्रत्वम् । 10 (10)

T.B.1.5.2.6

देवगृहा वै नक्षत्राणि । य एवं वेद । गृह्येव भवति । यानि वा इमानि
पृथिव्याश्चित्राणि । तानि नक्षत्राणि । तस्मा-दशलीलनाम-श्चित्रे ।
नावस्येन्न यजेत । यथा पापाहे कुरुते । तादृगेव तत् ।

देवनक्षत्राणि वा अन्यानि । 11 (10)

T.B.1.5.2.7

यमनक्षत्राण्यन्यानि । कृत्तिकाः प्रथमम् । विशाखे उत्तमम् ।
तानि देवनक्षत्राणि । अनूराधाः प्रथमम् । अपभरणी-रुत्तमम् ।
तानि यमनक्षत्राणि । यानि देवनक्षत्राणि । तानि दक्षिणेन परियन्ति ।
यानि यमनक्षत्राणि । 12 (10)

T.B.1.5.2.8

तान्यु॑त्तरेण॑ । अन्वे॑षाम॒राथ्स्मेति॑ । तद॑नूरा॒धाः । ज्येष्ठ॑मेषा-मवधिष्मेति॑ ।
तज्ज्येष्ठ॑घ्नी । मूल॑मेषामवृक्षा॒मेति॑ । तन्-मूल॑वर्हणी । यन्ना॑सहन्त ।
तद॑षाढाः । यद॑श्लोणत् । 13 (10)

T.B.1.5.2.9

तच्छ्रो॑णा । यद॑शृणोत् । तच्छ्र॑विष्ठाः । यच्छ॑त-मभिषज्यन् ।
तच्छ॑तभिषक् । प्रोष्ठ॑पदेषूदयच्छन्त । रेव॑त्यामरवन्त ।
अश्व॑युजो॒रयु॑ञ्जत । अप॑भरणीष्व पाव॑हन् । तानि॑ वा ए॒तानि॑
यम॑नक्षत्राणि () । यान्ये॑व दे॒वनक्ष॑त्राणि । तेषु॑ कुर्वीत॑ यत्कारी
स्यात् । पु॒ण्याह॑ ए॒व कुरु॑ते । 14 (13)
(च॒का - रै॒वं वे॒दोभयो॑ रे॒नं लो॒कयोर्वि॑दु - रज॑यन् - रे॒वतीमु॒पाति॑ष्ठन्त
- नक्ष॑त्रा॒त्व - म॒न्यानि॑ - या॒नि यम॑नक्षत्रा - ण्य॑श्लोणद् - यम॑नक्ष
त्राणि॑ त्रीणि॑ च) (A2)

1.5.3 अनुवाकं 3 – कर्मानुष्ठानार्हः दिवसभागरूपः हेयोपादेयकाल विभागः

T.B.1.5.3.1

दे॒वस्य॑ स॒वितुः॑ प्रा॒तः प्र॑स॒वः प्रा॑णः । वरु॑णस्य सा॒यमा॑स॒वोऽपानः॑ ।
यत् प्र॒ती॒चीनं॑ प्रा॒तस्त॑नात् । प्रा॒चीनं॑ संग॒वात् । ततो॑ दे॒वा अ॑ग्नि॒ष्टोमं॑
नि॒रमि॑मत । तत्-तदा॑त्तवी॒र्यं निर्मा॑र्गः । मि॒त्रस्य॑ संग॒वः ।
तत्-पु॑ण्यं ते॒जस्व्य॑हः । तस्मा॑त्तर्हि प॒शवः॑ समा॒यन्ति॑ ।
यत् प्र॒ती॒चीनं॑ संग॒वात् । 15 (10)

T.B.1.5.3.2

प्रा॒चीनं॑ म॒ध्यन्दि॑नात् । ततो॑ दे॒वा उक्थ्यं॑ नि॒रमि॑मत ।
तत्-तदा॑त्तवी॒र्यं निर्मा॑र्गः । बृ॒हस्प॑तेर् म॒ध्यन्दि॑नः ।
तत्-पु॑ण्यं ते॒जस्व्य॑हः । तस्मा॑त्तर्हि ते॒क्षिण॑ष्ठं तप॒ति ।
यत्-प्र॒ती॒चीनं॑ म॒ध्यन्दि॑नात् । प्रा॒चीनं॑-मप॒राह्णात् ।
ततो॑ दे॒वाः षोड॑शिनं नि॒रमि॑मत । तत्तदा॑त्तवी॒र्यं निर्मा॑र्गः । 16 (10)

T.B.1.5.3.3

भ॒गस्या॒परा॒ह्णः । तत्-पु॒ण्यं ते॒जस्व्य॑हः । तस्मा॑दपरा॒ह्णे कु॒मार्यो॑
 भ॒गमि॑च्छमा॒ना-श्चर॑न्ति । यत्-प्र॒तीची॑नमपरा॒ह्णात् ।
 प्रा॒चीन॑ सा॒यात् । ततो॑ दे॒वा अ॒तिरा॑त्रं निरमि॒मत । तत्तदा॑त्तवी॒र्यं निर्मा॑र्गः ।
 वरु॑णस्य सा॒यम् । तत्-पु॒ण्यं ते॒जस्व्य॑हः ।
 तस्मा॑त्तर्हि ना॒नृतं॑ वदे॒त् । 17 (10)

T.B.1.5.3.4

ब्रा॒ह्मणो॑ वा अ॒ष्टावि॑शो नक्ष॒त्राणा॑म् । समा॒नस्या॑हः पञ्च
 पु॒ण्यानि॑ नक्ष॒त्राणि॑ । च॒त्वार्य॑श्ली॒लानि॑ । तानि॑ नव ।
 यच्च॑ पर॒स्तान्नक्ष॑त्राणां यच्चाव॒स्तात् । तान्ये॑कादश । ब्रा॒ह्मणो॑ द्वा॒दशः ।
 य एवं॑ वि॒द्वान्त् स॑व॒त्सरं॑ व्र॒तं चर॑ति । स॑व॒त्सरे॑णैवा॒स्य व्र॑तं
 गु॒प्तं भव॑ति । समा॒नस्या॑हः पञ्च पु॒ण्यानि॑ नक्ष॒त्राणि॑ () ।
 च॒त्वार्य॑श्ली॒लानि॑ । तानि॑ नव । आ॒ग्नेयी॑ रा॒त्रिः । ऐ॒न्द्रम॑हः ।
 तान्ये॑कादश । आ॒दित्यो॑ द्वा॒दशः ।
 य एवं॑ वि॒द्वान्त् स॑व॒त्सरं॑ व्र॒तं चर॑ति ।

सम्॑व॒त्स॒रेणै॒वास्य॑ व्र॒तं गु॒प्तं भ॑वति । 18 (18)

(संग॑वा॒त् – षोड॑शि॒नं नि॒र॒मि॒त॒ तत्तदा॑त्त॒वीर्यं॑ नि॒र्मा॒गो – वदे॑द् दृ॒
भव॑ति॒ स॒मा॒न॒स्या॒हः पञ्च॑ पु॒ण्या॒नि नक्ष॑त्रा॒ण्यष्टौ॑ च) (A3)

1.5.4 अनुवाकं 4 – सोमशेषभूता पात्रस्तुतिः.(आध्वरब्राह्मणशेषः)

T.B.1.5.4.1

ब्र॒ह्म॒वा॒दि॒नो॑ वद॒न्ति । क॒ति पा॒त्रा॒णि य॒ज्ञं व॑ह॒न्तीति॑ ।

त्रयो॑द॒शेति॑ ब्रूयात् । स यद्ब्रू॒यात् । क॒स्तानि॑ नि॒र॒मि॒मी॒तेति॑ ।

प्र॒जा॒प॒ति॒रिति॑ ब्रूयात् । स यद्ब्रू॒यात् । कु॒त॒स्तानि॑ नि॒र॒मि॒मी॒तेति॑ ।

आ॒त्म॒न इति॑ । प्रा॒णा॒पा॒ना॒भ्या॑-मे॒वोपा॑-श्च॒न्त॒र्या॒मौ नि॒र॒मि॒मी॒त । 19 (10)

T.B.1.5.4.2

व्या॒ना॒दु॒पा॒ंशु॑ स॒वन॑म् । वा॒च ऐ॒न्द्र॒वा॒य॒वम् । दक्ष॑क्र॒तु॒भ्यां॑ मै॒त्रा॒व॒रु॒णम् ।

श्रो॒त्रा॒दा॒श्वि॒नम् । चक्षु॑षः शु॒क्रा म॒न्थि॒नौ । आ॒त्म॒न आ॒ग्र॒य॒णम् ।

अ॒ङ्गे॒भ्य उ॒क्थ्य॑म् । आ॒यु॒षो ध्रु॒वम् । प्र॒ति॒ष्ठा॒या ऋ॒तु॒पा॒त्रे । य॒ज्ञं वा॑व

तं प्र॒जा॒प॒तिर् नि॒र॒मि॒मी॒त () । स नि॒र्मि॒तो ना॒ध्रि॒य॒त॒ सम॑व्नीयत ।

स ए॒तान् प्र॒जा॒प॒ति-र॒पि॒वा॒पा॒न-प॑श्यत् । तान्नि॒र॒व॒पत् ।

तैर्वै स य॒ज्ञम॑प्यवपत् । यद॑पिवा॒पा भ॑वन्ति ।

य॒ज्ञस्य॑ धृ॒त्या अस॑मँ॒ल्लया॑य । 20 (16)

(उपा॑ञ्च॒न्तर्या॑मौ निर॑मिमीता- मिमीत॑ षट् च) (A4)

1.5.5 अनुवाकं 5 – चातु॑र्मास्यशेषा वपनमन्त्राः, (राजसूयब्राह्मणम्)

T.B.1.5.5.1

ऋ॒तमे॑व पर॒मेष्ठि॑ । ऋ॒तं ना॒त्येति॑ किं च॒न । ऋ॒ते स॑मु॒द्र आ॑हितः ।

ऋ॒ते भु॑मि॒रिय॑ञ् श्रि॒ता । अ॒ग्नि॒स्तिग्मे॑न शोचि॒षा ।

तप॑ आ॒क्रान्त॑-मु॒ष्णिहा॑ । शि॒रस्त॑पस्या॒हितम् । वै॒श्वान॑रस्य तेज॒सा ।

ऋ॒तेना॑स्य नि॒वर्तये॑ । स॒त्येन॑ परि॒वर्तये॑ । 21 (10)

T.B.1.5.5.2

तप॑साऽस्यानु॒वर्तये॑ । शि॒वेना॑स्योप॒वर्तये॑ । श॒ग्मेना॑स्या-भि॒वर्तये॑ ।

तदृ॒तं तथ् स॒त्यम् । तद्-व्र॑तं तच्छ॒क्रेयम् । तेन॑ श॒क्रेयं॑ तेन॑

रा॒ध्यास॑म् । यद्-घ॒र्मः पर्य॑वर्तयत् । अ॒न्तान् पृ॑थि॒व्या दि॒वः ।

अ॒ग्निरी॑शान॒ ओज॑सा । वरु॒णो धी॒तिभिः॑ सह । 22 (10)

T.B.1.5.5.3

इन्द्रो॑ मरु॒द्भिः॑ सखि॒भिः॑ सह॑ । अ॒ग्नि॒स्ति॒ग्मेन॑ शोचिषा॑ ॥
 तप॑ आक्रान्त॑-मु॒ष्णिहा॑ ॥ शिर॒स्तप॑स्याहि॒तम् । वै॒श्वान॑रस्य तेज॒सा ।
 ऋ॒तेना॑स्य निव॒र्तये॑ । सत्ये॒न परि॑व॒र्तये॑ । तप॑सा ऽस्यानुव॒र्तये॑ ।
 शिवे॑नास्योपव॒र्तये॑ । शग्मे॑नास्याभि॒वर्तये॑ । 23 (10)

T.B.1.5.5.4

तदृ॒तं तथ् स॒त्यम् । तद्-व्र॑तं तच्छ॒केयम् । तेन॑ श॒केयं॑ तेन॑ रा॒ध्यासम् ।
 यो अ॒स्याः पृ॒थिव्या॑स्त्वचि॑ । निव॒र्तय॑त्योष॒धीः । अ॒ग्निरी॑शान॒ ओज॑सा ।
 वरु॑णो धी॒तिभिः॑ सह॑ । इन्द्रो॑ मरु॒द्भिः॑ सखि॒भिः॑ सह॑ ।
 अ॒ग्नि॒स्ति॒ग्मेन॑ शोचिषा॑ ॥ तप॑ आक्रान्त॑-मु॒ष्णिहा॑ ॥ 24 (10)

T.B.1.5.5.5

शिर॒स्तप॑स्याहि॒तम् । वै॒श्वान॑रस्य तेज॒सा । ऋ॒तेना॑स्य निव॒र्तये॑ ।
 सत्ये॒न परि॑व॒र्तये॑ । तप॑सा ऽस्यानुव॒र्तये॑ । शिवे॑नास्योपव॒र्तये॑ ।
 शग्मे॑नास्या-भि॒वर्तये॑ । तदृ॒तं तथ् स॒त्यम् । तद्-व्र॑तं तच्छ॒केयम् ।
 तेन॑ श॒केयं॑ तेन॑ रा॒ध्यासम् । 25 (10)

T.B.1.5.5.6

ए॒कं मा॒स-मु॒दसृ॑जत् । पर॒मेष्ठी॑ प्र॒जाभ्यः॑ । तेना॑भ्यो॒ मह॑ आव॒हत् ।
 अ॒मृतं॑ म॒र्त्याभ्यः॑ । प्र॒जाम॑नु प्र॒जाय॑से । तदु॑ ते म॒र्त्यामृ॑तम् ।
 येन॑ मा॒सा अ॒र्धमा॑साः । ऋ॒तवः॑ परि॒वत्स॑राः । येन॑ ते ते प्र॒जाप॑ते ।
 ई॒जान॑स्य न्यव॒र्तय॑न् । 26 (10)

T.B.1.5.5.7

तेना॑हम॒स्य ब्र॑ह्मणा । नि॒वर्त॑यामि जी॒वसे॑ । अ॒ग्निस्ति॒ग्मेन॑ शोचिषा॑ ।
 तप॑ आ॒क्रान्त॑-मु॒ष्णिहा॑ । शि॒रस्त॑पस्याहि॒तम् । वैश्वा॑नर॒स्य तेज॑सा ।
 ऋ॒तेना॑स्य नि॒वर्त॑ये । स॒त्येन॑ परि॒वर्त॑ये । तप॑सा ऽस्यानु॒वर्त॑ये ।
 शि॒वेना॑स्योप॒वर्त॑ये () । श॒ग्मेना॑स्याभि॒वर्त॑ये । तदृ॒तं तथ्-स॒त्यम् ।
 तद्-व्र॑तं तच्छ॒केय॑म् । तेन॑ श॒केयं॑ तेन॑ रा॒ध्यास॑म् । 27 (14)

(परि॑वर्तये - स॒हा - भि॑वर्तय - उ॒ष्णिहा॑ - रा॒ध्यासं॑ - न्यव॑र्तयन् -
 नुप॑वर्तये च॒त्वारि॑ च) (A5)

1.5.6 अनुवाकं 6 – चातुर्मास्यशेषा वपनविधिः (राजसूयब्राह्मणम्)

T.B.1.5.6.1

दे॒वा वै यद्-यज्ञे॑ ऽकुर्व॑त । तद॑सुरा॑ अकुर्व॑त ।
 ते॒ऽसुरा॑ ऊ॒र्ध्वं पृ॑ष्ठेभ्यो॑ नाप॑श्यन् । ते केशा॑न॒ग्रेऽव॑पन्त ।
 अथ॑ श्मश्रू॑णि । अथो॑पपक्षौ । तत॑स्ते॒ऽवाञ्च॑ आयन् । परा॑ऽभवन् ।
 यस्यै॒वं व॑पन्ति । अवा॑डेति । 28 (10)

T.B.1.5.6.2

अथो॑ परै॒व भ॑वति । अथ॑ दे॒वा ऊ॒र्ध्वं पृ॑ष्ठेभ्यो॑ऽप॑श्यन् ।
 त उप॑पक्षा॒वग्रे॑ऽव॑पन्त । अथ॑ श्मश्रू॑णि । अथ॑ केशा॑न् । तत॑स्ते॒ऽभव॑न् ।
 सु॒वर्गं लो॒कमा॑यन् । यस्यै॒वं व॑पन्ति । भव॑त्या॒त्मना॑ ।
 अथो॑ सु॒वर्गं लो॒कमे॑ति । 29 (10)

T.B.1.5.6.3

अथै॒तन्-म॑नुर्-व॒ज्रे मि॑थुन-म॒प॑श्यत् । स श्मश्रू॑ण्यग्रे॑ऽव॑पत ।
 अथो॑पपक्षौ । अथ॑ केशा॑न् । ततो॑ वै स प्रा॒जाय॑त प्र॒जया॑ प॒शुभिः॑ ।
 यस्यै॒वं व॑पन्ति । प्र प्र॒जया॑ प॒शुभिर्-मि॑थुनैर् जा॒यते॑ ।
 दे॒वा॒सुराः॑ स॒म्य॑न्ता आसन् । ते स॒म्व॑त्सरे॒ व्याय॑च्छन्त ।

तान् दे॒वाश्चा॑तुर्-मा॒स्यै॒रै॒वाभि॑ प्रायुञ्जत । 30 (10)

T.B.1.5.6.4

वै॒श्वदे॑वेन च॒तुरो॑ मा॒सोऽवृ॑ज्जतेन्द्रा॒जानः॑ । ता॒च्छीर्ष॑न्नि चाव॑र्तयन्त
परि॑ च । वरु॒ण प्र॑धासै-श्चतु॒रो मा॒सोऽवृ॑ज्जत वरु॒णरा॑जानः ।

ता॒च्छीर्ष॑न्नि चाव॑र्तयन्त परि॑ च । सा॒कमे॑धैश्चतु॒रो मा॒सोऽवृ॑ज्जत
सोम॑राजानः । ता॒च्छीर्ष॑न्नि चाव॑र्तयन्त परि॑ च ।

या स॑म्व॒थ्सर॑ उप॒जीवा॑ ऽऽसी॒त् । तामे॑षा-मवृ॑ज्जत ।

ततो॑ दे॒वा अ॑भवन् । परा॒ऽसुराः॑ । 31 (10)

T.B.1.5.6.5

य ए॒वं वि॒द्वा-श्चा॑तुर्मा॒स्यैर्-य॑जते । भ्रातृ॑व्यस्यै॒व मा॒सो वृ॑क्त्वा ।

शीर्ष॑न्नि च॒ वर्त॑यते परि॑ च । यैषा स॑म्व॒थ्सर॑ उप॒जीवा॑ ।

वृ॒द्धे तां॑ भ्रातृ॑व्यस्य । क्षु॒धा ऽस्य॑ भ्रातृ॑व्यः परा॑ भवति ।

लो॒हि॒ता॒य॒सेन॑ निव॑र्तयते । यद्वा इ॒माम॑ग्निर्. ऋ॒तावा॑गते निव॑र्तयति ।

ए॒तदे॒वैना॑ रूपं॑ कृ॒त्वा निव॑र्तयति । सा ततः॑ श्वः श्वो॒ भूय॑सी॒ भव॑न्त्येति ।

32 (10)

T.B.1.5.6.6

प्रजा॑यते । य ए॒वं वि॒द्वान् लो॑हि॒ताय॑से॒न नि॒वर्त॑यते । ए॒तदे॒व रू॒पं
कृ॒त्वा नि॒वर्त॑यते । स ततः॑ श्वः श्वो भू॒यान्-भ॑वन्नेति । प्रै॒व जा॑यते ।
त्रे॒ण्या श॑ल॒ल्या नि॒वर्त॑येत । त्री॒णि त्री॒णि वै दे॒वाना॑मृ॒द्धानि॑ ।
त्री॒णि छ॒न्दा॑सि । त्री॒णि स॑व॒नानि॑ । त्रय॑ इ॒मे लो॒काः । 33 (10)

T.B.1.5.6.7

ऋ॒द्ध्यामे॒व तद्-वी॒र्य ए॒षु लो॒केषु॑ प्र॒ति ति॑ष्ठति । यच्चा॑तु॒र्मास्य॑या-
॥ ज्या॑त्म॒नो ना॒वद्ये॑त् । दे॒वेभ्य॑ आ॒वृश्च्ये॑त । च॒तृषु॑ च॒तृषु॑ मा॒सेषु॑ नि॒वर्त॑येत ।
प॒रोक्ष॑मे॒व तद्-दे॒वेभ्य॑ आ॒त्मनो॑ऽव॒द्यत्य॑ना व॒स्काय॑ ।
दे॒वानां॑ वा ए॒ष आ॒नीतः॑ । यश्चा॑तु॒र्मास्य॑याजी । य ए॒वं वि॒द्वान्नि
च॒ वर्त॑यते॒ परि॑ च । दे॒वता॑ ए॒वाप्ये॑ति । ना॒स्य रु॒द्रः प्र॒जां
प॒शू-न॑भि॒मन्य॑ते () । 34 (10)

(ए॒त्ये- त्य - यु॒ज्जता - सु॒रा - ए॒ति - लो॒का - म॒न्यते) (A6)

1.5.7 अनुवाकं 7 – अग्निचयनशेषा इष्टकोपधानमन्त्राः, तत्र संतत्याख्येष्टकामन्त्राः

T.B.1.5.7.1

आयुषः प्राण॑ सन्तनु । प्राणादपान॑ सन्तनु । अपानाद् व्यान॑
सन्तनु । व्यानाच्चक्षुः॑ सन्तनु । चक्षुषः॑ श्रोत्र॑ सन्तनु ।
श्रोत्रान् मनः॑ सन्तनु । मनसो वाच॑ सन्तनु । वाच आत्मान॑ सन्तनु ।
आत्मनः॑ पृथिवी॑ सन्तनु । पृथिव्या अन्तरिक्ष॑ सन्तनु () ।
अन्तरिक्षाद्-दिव॑ सन्तनु । दिवः सुवः॑ सन्तनु । 35 (12)

(अन्तरिक्ष॑ सन्तनु द्वे च) (A7)

1.5.8 अनुवाकं 8 – अग्निचयनशेषा थर्वशिरोऽभिधानानामिष्टकानां मन्त्राः

T.B.1.5.8.1

इन्द्रो॑ दधीचो॑ अस्थभिः॑ । वृत्राण्य॑ प्रतिष्कृतः॑ । जघान॑ नव तीर्नव॑ ।
इच्छन्न॑श्चस्य॑ यच्छिरः॑ । पर्वतेष्वप॑ श्रितम् । तद्-विदच्छर्य॑णावति ।
अत्रा॑ ह गौरमन्वत॑ । नाम॑ त्वष्टुरपी॑च्यम् । इत्था॑ चन्द्रमसो॑ गृहे ।
इन्द्रमि॑द्गाथिनो॑ बृहत् । 36 (10)

T.B.1.5.8.2

इन्द्र॑म॒र्के॑भि॒रकि॑णः । इन्द्रं॑ वा॒णीर॑नूष॒त । इन्द्र॑ इ॒द्धर्योः॑ स॒चा ॥
 संमि॑श्ल॒ आव॑चो॒ युजा॑ ॥ इन्द्रो॑ व॒ज्री हि॑रण्य॒यः । इन्द्रो॑ दी॒र्घाय॑ चक्ष॒से ।
 आ सूर्य॑ꣳ रो॒हय॑द्-दि॒वि । वि गो॑भि॒रद्रि॑मैर॒यत् ।
 इन्द्र॑ वा॒जेषु॑ नो॒ अव॑ । स॒हस्र॑ प्र॒धने॑षु च । 37 (10)

T.B.1.5.8.3

उग्र॑ उ॒ग्राभि॑रू॒तिभिः॑ । तमिन्द्रं॑ वा॒जया॑मसि । महे॑ वृ॒त्राय॑ ह॒न्तवे॑ ।
 स वृ॒षा वृ॒षभो॑ भुवत् । इन्द्रः॑ स॒दाम॑ने कृ॒तः । ओजि॑ष्ठः स ब॒ले
 हि॒तः । द्यु॒म्नी श्लो॒की स सौ॒म्यः । गिरा॑ व॒ज्रो न॑ संभृ॒तः ।
 स॒बलो॑ अन॒पच्यु॑तः । व॒वक्षु॑-रु॒ग्रो अस्तृ॑तः () । 38 (10)

(बृह- च्वा - स्तृतः) (A8)

1.5.9 अनुवाकं 9 – सोमशेषभूता इष्टयः. (आध्वरब्राह्मणम्)

T.B.1.5.9.1

दे॒वा॒सुराः॑ स॒म्य॑न्ता आसन् । स प्र॒जाप॑तिरिन्द्रं॑ ज्येष्ठं पु॒त्रम॑प॒ न्यध॑त् ।
 ने॒दे॒नम॑सुरा ब॒लीयाꣳ सोऽह॑न॒न्निति॑ । प्र॒ह्लादो॑ ह॒ वै का॑याध॒वः ।
 वि॒रोच॑नꣳ स्वं पु॒त्रम॑प॒ न्यध॑त् । ने॒दे॒नं दे॒वा अ॑ह॒न॒न्निति॑ ।

ते दे॒वाः प्र॒जाप॑ति-मु॒पस॑मेत्यो॒चुः । ना॒राज॑कस्य यु॒द्धम॑स्ति ।
इन्द्र॑मन्विच्छा॒मेति॑ । तं य॒ज्ञक्र॑तुभि-रन्वै॑च्छन् । 39 (10)

T.B.1.5.9.2

तं य॒ज्ञक्र॑तुभिर्नान्वि॑न्दन् । तमिष्टि॑भि-रन्वै॑च्छन् ।
तमिष्टि॑भि-रन्ववि॑न्दन् । तदिष्टी॑ना-मिष्टि॒त्वम् । ए॒ष्टयो॑ ह वै नाम ।
ता इ॒ष्टय॑ इत्याचक्षते परो॑क्षेण । परो॑क्षप्रिया इव हि दे॒वाः ।
तस्मा॑ ए॒तमा॑ग्नावैष्ण॒व-मे॑कादशकपालं दीक्ष॑नीयं निरव॑पन् ।
तदप॑द्रुत्यातन्वत । तान्पत्नी॑ सम्पू॒जान्त॑ उपा॒नय॑न् । 40 (10)

T.B.1.5.9.3

ते तदं॑ तमे॒व कृ॑त्वोद॒द्रव॑न् । ते प्रा॒यणी॑यमभि समा॒रोह॑न् ।
तदप॑द्रुत्यातन्वत । ताञ्छ॒म्वन्त॑ उपा॒नय॑न् । ते तदं॑ तमे॒व
कृ॑त्वोद॒द्रव॑न् । त आ॒तिथ्य॑मभि समा॒रोह॑न् । तदप॑द्रुत्यातन्वत ।
तानि॒डान्त॑ उपा॒नय॑न् । ते तदं॑ तमे॒व कृ॑त्वोद॒द्रव॑न् ।
तस्मा॑ दे॒ता ए॒तदन्ता॑ इ॒ष्टयः॑ संतिष्ठ॑न्ते । 41(10)

T.B.1.5.9.4

ए॒व॒ हि दे॒वा अ॒कुर्व॑त । इति॑ दे॒वा अ॒कुर्व॑त । इत्यु॒ वै म॒नुष्याः॑ कुर्व॑ते ।
 ते दे॒वा ऊ॒चुः । यद्वा इ॒दमु॒च्चैर्-यज्ञे॑न च॒राम॑ ।
 तन्नोऽसु॒राः पा॒प्माऽनु॑विन्दन्ति । उपा॒ञ्शू॒पस॑दा च॒राम॑ ।
 तथा नोऽसु॒राः पा॒प्मा नानु॑वे॒थस्य॑न्तीति । त उपा॒ञ्शू॒पस॑द-म॒तन्व॑त ।
 तिस्र॑ ए॒व सा॒मिधे॑नीर॒नूच्य॑ । 42 (10)

T.B.1.5.9.5

स्रु॒वेणा॑घार-मा॒घार्य॑ । तिस्रः॑ प॒राची॑-राहु॒तीर् हु॒त्वा । स्रु॒वेणो॑प॒सदं॑
 जुह॒वाञ्च॑क्रुः । उग्रं॑ ँ॒वचो॑ अपा॒वधीं॑ त्वेषं॑ ँ॒वचो॑ अपा॒वधी॑
 स्वाहे॑ति । अ॒शन॒यापि॑पा॒से ह॒ वा उग्रं॑ ँ॒वचः॑ । ए॒नश्च॑ वैर॒हत्यं॑ च
 त्वेषं॑ ँ॒वचः॑ । ए॒त॒ ह॒ वाव॑ तच्च॒तुर्धा॑वि॒हितं॑ पा॒प्मानं॑ दे॒वा
 अप॑ज॒घ्निरे॑ । तथो॑ ए॒वैत॑दे॒वं वि॒द्यज॑मानः ।
 तिस्र॑ ए॒व सा॒मिधे॑नीर॒नूच्य॑ । स्रु॒वेणा॑घार-मा॒घार्य॑ । 43 (10)

T.B.1.5.9.6

तिस्रः॑ प॒राची॑राहु॒तीर् हु॒त्वा । स्रु॒वेणो॑प॒सदं॑ जुहोति ।
 उग्रं॑ ँ॒वचो॑ अपा॒वधीं॑ त्वेषं॑ ँ॒वचो॑ अपा॒वधी॑ स्वाहे॑ति ।

अ॒श॒न॒या॒पि॒पा॒से॒ ह॒ वा॒ उ॒ग्रं॑ व॒चः॑ । ए॒नश्च॑ वै॒र॒ह॒त्यं॑ च॒ त्वेषं॑ व॒चः॑ ।

ए॒त॒मे॒व॒ तच्च॑तु॒र्धा-वि॒हितं॑ पा॒प्मानं॑ य॒ज॒मा॒नोऽप॑हते ।

तेऽभि॒नी॒यै॒वा॒हः॑ प॒शु॒मा-ऽल॑भन्त । अ॒ह॒ ए॒व॒ तद्-दे॒वा अ॑व॒र्ति

पा॒प्मानं॑ मृ॒त्युम॑प॒ज॒घ्नि॒रे । ते॒नाभि॑नी॒ये॒व रा॒त्रेः प्रा॑च॒रन् ।

रा॒त्रि॒या ए॒व॒ तद्-दे॒वा अ॑व॒र्ति पा॒प्मानं॑ मृ॒त्युम॑प॒ज॒घ्नि॒रे । 44 (10)

T.B.1.5.9.7

तस्मा॑द॒भि॒नी॒यै॒वा॒हः॑ प॒शु॒मा॒ल॒भे॒त । अ॒ह॒ ए॒व॒ तद्-य॒ज॒मा॒नो ऽव॑र्ति

पा॒प्मानं॑ भ्रा॒तृ॒व्या॒नप॑नुदते । ते॒नाभि॑नी॒ये॒व रा॒त्रेः प्र॑च॒रेत् ।

रा॒त्रि॒या ए॒व॒ तद्-य॒ज॒मा॒नो ऽव॑र्ति पा॒प्मानं॑ भ्रा॒तृ॒व्या॒नप॑नुदते ।

स ए॒ष उ॒प॒व॒स॒थी॒ये ऽह॑न्-द्वि॒दे॒व॒त्यः॑ प॒शु॒रा॒ल॒भ्य॑ते । द्वा॒यं वा॑ अ॒स्मिन्

लो॒के य॑ज॒मा॒नः । अ॒स्थि॑ च॒ मा॒ꣳसं॑ च । अ॒स्थि॑ चै॒व ते॒न मा॑ꣳसं॑

च॒ य॑ज॒मा॒नः स॒ꣳ स्कु॑रुते । ता॒ वा ए॒ताः प॑ञ्च दे॒वताः॑ ।

अ॒ग्नी॒षो॒मा-व॒ग्नि॒र्-मि॒त्रा॒व॒रु॒णौ () । 45 (10)

T.B.1.5.9.8

पञ्चपञ्ची वै यजमानः । त्वङ्मा॑ स॒ स्नावास्थि॑ मज्जा ।
 ए॒तमे॒व तत्पञ्च॑धा वि॒हितमा॑त्मानं व॒रुण॑पाशान्-मुञ्चति ।
 भेष॑जतायै निर्व॒रुण॑त्वाय । त॒ सप्त॑भिः छन्दो॑भिः प्रा॒तरह्व॑यन् ।
 तस्मा॑त्सप्त चतु॒रुत्तरा॑णि छन्दा॑सि प्रा॒तरनु॑वाकेऽनूच्यन्ते ।
 तमे॒तयो॑-प॒समे॒त्यो-पा॑सीदन् । उपा॑स्मै गाय॒ता न॑र इति ।
 तस्मा॑ दे॒तया॑ ब॒हिष्प॑वमान॒ उप॑सद्यः । 46 (9)

(ऐ॒च्छन् - न॒नय॑ - स्ति॒ष्ठन्ते - ऽनू॒च्या - नू॒च्य सु॒वेणा॑धार॒माधार्य॑ -
 रा॒त्रिया॑ ए॒व तद् दे॒वा अ॒वर्ति॑ पा॒प्मानं॑ मृ॒त्युम॑प॒जघ्नि॑रे - मि॒त्राव॑रु॒णौ -
 +न॒व च) (A9)

Sepcial Korvai

(दे॒वा य॑ज॒मानो॑ दे॒वा दे॒वा य॑ज॒मानो॑ य॒ज॒मानो॑ऽल॒भन्त॑ प्रा॒चरन् ल॑भे॒त
 प्र॒चरे॑दा॒लभ॑न्ता॒लभे॑त मृ॒त्युम॑प॒जघ्नि॑रे भ्रा॒तृव्यान्)

1.5.10 अनुवाकं 10 – त्रिवृदादिस्तोमरूपाणि सोमङ्गानि. (आध्वरब्राह्मणम्)

T.B.1.5.10.1

स॒ समु॒द्र उत्तर॑तः प्रा॒ज्वल॑द्-भूम्यन्ते॑न । ए॒ष वाव॑ स॒ समु॒द्रः ।
यच्चा॑त्वा॒लः । ए॒ष उ॒ वेव॑ स॒ भूम्यन्तः॑ । यद्वे॑द्यन्तः । तदे॒तत्-त्रि॑शलं
त्रि॒पूरू॒षम् । तस्मा॑त्-तं त्रि॒वित॑स्तं ख॒नन्ति॑ । स सु॒वर्ण॑रज॒ताभ्यां॑
कु॒शीभ्यां॑ परि॒गृही॑त आसीत् । तं य॑दस्या॒ अध्य॑जनयन् ।
तस्मा॑दादि॒त्यः । 47 (10)

T.B.1.5.10.2

अथ॑ यथ् सु॒वर्ण॑रज॒ताभ्यां॑ कु॒शीभ्यां॑ परि॒गृही॑त आसीत् ।
साऽस्य॑ कौ॒शिक॑ता । तं त्रि॒वृता॑ऽभि प्रा॒स्तुव॑त । तं त्रि॒वृता॑ ऽऽद॑दत ।
तं त्रि॒वृता॑ ऽऽह॑रन् । याव॑ती त्रि॒वृतो॑ मा॒त्रा । तं पञ्च॑दशे॒नाभि॑ प्रा॒स्तुव॑त ।
तं पञ्च॑दशे॒नाद॑दत । तं पञ्च॑दशे॒नाह॑रन् ।
याव॑ती पञ्च॑दशस्य॒ मा॒त्रा । 48 (10)

T.B.1.5.10.3

त॒प् सप्त॑दशे॒नाभि॑ प्रा॒स्तुव॑त । त॒प् सप्त॑दशे॒नाद॑दत ।
त॒प् सप्त॑दशे॒नाह॑रन् । याव॑ती सप्त॑दशस्य॒ मा॒त्रा ।

तस्य॑ सप्तद॒शेन॑ ह्रिय॑माणस्य तेजो॑ हरो॑ऽपतत् । तमे॑कवि॒ऽशेना॑भि
प्रास्तु॑वत । तमे॑कवि॒ऽशेना॑ददत् । तमे॑कवि॒ऽशेना॑हरन् ।
याव॑त्येकवि॒ऽशस्य॑ मा॒त्रा ॥ ते यत्-त्रि॒वृता॑ स्तुव॑ते ॥ 49 (10)

T.B.1.5.10.4

त्रि॒वृ॒तै॒व तद्-यज॑मानमाददते । तं त्रि॒वृ॒तै॒व हर॑न्ति । याव॑ती त्रि॒वृ॒तो मा॒त्रा ॥
अग्नि॑र्वै त्रि॒वृ॒त् । याव॑द्वा अग्ने॑र्द॒हतो॑ धूम उदे॑त्यानुव्येति । ताव॑ती त्रि॒वृ॒तो
मा॒त्रा ॥ अग्ने॑रे॒वैनं॑ तत् । मा॒त्राऽ॒ सायु॑ज्यऽ॒ सलो॑कतां गमयन्ति ।
अथ॑ यत्पञ्चद॒शेन॑ स्तुव॑ते । पञ्चद॒शेनै॒व तद्-यज॑मान-माददते ॥ 50 (10)

T.B.1.5.10.5

तं पञ्चद॒शेनै॒व हर॑न्ति । याव॑ती पञ्चद॒शस्य॑ मा॒त्रा ॥ चन्द्र॑मा वै
पञ्चद॒शः । एष॑ हि पञ्चद॒श्याम॑पक्षीयते ॥ पञ्चद॒श्या-मा॑पूर्यते ॥
चन्द्र॑मस ए॒वैनं॑ तत् । मा॒त्राऽ॒ सायु॑ज्यऽ॒ सलो॑कतां गमयन्ति ।
अथ॑ यत्सप्तद॒शेन॑ स्तुव॑ते । सप्तद॒शेनै॒व तद्-यज॑मानमाददते ।
तऽ॒ सप्तद॒शेनै॒व हर॑न्ति ॥ 51 (10)

T.B.1.5.10.6

याव॑ती स॒प्तद॑शस्य मा॒त्रा॑ । प्र॒जाप॑तिर्वै स॒प्तद॑शः । प्र॒जाप॑तेरे॒वैनं॑
तत् । मा॒त्राꣳ सायु॑ज्यꣳ स॒लो॒क॒तां॑ गमयन्ति । अथ यदे॒कवि॑ꣳशेन॑
स्तु॒वते॑ । ए॒कवि॑ꣳशेनै॒व तद्-यज॑मान-माद॑दते । तमे॒कवि॑ꣳशेनै॒व
हर॑न्ति । याव॑त्ये॒कवि॑ꣳशस्य॑ मा॒त्रा॑ । अ॒सौ वा आ॑दित्य ए॒कवि॑ꣳशः ।

आ॒दि॒त्यस्यै॒वैनं॑ तत् । 52 (10)

T.B.1.5.10.7

मा॒त्राꣳ सायु॑ज्यꣳ स॒लो॒क॒तां॑ गमयन्ति । ते कु॒श्या॑ । व्य॒घ्नन् ।
ते अ॒हो॒रा॒त्रे अ॑भवताम् । अ॒हरे॒व सु॒वर्णा॑ ऽभवत् । र॒ज॒ता रा॒त्रिः ।
स यदा॑दि॒त्य उदे॑ति । ए॒तामे॒व तत्सु॒वर्णा॑ कु॒शीम॒नु स॒मेति॑ ।
अथ यद॑स्तमेति । ए॒तामे॒व तद्-र॒ज॒तां कु॒शीम॒नु स॒म्वि॑शति () ।
प्र॒हा॒दो ह वै का॑याध॒वः । वि॒रो॒च॒नꣳ स्वं पु॒त्रमु॑दास्यत् ।
स प्र॒द॒रोऽभ॑वत् । तस्मा॑त् प्र॒द॒रादु॒दकं॑ नाचा॑मेत् । 53 (14)

(आदित्यः – पञ्चदशस्य मात्रा – स्तुवते – पञ्चदशेनैव तद्
यजमानमाददते – सप्तदशेनैव हरन् – त्यादित्यस्यैवैनन्तद् दृ
विंशति चत्वारि च) (A10)

1.5.11 अनुवाकं 11 – सवनीयपशुपुरोडाशाः (आध्वरब्राह्मणम्)

T.B.1.5.11.1

ये वै चत्वारः स्तोमाः । कृतं तत् । अथ ये पञ्च । कलिः सः ।
तस्माच्चतुष्टोमः । तच्चतुष्टोमस्य चतुष्टोमत्वम् । तदाहुः ।
कतमानि तानि ज्योतींषि । य एतस्य स्तोमा इति ।
त्रिवृत्-पञ्चदशः सप्तदश एकविंशः । 54 (10)

T.B.1.5.11.2

एतानि वाव तानि ज्योतींषि । य एतस्य स्तोमाः । सोऽब्रवीत् ।
सप्तदशेन हियमाणो व्यलेशिषि । भिषज्यत मेति ।
तमश्विनौ धानाभि-रभिषज्यताम् । पूषा करम्भेण । भारती परिवापेण ।
मित्रावरुणौ पयस्यया । तदाहुः । 55 (10)

T.B.1.5.11.3

यद॑श्चि॒भ्यां॑ धा॒नाः । पू॒ष्णः॑ क॒र॒म्भः॑ । भा॒र॒त्यै॑ प॒रि॒वा॒पः ।
 मि॒त्रा॒व॒रु॒णयोः॑ प॒य॒स्याऽथ॑ । क॒स्मा॒दे॒तेषां॑ ह॒विषा॑मि॒न्द्र॒मे॒व य॑ज॒न्तीति॑ ।
 ए॒ता ह्ये॑नं दे॒वता॑ इति ब्रू॒यात् । ए॒तैर् ह॒विर्भि॑-र॒भिष॑ज्य-स्त॒स्मादि॑ति ।
 तं व॑स॒वोऽष्टा॑क॒पाले॑न प्रा॒तस्स॑वनेऽभिष॑ज्यन् । रु॒द्रा ए॒काद॑शक॒पाले॑न
 मा॒ध्य॒न्दि॒ने स॑वने । वि॒श्वे दे॒वा द्वा॑द॒शक॑पाले॒न तृ॑तीयस॒वने । 56 (10)

T.B.1.5.11.4

स यद॑ष्टाक॒पालान्॑ प्रा॒तस्स॑वने कुर्या॑त् । ए॒काद॑शक॒पालान्॑ मा॒ध्य॒न्दि॒ने
 स॑वने । द्वा॒द॒शक॑पाला॒ स्तृ॒तीय स॑वने । वि॒लोम॑ तद्-य॒ज्ञस्य॑ क्रि॒येत॑ ।
 ए॒काद॑शक॒पालाने॑व प्रा॒तस्स॑वने कुर्या॑त् । ए॒काद॑शक॒पालान्॑ मा॒ध्य॒न्दि॒ने
 स॑वने । ए॒काद॑शक॒पाला॒ स्तृ॒तीय स॑वने । य॒ज्ञस्य॑ स॒लोम॑त्वाय ।
 तदा॑हुः । यद् व॒सूनां॑ प्रा॒तस्स॑व॒नम् () । रु॒द्राणां॑ मा॒ध्य॒न्दि॒नं
 स॑व॒नम् । वि॒श्वेषां॑ दे॒वानां॑ तृ॒तीयस॑व॒नम् । अथ॑ क॒स्मा॒दे॒तेषां॑
 ह॒विषा॑मि॒न्द्र॒मे॒व य॑ज॒न्तीति॑ । ए॒ता ह्ये॑नं दे॒वता॑ इति ब्रू॒यात् ।
 ए॒तैर् ह॒विर्भि॑र॒भिष॑ज्य-स्त॒स्मादि॑ति । 57 (15)

(ए॒क॒वि॒ंश॒-आ॒हु॒-स्तृ॒तिय॑स॒वने॑-प्रा॒तस्स॑व॒नं प॒ञ्च च॑) (A11)

1.5.12 अनु॒वाकं॑ 12 – स॒प्तछ॒न्दांसि॑ प्र॒पञ्च्य॑न्ते (आध्व॒रब्रा॑ह्मणम्)

T.B.1.5.12.1

तस्या॒वाचो॑ऽव॒पादा॑द॒बिभ॑युः । तमे॒तेषु॑ स॒प्तसु॑ छ॒न्दः स्व॑श्रय॒न् ।
यद॑श्रय॒न् । तच्छ्रा॑य॒न्तीय॑स्य श्राय॒न्तीय॑त्वम् । यद॑वा॒रय॒न् ।
तद् वा॒रव॑न्तीय॒स्य वा॒रव॑न्तीय॒त्वम् । तस्या॒वाच॑ ए॒वाव॑पा॒दाद॑बिभ॑युः ।
तस्मा॑ ए॒तानि॑ स॒प्त च॑तु॒रुत्तरा॑णि छ॒न्दा॒स्युपा॑दधुः ।
तेषा॑म॒ति त्री॑ण्य॒रिच्य॑न्त । न त्री॑ण्युद॒भव॑न् । 58 (10)

T.B.1.5.12.2

स बृ॒हती॑मे॒वा-स्पृ॑शत् । द्वाभ्या॑म॒क्षरा॑भ्याम् । अ॒हो॒रा॒त्राभ्या॑मे॒व । तदा॑हुः ।
क॒तमा॑ सा दे॒वाक्ष॑रा बृ॒हती॑ । यस्यां॑ तत् प्र॒त्यति॑ष्ठत् ।
द्वा॒दश॑ पौ॒र्णमा॑स्यः । द्वा॒दशा॑ष्ट॒काः । द्वा॒दशा॑मा॒वास्याः॑ ।
ए॒षा वा॒व सा॑ दे॒वाक्ष॑रा बृ॒हती॑ । 59 (10)

T.B.1.5.12.3

यस्यां॑ तत् प्र॒त्यति॑ष्ठ॒दिति॑ । या॒नि च॑ छ॒न्दा॒स्यत्य॑रिच्यन्त ।
या॒नि च॑ नो॒दभव॑न् । ता॒नि निर्वी॑र्या॒णि ही॑नान्य॒मन्य॑न्त ।

सा ऽब्रवीद्-बृहती । मामेव भूत्वा । मामुप स७ श्रयतेति ।
चतुर्भिरक्षरै-रनुष्टुग्-बृहतीं नोदभवत् । चतुर्भिरक्षरैः पङ्क्तिर्-बृहती-
मत्यरिच्यत । तस्यामेतानि चत्वार्यक्षराण्य-पच्छिद्या-दधात् । 60 (10)

T.B.1.5.12.4

ते बृहती एव भूत्वा । बृहतीमुप समश्रयताम् । अष्टाभि-
रक्षरैरुष्णिग्-बृहतीं नोदभवत् । अष्टाभिरक्षरैस्त्रिष्टुग्-बृहती-मत्यरिच्यत ।
तस्यामेता-न्यष्टावक्षराण्य-पच्छिद्यादधात् । ते बृहती एव भूत्वा ।
बृहतीमुप समश्रयताम् । द्वादशभि-रक्षरैर्-गायत्री-बृहतीं नोदभवत् ।
द्वादशभि-रक्षरैर्-जगती-बृहती-मत्यरिच्यत ।
तस्यामेतानि द्वादशाक्षराण्य-पच्छिद्यादधात् । 61 (10)

T.B.1.5.12.5

ते बृहती एव भूत्वा । बृहतीमुप समश्रयताम् । सौऽब्रवीत्-प्रजापतिः ।
छन्दाँसि रथो मे भवत । युष्माभि-रहमेत-मध्वानमनु
संचराणीति । तस्य गायत्री च जगती च पक्षावभवताम् ।
उष्णिक्च त्रिष्टुप्च प्रष्ट्यौ । अनुष्टुप्च पङ्क्तिश्च धुर्यौ । बृहत्येवोद्धिरभवत् ।

स ए॒तं छ॒न्दो॒रथ॒मा॒स्थाय॑ () । ए॒तम॒ध्वान॑मनु॒ सम॑चरत् ।
 ए॒त॒ ह॒ वै छ॒न्दो॒रथ॒मा॒स्थाय॑ । ए॒तम॒ध्वान॑मनु॒ संच॑रति ।
 येनै॑ष ए॒तथ् संच॑रति । य ए॒वं वि॒द्वान्-सो॒मो॒न॒ यज॑ते ।
 य उ॒चै॒नमे॒वं वि॑द । 62 (16)

(अ॒भ॒वन् - वा॒व सा॒ दे॒वाक्ष॑रा बृ॒ह - त्य॑द॒धाद् - द्वा॒द॒शाक्ष॑राण्यप
 छि॒द्या॒द॒धा - दा॒स्थाय॑ षट्च) (A12)

Prapaataka Korvai with starting Padams of 1 to 12 Anuvaakams :-

(अ॒ग्नेः कृ॒त्ति॒का - यत् पु॒ण्यं - दे॒वस्य॑ स॒वि॒तुर् - ब्र॒ह्म॒वा॒दि॒नः क -
 त्यू॒तमे॒व - दे॒वा वा - आ॒यु॒षः प्रा॒ण - मि॒न्द्रो द॒धी॒चो - दे॒वा॒सु॒राः
 स प्र॒जा॒प॒तिः - स॒ समु॑द्रो - ये॒ वै च॒त्वा॒र - स्त॒स्या॒वा॒चो॒ द्वा॒द॒श)

Korvai with starting Padams of 1, 11, 21 Series of Dasanis :-

(अ॒ग्नेः कृ॒त्ति॒का - दे॒वगृ॑हा - ऋ॒तमे॒व - वै॒श्वदे॒वे॒न - ते॒ तद॑न्त -
 तं प॒ञ्चद॑शे॒न - ते॒ बृ॒हती॒ ए॒व द्वि॑षष्टिः)

First and Last Padam of 5th Prapaatakam :-

(अ॒ग्नेः कृ॒त्ति॒का – य उ चैन॑मे॒वं वै॒द)

हरिः॑ ओं

कृष्ण यजुर्वेदीय तैत्तिरीय ब्राह्मणे प्रथमाष्टके पञ्चमः प्रपाठकः समाप्तः

APPENDIX FOR 1.5.1.5

1.5.1.5 “पूर्णा-पश्चाद्{1}”, “यत्ते देवा अदधुः{2}”

पूर्णा पश्चादु॑त् पूर्णा पु॒रस्ता॑दुन्मध्यतः॑ पौ॒र्णमा॑सी जिगाय ।
तस्यान् दे॒वा अधि॑ सँव॒सन्त॑ उत्त॒मे नाक॑ इ॒ह मा॑दयन्तां ॥

यत्ते दे॒वा अदधु॑ भा॒गधे॒यम॑मा॒वास्ये॑ सँव॒सन्तो॑ महित्वा ।
सानो॑ य॒ज्ञं पि॑पृहि विश्व॒वारो॑ रयिं नो धेहि सु॒भगे सु॒वीरं॑ ॥

(Appearing in TS 3.5.1.1)

**Details of Dasani & Vaakyams for Ashtakam 1 –
Prapaatakam 5 – TB 1.5**

	Dasani	Vaakyams
Anuvakam 1	5	55
Anuvakam 2	9	93
Anuvakam 3	4	48
Anuvakam 4	2	26
Anuvakam 5	7	74
Anuvakam 6	7	70
Anuvakam 7	1	12
Anuvakam 8	3	30
Anuvakam 9	8	79
Anuvakam 10	7	74
Anuvakam 11	4	45
Anuvakam 12	5	56
Total →	62	662

=====

1.6 प्रथमाष्टके षष्ठः प्रपाठकः – राजसूयानुब्राह्मणं

1.6.1 अनुवाकं 1 – अनुमत्याद्या इष्टयः

T.B.1.6.1.1

अनु॒म॒त्यै॑ पु॒रो॒डा॒श॒-म॒ष्टा॒क॒पा॒लं॑ निर्व॒प॒ति॑ । ये प्र॒त्य॒ञ्चः॑ श॒म्या॒या॒
अव॒शी॒य॒न्ते॑ । तन्नै॒र्ऋ॒त-मे॒क॒क॒पा॒लम् । इ॒यं वा॑ अ॒नु॒म॒तिः॑ ।
इ॒यं नि॒र्ऋ॒तिः॑ । नै॒र्ऋ॒तेन॑ पू॒र्वेण॑ प्र॒च॒र॒ति॑ । पा॒प्मान॑मे॒व नि॒र्ऋ॒तिं॑
पू॒र्वां नि॒र॒व॒द॒य॒ते॑ । ए॒क क॒पा॒लो॒ भ॒व॒ति॑ । ए॒क॒धै॒व नि॒र्ऋ॒तिं॑
नि॒र॒व॒द॒य॒ते॑ । यद॒हु॒त्वा॒ गा॒र्ह॒प॒त्य॑ ई॒युः । 1 (10)

T.B.1.6.1.2

रु॒द्रो भू॒त्वाऽग्नि॑र॒नू॒त्था॒य॑ । अ॒ध्व॒र्युं च॑ य॒ज॒मा॒नं च॑ ह॒न्यात् ।
वी॒हि स्वा॒हा ऽऽहु॑तिं जुषा॒ण इ॒त्याह॑ । आ॒हु॒त्यै॒वैन॑श् श॒म॒य॒ति॑ ।
ना॒र्ति॒मा॒च्छ॑-त्य॒ध्व॒र्युर्न॑ य॒ज॒मा॒नः॑ । ए॒को॒ल्मु॒केन॑ य॒न्ति॑ ।
तद्धि॑ नि॒र्ऋ॒त्यै भा॒ग॒धे॒यम् । इ॒मां दि॒शं य॑न्ति । ए॒षा वै नि॒र्ऋ॒त्यै दिक् ।
स्वा॒या॒मे॒व दि॒शि नि॒र्ऋ॒तिं नि॒र॒व॒द॒य॒ते॑ । 2 (10)

T.B.1.6.1.3

स्व॒कृ॒त इ॒रि॒णे जु॒हो॒ति प्र॒द॒रे वा॑ । ए॒तद्वै नि॒र्ऋ॒त्या आ॒य॒त॒नम् ।

स्व॑ ए॒वाय॑तने॒ निर्ऋ॑तिं॒ निर॑वदयते । ए॒ष ते॑ निर्ऋ॑ते भा॒ग इ॒त्याह॑ ।
निर्दि॑शत्ये॒वैना॑म् । भू॒ते ह॒विष्म॑त्यसी॒त्याह॑ ।
भू॒तिमे॑वोपावर्तते । मु॒ञ्चे॑मम॒हस॑ इ॒त्याह॑ ।
अ॒हस॑ ए॒वैनं॑ मुञ्चति । अ॒ङ्गु॒ष्ठाभ्यां॑ जुहोति । 3 (10)

T.B.1.6.1.4

अ॒न्तत॑ ए॒व निर्ऋ॑तिं॒ निर॑वदयते । कृ॒ष्णं वा॑सः कृ॒ष्णातू॑षं दक्षि॒णा ।
ए॒तद्-वै॑ निर्ऋ॑त्यै रू॒पम् । रू॒पेणै॒व निर्ऋ॑तिं॒ निर॑वदयते ।
अ॒प्रती॑क्षमायन्ति । निर्ऋ॑त्या अ॒न्तर्हि॑त्यै । स्वा॒हा नमो॑ य इ॒दं
च॒कारे॑ति पु॒नरे॑त्य गा॒र्हप॑त्ये जुहोति । आ॒हु॒त्यै॒व नम॑स्यन्तो
गा॒र्हप॑त्य-मु॒पाव॑र्तन्ते । आ॒नु॒मते॑न प्र॒चर॑ति ।
इ॒यं वा॑ अ॒नु॒मतिः॑ । 4 (10)

T.B.1.6.1.5

इ॒यमे॒वास्मै॑ रा॒ज्यम॑नु॒मन्य॑ते । धे॒नुर्-दक्षि॑णा । इ॒मामे॒व धे॒नुं कु॑रुते ।
आ॒दि॒त्यं च॒रुं नि॒र्वप॑ति । उ॒भयी॑ष्वे॒व प्र॒जास्व॑भिषिच्यते ।
दै॒वीषु॑ च॒ मानु॑षीषु च । व॒रो दक्षि॑णा । व॒रो हि॑ रा॒ज्यं स॑मृ॒द्ध्यै॑ ।

आ॒ग्ना॒वै॒ष्ण॒व-मे॒का॒द॒श॒क॒पा॒लं॑ नि॒र्व॒प॒ति॑ । अ॒ग्निः॑ सर्वा॒ दे॒वताः॑ ॥ 5 (10)

T.B.1.6.1.6

वि॒ष्णु॒र्य॒ज्ञः॑ । दे॒वता॑श्चै॒व य॒ज्ञं चा॒व रु॒न्धे॑ । वा॒म॒नो॑ व॒ही द॒क्षि॒णा ।

यद्-व॒ही । ते॒ना॒ग्ने॒यः॑ । यद्-वा॒म॒नः॑ । ते॒न वै॒ष्ण॒वः॑ स॒मृ॒द्ध्यै॑ ।

अ॒ग्नी॒षो॒मी॒य-मे॒का॒द॒श॒क॒पा॒लं॑ नि॒र्व॒प॒ति॑ । अ॒ग्नी॒षो॒मा॒भ्यां॑ वा॒ इन्द्रो॑
वृ॒त्र॒म॒ह॒न्नि॒ति॑ । यद् अ॒ग्नी॒षो॒मी॒य-मे॒का॒द॒श॒क॒पा॒लं॑ नि॒र्व॒प॒ति॑ । 6 (10)

T.B.1.6.1.7

वा॒त्र॒घ्न॒मे॒व वि॒जि॒त्यै॑ । हि॒र॒ण्यं॑ द॒क्षि॒णा स॒मृ॒द्ध्यै॑ । इन्द्रो॑ वृ॒त्रं ह॒त्वा ।

दे॒वता॑भिश्चे॒न्द्रि॒येण॑ च॒ व्या॒र्ध्य॑त । स ए॒त॒मै॒न्द्रा॒ग्न-मे॒का॒द॒श॒क॒पा॒ल-
म॒प॒श्य॑त् । त॒न्नि॒र॒व॒प॑त् । ते॒न वै स॒ दे॒वता॑श्चे॒न्द्रि॒यं चा॒वा॒रु॒न्ध॑ ।

यदै॒न्द्रा॒ग्न-मे॒का॒द॒श॒क॒पा॒लं॑ नि॒र्व॒प॒ति॑ । दे॒वता॑श्चै॒व ते॒नै॒न्द्रि॒यं च॒
य॒ज॒मा॒नो॑ऽव रु॒न्धे॑ । ऋ॒ष॒भो॑ व॒ही द॒क्षि॒णा । 7 (10)

T.B.1.6.1.8

यद्-व॒ही । ते॒ना॒ग्ने॒यः॑ । यद् ऋ॒ष॒भः॑ । ते॒नै॒न्द्रः॑ स॒मृ॒द्ध्यै॑ ।

आ॒ग्ने॒य॒म॒ष्टा॒क॒पा॒लं॑ नि॒र्व॒प॒ति॑ । ऐ॒न्द्रं द॒धि॑ । यदा॒ग्ने॒यो भ॑वति ।

अ॒ग्नि॒र्वै य॒ज्ञ॒मु॒ख॒म् । य॒ज्ञ॒मु॒ख॒मे॒वर्द्धि॑ पु॒रा॒स्ता॒द्ध॒त्ते॑ ।

यदैन्द्रं दधि । 8 (10)

T.B.1.6.1.9

इन्द्रियमे॒वाव रुन्धे॑ । ऋष॑भो वही॑ दक्षि॑णा । यद्वही॑ । तेना॑ग्नेयः ।
यदृष॑भः । तेनै॒न्द्रः समृ॑द्ध्यै । यावती॑र्वे प्रजा॑ ओष॑धीना-महु॑ताना-
मा॒श्नन् । ताः परा॑ऽभवन् । आग्र॑यणं भवति हु॒ताद्या॑य ।

यज॑मानस्यापराभावाय । 9 (10)

T.B.1.6.1.10

दे॒वा वा ओष॑धीष्वाजिम॑युः । ता इन्द्रा॑ग्नी उद॑जयताम् ।
तावे॒तमैन्द्रा॑ग्नं द्वाद॑शकपालं निर॑वृणाताम् । यदैन्द्रा॑ग्नो भव॑त्युज्जित्यै ।
द्वाद॑शकपालो भवति । द्वाद॑श मा॒साः सम्॑वत्सरः ।
सम्॑वत्सरेणै॒वास्मा अन्न॑मवरुन्धे । वैश्व॑देवश्चरुर् भवति ।
वैश्व॑देवं वा अन्नम् । अन्नमे॒वास्मै स्व॑दयति । 10 (10)

T.B.1.6.1.11

प्रथ॑मजो वत्सो दक्षि॑णा समृ॑द्ध्यै । सौम्य॑ऽश्या॒माकं चरुं॑ निर्वपति ।
सोमो॑ वा अकृ॑ष्टपच्यस्य राजा । अकृ॑ष्टपच्यमे॒वास्मै स्व॑दयति ।
वासो॑ दक्षि॑णा । सौम्य॑ऽहि दे॒वतया॑ वासः समृ॑द्ध्यै ।

सर॑स्वत्यै॑ चरुं॑ निर्व॑पति । सर॑स्वते॑ चरुम् । मि॒थुनमे॑वाव॑ रुन्धे ।
मि॒थुनौ॑ गावौ॑ दक्षि॑णा समृ॑द्ध्यै () । एति॑ वा ए॒ष य॒ज्ञमु॒खादृ॑द्ध्यः॑ ।
यो॒ऽग्नेर्दे॑वता॒या एति॑ । अ॒ष्टावे॑तानि॒ हवी॑षि॒ भवन्ति॑ । अ॒ष्टाक्ष॑रा गाय॒त्री ।
गाय॑त्रो॒ऽग्निः । तेनै॑व य॒ज्ञमु॒खादृ॑द्ध्यः अ॒ग्नेर्दे॑वता॒यै नैति॑ । 11 (16)
(ई॒युर् – नि॒रव॑दयते – ऽङ्ग॒ष्ठाभ्यां॑ जुहो – त्यनु॑मतिर् – दे॒वता॑ –
निर्व॑पति – वही॑ दक्षि॑णा – यदै॑न्द्रं द – ध्यप॑राभावाय –
स्वद॑यति – गावौ॑ दक्षि॑णा समृ॑द्ध्यै षट्च) (A1)

1.6.2 अनुवाकं 2– चातुर्मास्ये वैश्वदेवहवींषि

T.B.1.6.2.1

वैश्व॑देवेन॒ वै प्र॒जाप॑तिः प्र॒जा असृ॑जत । ताः सृ॑ष्टा न प्रा॒जाय॑न्त ।
सो॒ऽग्नि॒रकाम॑यत । अ॒हमि॑माः प्र॒जन॑येयमिति॑ ।
स प्र॒जाप॑तये॒ शुच॑मदधात् । सो॒ऽशौ॑चत्–प्र॒जामि॑च्छमानः ।
तस्मा॑द्यं च प्र॒जा भु॑नक्ति॒ यं च॑ न । तावु॑भौ शौ॒चतः॑
प्र॒जामि॑च्छमानौ । तास्व॑ग्निमप्य॒ सृज॑त् । ता अ॒ग्निर॑ध्यैत् । 12 (10)

T.B.1.6.2.2

सोमो॑ रेतो॑ऽदधात् । स॒विता प्रा॑जनयत् । सर॑स्वती वाच॑मदधात् ।
 पू॒षा ऽपो॑षयत् । ते वा ए॒ते त्रिः॑ सम्॑व॒थ्सर॑स्य प्र॒युज्यन्ते॑ ।
 ये दे॒वाः पु॒ष्टिप॑तयः । सम्॑व॒थ्सरो॑ वै प्र॒जाप॑तिः ।
 सम्॑व॒थ्सरे॒णैवास्मै॑ प्र॒जाः प्रा॑जनयत् । ताः प्र॒जा जा॒ता म॒रुतो॑ घ्नन् ।
 अ॒स्मानपि॑ न प्रा॒युक्ष॑तेति । 13 (10)

T.B.1.6.2.3

स ए॒तं प्र॒जाप॑तिर्मा॒रुत॑ः स॒प्तक॑पाल-मप॒श्यत् । तं नि॑रवपत् ।
 ततो॑ वै प्र॒जाभ्यो॑ कल्प॒त । यन्मा॑रुतो॒ निरु॑प्यते॑ । य॒ज्ञस्य॑ क्लृ॒प्त्यै॑ ।
 प्र॒जाना॑-म॒घाता॑य । स॒प्तक॑पालो भवति । स॒प्तग॑णा वै म॒रुतः॑ ।
 ग॒णश॑ ए॒वास्मै॑ वि॒शं क॑ल्पयति । स प्र॒जाप॑ति-रशो॒चत् । 14 (10)

T.B.1.6.2.4

याः पूर्वाः॑ प्र॒जा अ॑सृक्षि । म॒रुत॑स्ता अ॒वधि॑षुः । कथ॑मप॒राः सृ॑जे॒येति॑ ।
 तस्य॑ शु॒ष्म आ॒ण्डं भू॒तं नि॑रवर्तत । तद्व्यु॑दहरत् । तद॑पोषयत् ।
 तत् प्रा॑जायत । आ॒ण्डस्य॑ वा ए॒तद् रू॒पम् । यदा॑मि॒क्षा॑ ।

यद्व्युद्धरति । 15 (10)

T.B.1.6.2.5

प्रजा एव तद्-यजमानः पोषयति । वैश्वदेव्यामिक्षा भवति ।
 वैश्वदेव्यो वै प्रजाः । प्रजा एवास्मै प्रजनयति । वाजिनमानयति ।
 प्रजास्वेव प्रजातासु रेतो दधाति । द्यावापृथिव्य एककपालो भवति ।
 प्रजा एव प्रजाता द्यावापृथिवीभ्या-मुभयतः परि गृह्णाति ।
 देवासुराः सम्यक्ता आसन् । सोऽग्निरब्रवीत् । 16 (10)

T.B.1.6.2.6

मामग्रे यजत । मया मुखेनासुरां जेष्यथेति । मां द्वितीयमिति
 सोमोऽब्रवीत् । मया राजा जेष्यथेति । मां तृतीयमिति सविता ।
 मया प्रसूता जेष्यथेति । मां चतुर्थीमिति सरस्वती ।
 इन्द्रियं वोऽहं धास्यामीति । मां पञ्चममिति पूषा ।
 मया प्रतिष्ठया जेष्यथेति । 17 (10)

T.B.1.6.2.7

तेऽग्निना मुखेनासुरानजयन् । सोमेन राजा । सवित्रा प्रसूताः ।
 सरस्वतीन्द्रिय-मदधात् । पूषा प्रतिष्ठा ऽऽसीत् । ततो वै देवा व्यजयन्त ।

यदे॒तानि॑ ह॒वी॒षि॑ निरु॒प्यन्ते॑ विजि॒त्यै॑ । नो॒त्तर॑वेदिमु॒प- व॑पति ।

प॒शवो॑ वा उत्तर॑वेदिः । अजा॒ता इ॒व ह्ये॒तर॒हि प॒शवः॑ () । 18 (10)

(ऐ॒द् - इ॒त्य - शो॒चद् - व्यु॒द्धर॑ - त्यब्र॒वीत् - प्र॒ति॒ष्ठया॑ जेष्य॒थे दृ॒
त्ये॒तर॒हि प॒शवः॑) (A2)

1.6.3 अनुवाकं 3 – वैश्वदेवपर्गतानि विश्वेषाङ्गानि

T.B.1.6.3.1

त्रि॒वृद्-ब॒र्हिर्-भ॑वति । मा॒ता पि॒ता पु॒त्रः । तदे॒व तन्-मि॑थुनम् ।

उ॒ल्बं ग॒र्भो ज॒रायु॑ । तदे॒व तं मि॑थुनम् । त्रे॒धा ब॒र्हिः सं॑नद्धं

भ॑वति । त्रय॑ इ॒मे लो॒काः । ए॒ष्वे॒व लो॒केषु॑ प्र॒ति ति॑ष्ठति ।

ए॒क॒धा पुनः॑ सं॑नद्धं भ॑वति । ए॒क इ॒व ह्ययं॑ लो॒कः । 19 (10)

T.B.1.6.3.2

अ॒स्मिन्ने॒व ते॒न लो॒के प्र॒ति ति॑ष्ठति । प्र॒सु॒वो भ॑वन्ति ।

प्र॒थम॑जामे॒व पु॒ष्टिम॑व रु॒न्धे । प्र॒थम॑जो व॒त्सो द॑क्षिणा॒ समृ॑द्ध्यै ।

पृ॒षदा॑ज्यं गृ॒ह्णाति॑ । प॒शवो॑ वै पृ॒षदा॑ज्यम् । प॒शूने॒वाव रु॑न्धे ।

पञ्च॑गृही॒तं भ॑वति । पा॒ङ्गा हि प॒शवः॑ । ब॒हुरू॒पं भ॑वति । 20 (10)

T.B.1.6.3.3

ब॒हुरू॒पा हि प॒शवः॑ स॒मृद्ध्यै॑ । अ॒ग्निं म॑न्थन्ति । अ॒ग्निमु॑खा वै
प्र॒जाप॑तिः प्र॒जा अ॑सृजत । यद॒ग्निं म॑न्थन्ति । अ॒ग्निमु॑खा ए॒व
तत् प्र॒जा य॑ज॒मानः॑ सृजते । न॒व प्र॑याजा इज्यन्ते । न॒वानू॑याजाः ।
अ॒ष्टौ ह॒वी ऽषि॑ । द्वा॒वाघा॑रौ । द्वा॒वाज्य॑भागौ । 21 (10)

T.B.1.6.3.4

त्रि॒॒श॒थ् संप॑द्यन्ते । त्रि॒॒श॒दक्ष॑रा वि॒राट् । अन्नं॑ वि॒राट् ।
वि॒राजै॑वान्नाद्य॒मव॑ रुन्धे । यज॑मानो वा ए॒क॒क॒पालः॑ ।
तेज॑ आ॒ज्यम् । यदे॑क॒क॒पाल॑ आ॒ज्यमा॑नयति । यज॑मानमे॒व तेज॑सा
स॒म॒र्धय॑ति । यज॑मानो वा ए॒क॒क॒पालः॑ । प॒शव॑ आ॒ज्यम् । 22 (10)

T.B.1.6.3.5

यदे॑क॒क॒पाल॑ आ॒ज्यमा॑नयति । यज॑मानमे॒व प॒शुभिः॑ स॒म॒र्धय॑ति ।
यद॒ल्प॑मा॒नये॑त् । अ॒ल्पा ए॒नं प॒शवो॑ भु॒ञ्जन्त॑ उप॒तिष्ठे॑रन् ।
यद्-ब॒ह्वान॑येत् । ब॒हव॑ ए॒नं प॒शवो॑ भु॒ञ्जन्त॑ उप॒तिष्ठे॑रन् ।
ब॒ह्वानी॑याविः पृ॒ष्ठं कुर्या॑त् । ब॒हव॑ ए॒वैनं॑ प॒शवो॑ भु॒ञ्जन्त॑ उप॒तिष्ठ॑न्ते ।
यज॑मानो वा ए॒क॒क॒पालः॑ । यदे॑क॒क॒पाल॑स्याव॒द्येत् । 23 (10)

T.B.1.6.3.6

यज॑मान॒स्याव॑द्येत् । उ॒द्वा मा॑द्येद्-यज॑मानः । प्र वा॑ मी॒येत॑ ।
 सकृ॑दे॒व हो॑तव्यः । सकृ॑दि॒व हि सु॑वर्गो लो॒कः । हु॒त्वाऽभि॑
 जु॒होति॑ । यज॑मानमे॒व सु॑वर्गं लो॒कं ग॑मयित्वा । ते॒जसा॑ सम॒र्धय॑ति ।
 यज॑मानो वा ए॒कक॑पालः । सु॒वर्गो लो॒क आ॑हवनीयः । 24 (10)

T.B.1.6.3.7

यदे॒कक॑पाल-मा॒हव॑नीये जु॒होति॑ । यज॑मानमे॒व सु॑वर्गं लो॒कं ग॑मयति ।
 यद्ध॑स्तेन जुहु॒यात् । सु॒वर्गा-ल्लो॒काद्-यज॑मान-मव॒विध्ये॑त् ।
 सु॒चा जु॒होति॑ । सु॒वर्गस्य॑ लो॒कस्य॑ सम॒ष्ट्यै । यत् प्रा॑ङ्पद्येत् ।
 दे॒वलोक॑म॒भि ज॑येत् । यद्-दक्षि॑णा पि॒तृलो॒कम् ।
 यत् प्र॒त्यक् । 25 (10)

T.B.1.6.3.8

रक्षा॑ऽसि य॒ज्ञं ह॑न्युः । यदु॒दङ् । मनु॑ष्यलो॒क-म॒भिज॑येत् । प्रति॑ष्ठितो
 हो॒तव्यः॑ । ए॒कक॑पालं वै प्रति॑तिष्ठन्तं द्यावापृ॑थिवी अनु॑ प्रति॑तिष्ठतः ।
 द्यावापृ॑थिवी ऋ॒तवः॑ । ऋ॒तून् य॒ज्ञः । य॒ज्ञं य॑जमानः । यज॑मानं प्र॒जाः ।

तस्मात्-प्रतिष्ठितो होतव्यः । 26 (10)

T.B.1.6.3.9

वाजिनो यजति । अग्निर्वायुः सूर्यः । ते वै वाजिनः ।
 तानेव तद्-यजति । अथो खल्वाहुः । छन्दांसि वै वाजिन इति ।
 तान्येव तद्-यजति । ऋक्सामे वा इन्द्रस्य हरी सोमपानौ ।
 तयोः परिधय आधानम् । वाजिनं भागधेयम् । 27 (10)

T.B.1.6.3.10

यदप्रहत्य परिधीञ्जुह्यात् । अन्तराधानाभ्यां घासं प्रयच्छेत् ।
 प्रहत्य परिधीञ्जुहोति । निराधानाभ्यामेव घासं प्रयच्छति ।
 बर्हिषि विषिञ्चन्वाजिन-मानयति । प्रजा वै बर्हिः । रेतो वाजिनम् ।
 प्रजास्वेव रेतो दधाति । समुपहूय भक्षयन्ति । एतथ् सोमपीथा ह्येते () ।
 अथो आत्मन्नेव रेतो दधते । यजमान उत्तमो भक्षयति ।
 पशवो वै वाजिनम् । यजमान एव पशून् प्रतिष्ठापयन्ति । 28 (14)

(लो॒को - बहु॑रूपं भ॒व - त्याज्य॑भागौ - प॒शव॑ आज्य॑ - म॒वद्ये॑ -
दा॒हव॑नीयः - प्र॒त्यक् - तस्मा॑त् प्रति॑ष्ठितो हो॒तव्यो॑ -
भा॒गधे॑य - मे॒ते च॒त्वारि॑ च) (A3)

1.6.4 अनुवाकं 4 - वरुणप्रघासाः

T.B.1.6.4.1

प्र॒जाप॑तिः स॒विता॑ भू॒त्वा प्र॒जा अ॑सृजत । ता ए॒नम॑त्यमन्यन्त ।
ता अ॒स्माद॑पाक्रामन् । ता वरु॑णो भू॒त्वा प्र॒जा वरु॑णेनाग्राहयत् ।
ताः प्र॒जा वरु॑णगृहीताः । प्र॒जाप॑तिं पुन॒रुपा॑धावन्नाथ-मिच्छ॑मानाः ।
स ए॒तान्-प्र॒जाप॑तिर्-वरु॑ण प्रघा॒सान॑पश्यत् । तान्नि॑रवपत् ।
तैर्वै॑ स प्र॒जा वरु॑ण-पा॒शाद॑मुञ्चत् ।
यद्-वरु॑ण-प्रघा॒सा नि॒रुप्य॑न्ते ॥ 29 (10)

T.B.1.6.4.2

प्र॒जाना॑मवरु॑णग्राहाय । तासां॑ दक्षि॑णो बा॒हुर् न्यक्न॑ आसीत् ।
स॒व्यः प्र॑सृतः । स ए॒तां द्वि॑तीयां दक्षि॑णतो वे॒दिमु॑दहन् ।
ततो॑ वै स प्र॒जानां॑ दक्षि॑णं बा॒हुं प्रा॑सारयत् ।

यद्-द्वितीयां दक्षिणतो वेदिमुद्धन्ति । प्रजानामेव तद्-यजमानो दक्षिणं
बाहुं प्रसारयति । तस्माच्चातुर्मास्ययाज्यमुष्मिन् लोक उभयाबाहुः ।
यज्ञाभिजित७ ह्यस्य । पृथमान्नाद्-वेदी असंभिन्ने भवतः । 30 (10)

T.B.1.6.4.3

तस्मात्-पृथमान्नं व्यसौ । उत्तरस्यां वेद्यामुत्तरवेदिमुप वपति ।
पशवो वा उत्तरवेदिः । पशूनेवाव रुन्धे । अथो यज्ञपरुषोऽनन्तरित्यै ।
एतद्-ब्राह्मणान्येव पञ्च हवीषि । अथैष ऐन्द्राग्नो भवति ।
प्राणापानौ वा एतौ देवानाम् । यदिन्द्राग्नी ।
यदैन्द्राग्नो भवति । 31 (10)

T.B.1.6.4.4

प्राणापानावेवाव रुन्धे । ओजो बलं वा एतौ देवानाम् । यदिन्द्राग्नी ।
यदैन्द्राग्नो भवति । ओजो बलमेवाव रुन्धे । मारुत्यामिक्षा भवति ।
वारुण्यामिक्षा । मेषी च मेषश्च भवतः । मिथुना एव प्रजा
वरुणपाशान्-मुञ्चति । लोमशौ भवतो मेध्यत्वाय । 32 (10)

T.B.1.6.4.5

शमीपर्णान्युप॑ वपति॑ । घासमे॑वाभ्यामपि॑ यच्छति॑ । प्रजापतिमन्नाद्यं॑
नोपान॑मत् । स एतेन॑ शते॒ध्मेन॑ हविषा॑ ऽन्नाद्यम॑-वारुन्ध॑ ।
यत् परः॑ शतानि॑ शमीपर्णानि॑ भवन्ति॑ । अन्नाद्यस्याव॑-रुद्ध्यै॑ ।
सौम्यानि॑ वै करीराणि॑ । सौम्या॑ खलु॒ वा आहुति॑र् दिवो॑ वृष्टिं॑ च्यावयति॑ ।
यत्-करीराणि॑ भवन्ति॑ । सौम्ययै॑वाहुत्या॑ दिवो॑ वृष्टिमव॑ रुन्धे () ।
काय॑ एक॒कपालो॑ भवति॑ । प्रजानां॑ क॒त्वाय॑ । प्रति॒पूरुषं॑ करम्भ॑
पात्राणि॑ भवन्ति॑ । जाता॑ एव प्रजा॑ वरुणपाशान्-मुञ्चति॑ ।
एक॒-मतिरिक्त॑म् । जनिष्य॑माणा एव प्रजा॑ वरुणपाशान्-मुञ्चति॑ । 33 (16)
(निरुप्यन्ते॑ - भवतो॑ - भवति॑ - मेध्यत्वाय॑ - रुन्धे॑ षट्च॑) (A4)

1.6.5 अनुवाकं 5 - तच्छेषः

T.B.1.6.5.1

उत्तरस्यां॑ वैद्याम॒न्यानि॑ हवी॒र्षि साद॑यति । दक्षिणायां॑ मारुतीम् ।
अप॒धुरमे॑वैना॑ युनक्ति॑ । अथो॒ ओज॑ ए॒वासाम॑वहरति॑ । तस्माद्-ब्रह्मणश्च॑
क्षत्राच्च॑ विशो॑ऽन्यतो॑ऽपक्र॑मिणीः । मारुत्या॑ पूर्॒वया॑ प्रचरति॑ ।

अ॒नृत॑मे॒वाव॑ यज॑ते । वा॒रु॒ण्यो॒त्तर॑या । अ॒न्त॒त ए॒व व॑रु॒णम॑व॒-यज॑ते ।

यदे॒वाध्व॑र्युः क॒रोति॑ । 34 (10)

T.B.1.6.5.2

तत् प्र॒तिप्र॑स्था॒ता क॒रोति॑ । तस्मा॑द्-यच्छे॒यान्-क॒रोति॑ ।

तत् पा॒पी॒यान्-क॒रोति॑ । प॒त्नीं वा॑च॒यति॑ । मे॒ध्यामे॑वै॒नां क॒रोति॑ ।

अथो॑ तप॒ ए॒वैना॑मुप॒ नय॑ति । यज्जा॒रꣳ स॒न्तं न॑ प्र॒ब्रू॒यात् ।

प्रि॒यं ज्ञा॒तिꣳ रु॒न्ध्यात् । अ॒सौ मे॑ जा॒र इति॑ नि॒र्दि॒शेत् ।

नि॒र्दि॒श्यै॒वैनं॑ व॒रु॒णपा॑शेन॒ ग्राह॑यति । 35 (10)

T.B.1.6.5.3

प्र॒घास्या॑न् ह॒वाम॑ह इति॒ प॒त्नी-मु॒दान॑यति । अ॒ह्वतै॑वै॒नाम् ।

यत्-प॒त्नी पु॒रोनु॑वा॒क्याम॑नु ब्रू॒यात् । निर्वी॑र्यो॒ यज॑मानः स्यात् ।

यज॑मा॒नो ऽन्वा॑ह । आ॒त्म॒न्ने॒व वी॑र्यं॒ धत्ते॑ । उ॒भौ या॑ज्याꣳ स॒वीर्य॑त्वाय॒ ।

यद्ग्रा॑मे॒ यद॑रण्य॒ इत्या॑ह । यथो॒दित॑मे॒व व॑रु॒णम॑व॒ यज॑ते ।

यज॑मा॒नदे॒वत्यो॑ वा आ॒हव॑नीयः । 36 (10)

T.B.1.6.5.4

भ्रा॒तृ॒व्य॒ दे॒व॒त्यो॒ दक्षि॑णः । यदा॑ह॒वनी॑ये जुहु॒यात् । यज॑मानं
 व॒रुण॑पा॒शेन॑ ग्राहयेत् । दक्षि॑णे ऽ॒ग्नौ जु॑होति । भ्रा॒तृ॒व्यमे॒व
 व॒रुण॑पा॒शेन॑ ग्राहयति । शूर्पे॑ण जुहोति । अ॒न्यमे॒व व॒रुण॑मवयजते ।
 शी॒र्ष॒न्न॒धि नि॒धाय॑ जुहोति । शी॒र्ष॒त ए॒व व॒रुण॑मव यजते ।
 प्र॒त्यङ्ति॑ष्ठञ्जुहोति । 37 (10)

T.B.1.6.5.5

प्र॒त्यङ्गै॒व व॒रुण॑पा॒शान्-नि॒र्मु॒च्यते॑ । अ॒क्र॒न्क॒र्म क॒र्मकृ॑त इत्याह ।
 दे॒वानृ॑णं निरवदाय । अ॒नृ॒णा गृ॒हानु॑प-प्रेतेति वावै॒तदा॑ह ।
 व॒रुण॑ गृहीतं वा ए॒तद्-य॒ज्ञस्य॑ । यद्-य॒जुषा॑ गृही॒तस्या॑तिरिच्यते ।
 तुषा॑श्च निष्का॒सश्च॑ । तुषै॑श्च निष्का॒सेन॑ चावभृ॒थम॑वैति ।
 व॒रुण॑-गृही॒तेनै॒व व॒रुण॑मवयजते । अ॒पोऽव॑भृ॒थम॑वैति । 38 (10)

T.B.1.6.5.6

अ॒प्सु वै व॒रुणः॑ । सा॒क्षादे॒व व॒रुण॑मव यजते । प्र॒तियु॑तो व॒रुण॑स्य
 पा॒श इत्या॑ह । व॒रुण॑पा॒शादे॒व नि॒र्मु॒च्यते॑ । अ॒प्र॒तीक्ष॑-मायन्ति ।
 व॒रुण॑स्यान्त॒र्हि॒त्यै । ए॒धोऽस्ये॑धिषीमहीत्याह ।

स॒मि॒धै॒वाग्निं॑ न॒मस्य॑न्त॒ उपा॑यन्ति । ते॒जो॑ऽसि ते॒जो॑ म॒यि धे॑हीत्याह ।
ते॒ज ए॒वात्म॑न्धत्ते () । 39 (10)

(क॒रोति॑ – ग्रा॒हय॑ – त्या॒हव॑नीय – स्तिष्ठ॑ञ्जुहो – त्यपो॑ऽवभृ॒थम॑वैति –
धत्ते) (A5)

1.6.6 अनुवाकं 6 – साकमेधाः

T.B.1.6.6.1

दे॒वा॒सु॒राः स॒म्य॑न्ता आसन् । सो॒ऽग्नि॑रब्रवीत् । म॒मे॒य-म॒नी॒क॒वती॑
त॒नूः । तां प्री॑णीत । अथा॒सु॒रा॒नभि॑ भ॒विष्य॑थेति ।
ते दे॒वा अ॒ग्नये॑ऽनी॒क॒वते॑ पु॒रोडा॑शम॒ष्टाक॑पालं॒ निर॑वपन् ।
सो॒ऽग्नि॑रनी॒क॒वान्थ् स्वे॒न भा॒गधे॑ये॒न प्री॑तः । च॒तु॒र्धा ऽनी॒का-न्य॑जनयत ।
ततो॑ दे॒वा अ॒भव॑न् । परा॑ ऽसु॒राः । 40 (10)

T.B.1.6.6.2

यद॒ग्नये॑ऽनी॒क॒वते॑ पु॒रोडा॑शम॒ष्टाक॑पालं॒ निर्व॑पति । अ॒ग्नि॒मे॒वा॒नी॒क॒वन्त॑ ७
स्वे॒न भा॒गधे॑ये॒न प्री॑णाति । सो॒ऽग्नि॑रनी॒क॒वान्थ् स्वे॒न भा॒गधे॑ये॒न प्री॑तः ।
च॒तु॒र्धा ऽनी॒का॒नि ज॑नयते । अ॒सौ वा आ॑दि॒त्योऽग्नि॑-रनी॒क॒वान् ।
तस्य॑ र॒श्मयो॑ऽनी॒का॒नि । सा॒कꣳ सूर्ये॑णो॒द्यता॑ निर्वपति ।

साक्षादे॒वास्मा॒ अनी॑कानि॒ जन॑यति । तेऽसु॑राः पराजिता॒ यन्तः॑ ।

द्यावा॑पृथि॒वी उ॒पाश्र॑यन् । 41 (10)

T.B.1.6.6.3

ते दे॒वा म॒रुद्भ्यः॑ सा॒न्तप॑ने॒भ्यश्च॑रुं नि॒रव॑पन् । तां द्यावा॑पृथि॒वीभ्या॑-

मेवो॑भयतः॒ सम॑तपन् । यन्म॒रुद्भ्यः॑ सा॒न्तप॑ने॒भ्यश्च॑रुं नि॒र्वप॑ति ।

द्यावा॑पृथि॒वीभ्या॑मे॒व तदु॑भयतो॒ यज॑मानो॒ भ्रातृ॑व्यान्थ् संत॑पति ।

म॒ध्यन्दि॑ने नि॒र्वप॑ति । तर्हि॒ हि तेऽक्षि॑ण्णं त॑पति । च॒रुर्भ॑वति ।

सर्व॑त ए॒वैनान्थ्॑ संत॑पति । ते दे॒वाः श्रो॑ विज॒यिनः॑ सन्तः॑ ।

सर्वा॑सां दु॒ग्धे गृ॑हमे॒धीयं॑ च॒रुं नि॒रव॑पन् । 42 (10)

T.B.1.6.6.4

आ॒शि॒ता ए॒वाद्यो॑पव॒साम॑ । कस्य॑ वाऽहे॒दम् । कस्य॑ वा श्रो॒ भवि॑तेति ।

स शृ॒तोऽभ॑वत् । तस्या॑हु॒तस्य॑ ना॒श्नन् । न हि॑ दे॒वा अ॑हु॒तस्या॑श्नन्ति ।

तेऽब्रु॑वन् । कस्मा॑ इ॒मं ह्यो॑ष्याम॒ इति॑ । म॒रुद्भ्यो॑ गृ॒हमे॒धिभ्य॑ इत्य॑ब्रुवन् ।

तं म॒रुद्भ्यो॑ गृ॒हमे॒धिभ्यो॑ऽजु॒हवुः॑ । 43 (10)

T.B.1.6.6.5

ततो॑ दे॒वा अ॒भवन् । परा॑ऽसुराः । यस्यै॒वं वि॒दुषो॑ मरुद्भ्यो॑
गृ॒हमे॒धिभ्यो॑ गृ॒हे जु॒ह्वति॑ । भव॒त्यात्म॑ना । परा॑ऽस्य भ्रातृ॒व्यो भव॑ति ।
यद्वै य॒ज्ञस्य॑ पा॒कत्रा॑ क्रियते॑ । प॒शव्यं॑ तत् । पा॒कत्रा॑ वा ए॒तत्क्रिय॑ते ।
यन्ने॒ध्माब॑र्हिर्-भव॑ति । न सा॒मिधे॒नी-र॒न्वाह॑ । 44 (10)

T.B.1.6.6.6

न प्र॒याजा॑ इ॒ज्यन्ते॑ । नानू॒याजाः॑ । य ए॒वं वे॒द । प॒शुमान्॑ भव॑ति ।
आज्य॑भा॒गौ यज॑ति । य॒ज्ञस्यै॒व चक्षु॑षी॒ नान्तरे॑ति । मरु॒तो गृ॒हमे॒धि॒नो
यज॑ति । भा॒गधे॒ये-नै॒वैना॒न्थ-स॑म॒र्धय॑ति । अ॒ग्नि॒ऽस्वि॑ष्ट॒कृतं॑ य॒जति॑
प्रति॑ष्ठित्यै॒ । इ॒डान्तो॑ भव॑ति () । प॒शवो॑ वा इ॒डा । प॒शुष्वे॒वोप॑रि॒ष्ठात्
प्रति॑ तिष्ठति । 45 (12) (अ॒सुरा॑ - अ॒श्रय॑न् - गृ॒हमे॒धीयं॑ च॒रुं नि॒रव॑पन्
- न॒जुह॑वु - र॒न्वा - हे॒डान्तो॑ भव॑ति द्वे च) (A6)

1.6.7 अनुवाकं 7 – तच्छेषः

T.B.1.6.7.1

यत्प॒त्नी गृ॒हमे॒धीय॑-स्या॒श्नीया॑त् । गृ॒हमे॒ध्ये॒व स्या॑त् । वि त्व॑स्य य॒ज्ञ
ऋ॒ध्ये॒त । यन्ना॑श्नीयात् । अ॒गृहमे॒धी स्या॑त् । ना॒स्य य॒ज्ञो व्यृ॑द्ध्ये॒त ।

प्रति॑वेशं॑ प॒चो॒युः । तस्या॒॑श्नी॒यात् । गृ॒हमे॒॑ध्ये॒व भ॑वति ।

नास्य॑ य॒ज्ञो व्य॑ध्यते । 46 (10)

T.B.1.6.7.2

ते दे॒वा गृ॒हमे॒॑धीये॑नेष्ट्वा । आ॒शि॒ता अ॑भवन् । आ॒ज्ज॒ताभ्य॑ज्जत ।

अनु॑ व॒थ्सा-न॑वा॒सय॑न् । तेभ्यो॑ऽसु॒राः क्षु॑धं प्रा॒हि॒ण्वन् ।

सा दे॒वेषु॑ लो॒कम॑वि॒त्त्वा । अ॒सु॒रान्-पु॑न॒रग॑च्छत् । गृ॒हमे॒॑धीये॑नेष्ट्वा ।

आ॒शि॒ता भ॑वन्ति । आ॒ज्ज॒तेऽभ्य॑ज्जते । 47 (10)

T.B.1.6.7.3

अनु॑ व॒थ्सान् वा॑सयन्ति । भ्रा॒तृव्या॑यै॒व तद्-य॑ज॒मानः॑ क्षु॑धं प्रा॒हि॒णोति॑ ।

ते दे॒वा गृ॒हमे॒॑धीये॑नेष्ट्वा । इन्द्रा॑य निष्का॒सं न्य॑दधुः । अ॒स्माने॑व

श्च इन्द्रो॑ नि॒हित॑भा॒ग उ॑पावर्ति॒तेति॑ । तानिन्द्रो॑ नि॒हित॑भा॒ग उ॑पावर्तत ।

गृ॒हमे॒॑धीये॑नेष्ट्वा । इन्द्रा॑य निष्का॒सं नि॑दध्यात् । इन्द्र॑ ए॒वैनं॑

नि॒हित॑भा॒ग उ॑पावर्तते । गा॒र्हप॑त्ये जुहोति । 48 (10)

T.B.1.6.7.4

भा॒गधे॑ये॒नेवैनं॑ सम॒र्धय॑ति । ऋ॒षभ॑मा॒ह्वय॑ति । व॒षट्का॑र ए॒वास्य॑ सः ।

अथो॑ इन्द्रि॒यमे॑व तद्-वी॒र्यं॑ य॒जमा॑नो भ्रा॒तृव्य॑स्य वृ॒द्धे ।

इन्द्रो॑ वृ॒त्रं॑ ह॒त्वा । परां॑ पराव॒त-म॑गच्छत् । अपा॑राधमि॒ति म॑न्यमानः ।
सोऽब्र॑वीत् । क इ॒दं वे॑दिष्यतीति । तेऽब्रु॑वन् म॒रुतो॑ वरं॑ वृ॒णाम॑है । 49 (10)

T.B.1.6.7.5

अथ॑ वयं॑ वे॒दाम॑ । अ॒स्मभ्य॑मे॒व प्र॑थमं॑ ह॒विर्नि॑रुप्याता इति॑ ।
त ए॒नम॑ध्य-क्रीडन् । तत्क्री॒डिनां॑ क्रीडित्वम् । यन् म॒रुद्भ्यः॑
क्रीडि॑भ्यः प्रथमं॑ ह॒विर्नि॑रुप्यते विजित्यै । साकं॑ सूर्ये॑णोद्यता निर्वपति ।
एत॑स्मिन् वै लो॒क इन्द्रो॑ वृ॒त्रम॑हन्त् समृ॒द्ध्यै॑ ।
एतद्-ब्रा॑ह्मणान्ये॒व प॑ञ्च ह॒वींषि॑ । एतद्-ब्रा॑ह्मण ऐन्द्रा॒ग्नः ।
अथै॑ष ऐन्द्रश्चरुर्-भवति () । 50 (10)

T.B.1.6.7.6

उ॒द्धारं॑ वा ए॒तमिन्द्र॑ उदहरत । वृ॒त्रं॑ ह॒त्वा । अ॒न्यासु॑ दे॒वता॑स्वधि ।
यदेष॑ ऐन्द्र-श्चरुर् भवति । उ॒द्धार॑मे॒व तं य॑जमान उद्धरते ।
अ॒न्यासु॑ प्र॒जास्व॑धि । वैश्च॑कर्मण एक॑कपालो भवति ।
विश्वा॑न्ये॒व तेन॑ कर्माणि॒ यज॑मानो ऽवरुन्धे । 51 (8)

(ऋ॒द्ध्य॑ते-भ्य॑ञ्जते-जु॒होति॑-वृ॒णाम॑है-भव॒त्य- +ष्टौ॑ च) (A7)

1.6.8 अनुवाकं 8 – पितृयज्ञः

T.B.1.6.8.1

वै॒श्वदे॒वेन॑ वै प्र॒जाप॑तिः प्र॒जा अ॑सृजत । ता वरुण॑-प्र॒घासै॑र्-
वरुण॑पाशादमुञ्चत् । साक॑मेधैः प्रत्य॑स्थापयत् । त्र्यम्ब॑कै रुद्रं
नि॒रवा॑दयत । पि॒तृय॑ज्ञेन सु॒वर्गं लो॑कमगमयत् । यद्-वै॒श्वदे॒वेन॑ यज॑ते ।
प्र॒जा ए॒व तद्-य॑जमानः सृज॑ते । ता वरुण॑-प्र॒घासै॑र्-वरुण॑पाशान्-
मुञ्च॑ति । साक॑मेधैः प्र॒तिष्ठा॑पयति । त्र्यम्ब॑कैरुद्रं नि॒रव॑दयते । 52 (10)

T.B.1.6.8.2

पि॒तृय॑ज्ञेन सु॒वर्गं लो॑कं गमयति । दक्षि॑णतः प्रा॒चीना॑वीती निर्व॑पति ।
दक्षि॑णावृद्धिं पि॒तृणा॑म् । अना॑दृत्य तत् । उत्त॑रत ए॒वोप॑वीय निर्व॑पेत् ।
उभ॑ये हि दे॒वाश्च पि॒तर॑श्चेज्यन्ते । अथो॑ यदे॒व दक्षि॑णार्धेऽधि श्र॑यति ।
तेन॑ दक्षि॑णावृत् । सो॒माय॑ पि॒तृम॑ते पु॒रोडा॑शं षट्क॑पालं निर्व॑पति ।
सम्॑व॒त्सरो॑ वै सोमः॑ पि॒तृमा॑न् । 53 (10)

T.B.1.6.8.3

सम्॑व॒त्सर॑मे॒व प्री॑णाति । पि॒तृभ्यो॑ बर्हि॒षद्भ्यो॑ धा॒नाः ।
मा॒सा वै पि॒तरो॑ बर्हि॒षदः॑ । मा॒साने॑व प्री॑णाति ।

यस्मिन् वा ऋतौ पुरुषः प्रमीयते । सोऽस्यमुष्मिन् लोके भवति ।

बहुरूपा धाना भवन्ति । अहोरात्राणां-मभिजित्यै ।

पितृभ्योऽग्निष्वात्तेभ्यो मन्थम् । अर्धमासा वै पितरोऽग्निष्वाताः । 54 (10)

T.B.1.6.8.4

अर्धमासानेव प्रीणाति । अभिवान्यायै दुग्धे भवति । सा हि

पितृदेवत्यं दुहे । यत् पूर्णम् । तन् मनुष्याणाम् । उपर्यर्धो देवानाम् ।

अर्धः पितृणाम् । अर्ध उपमन्थति । अर्धो हि पितृणाम् ।

एकयोपमन्थति । 55 (10)

T.B.1.6.8.5

एका हि पितृणाम् । दक्षिणोपमन्थति । दक्षिणा वृद्धि पितृणाम् ।

अनारभ्योपमन्थति । तद्धि पितृन्-गच्छति । इमां दिशं वेदिमुद्धन्ति ।

उभये हि देवाश्च पितरश्चेज्यन्ते । चतुः सक्तिर्भवति ।

सर्वा ह्यनु दिशः पितरः । अखाता भवति । 56 (10)

T.B.1.6.8.6

खाता हि देवानाम् । मद्ध्यतोऽग्निराधीयते । अन्ततो हि देवानां-माधी

यते । वर्षीयानिध्म इध्माद्-भवति व्यावृत्त्यै ।

परि॑ श्रयति । अन्तर्॑.हि॒तो हि पि॒तृलो॒को म॒नुष्य॑लो॒कात् । यत्-प॑रुषि
दि॒नम् । तद्-दे॒वाना॑म् । यदन्तरा॑ । तन्-म॒नुष्या॑णाम् । 57 (10)

T.B.1.6.8.7

यथ्॑ स॒मूल॑म् । तत् पि॒तृणा॑म् । स॒मूलं॑ ब॒र्हिर्-भ॑वति॒ व्यावृ॑त्त्यै ।
दक्षि॑णा स्तृ॒णाति॑ । दक्षि॑णा वृ॒द्धि पि॒तृणा॑म् । त्रिः॑ पर्येति ।
तृती॑ये वा इ॒तो लो॒के पि॒तरः॑ । ताने॒व प्री॑णाति । त्रिः पुनः॑ पर्येति ।
षट्॑थ्संपद्यन्ते । 58 (10)

T.B.1.6.8.8

षड्॑वा ऋ॒तवः॑ । ऋ॒तूने॒व प्री॑णाति । यत् प्र॑स्तरं॒ यजु॑षा गृ॒ह्णी॑यात् ।
प्र॒मायु॑को यज॑मानः स्यात् । यन्न॑ गृ॒ह्णी॑यात् । अ॒नाय॑तनः स्यात् ।
तूष्णी॑मे॒व न्य॑स्येत् । न प्र॒मायु॑को भ॑वति । न॒नाय॑तनः ।
यत्-त्रीन्-प॑रि॒धीन् परि॑दध्यात् । 59 (10)

T.B.1.6.8.9

मृ॒त्युना॑ यज॑मानं॒ परि॑ गृ॒ह्णी॑यात् । यन्न॑ परि॒-दध्या॑त् ।
रक्षा॑ँसि य॒ज्ञं ह॑न्युः । द्वौ परि॒धी परि॑दधाति । रक्ष॑सा-म॒पह॑त्यै ।
अथो॑ मृ॒त्योरे॒व यज॑मान-मु॒त्सृ॑जति । यत् त्री॑णि त्री॒णि ह॒वींष्यु॑दा॒हरे॑युः ।

त्रयस्त्रय एषां साकं प्रमीयेरन् । एकैक-मनूचीना-न्युदाहरन्ति ।

एकैक एवैषामन्वञ्चः प्रमीयते () । कशिपु कशिपव्याय ।

उपबर्हण-मुपबर्हण्याय । आज्जन-माज्जन्याय ।

अभ्यञ्जन-मभ्यञ्जन्याय । यथाभागमेवैनान् प्रीणाति । 60 (15)

(निरवदयते - पितृमा - नग्निष्वात्ता - एकयोप मन्थ - त्यखाता

भवति - मनुष्याणां - पद्यन्ते - परिदध्यान् - मीयते पञ्च च) (A8)

1.6.9 अनुवाकं 9 – तच्छेषः

T.B.1.6.9.1

अग्नये देवेभ्यः पितृभ्यः समिध्यमानायानुब्रूहीत्याह ।

उभये हि देवाश्च पितरश्चेज्यन्ते । एकामन्वाह । एका हि पितृणाम् ।

त्रिरन्वाह । त्रिर्हि देवानाम् । आधारावाधारयति । यज्ञ परुषोरनन्तरित्यै ।

नार्षेयं वृणीते । न होतारम् । 61 (10)

T.B.1.6.9.2

यदार्षेयं वृणीत । यद्धोतारम् । प्रमायुको यजमानः स्यात् ।

प्रमायुको होता । तस्मान्न वृणीते । यजमानस्य होतुर्-गोपीथाय ।

अपबर्हिषः प्रयाजान्-यजति । प्रजा वै बर्हिः ।

प्र॒जा ए॒व मृ॒त्यो॒रु॒थ्सृ॒जति॑ । आ॒ज्य॒भा॒गौ य॒जति॑ । 62 (10)

T.B.1.6.9.3

य॒ज्ञस्यै॒व चक्षु॑षी॒ नान्त॑रेति॑ । प्रा॒ची॒ना॒वी॒ती सोमं॑ य॒जति॑ ।

पि॒तृदे॒वत्या॑ हि । ए॒षा ऽऽहु॑तीः । पञ्च॑ कृ॒त्वोऽव॑द्यति । पञ्च॑ ह्ये॒ता दे॒वताः॑ ।

द्वे पु॒रोऽनु॑वा॒क्ये॑ । या॒ज्या दे॒वता॑ वषट्कारः । ता ए॒व प्री॑णाति ।

सन्त॑तम॒व द्य॑ति । 63 (10)

T.B.1.6.9.4

ऋ॒तूनां॑ सं॒तत्यै॑ । प्रै॒वैभ्यः॑ पू॒र्वया॑ पु॒रोऽनु॑वा॒क्यया॑ ऽऽह ।

प्र॒णय॑ति द्वि॒तीयया॑ । ग॒मय॑ति या॒ज्यया॑ । तृ॒तीये॑ वा इ॒तो लो॒के पि॒तरः॑ ।

अ॒ह ए॒वैना॑न् पू॒र्वया॑ पु॒रोऽनु॑वा॒क्यया॑ ऽत्या॒नय॑ति । रा॒त्रियै॑ द्वि॒तीयया॑ ।

ऐ॒वैना॑न् या॒ज्यया॑ ग॒मय॑ति । दक्षि॑णतोऽव॒दाय॑ ।

उद॑ङ्मु॒ति क्रा॑मति॒ व्यावृ॑त्त्यै । 64 (10)

T.B.1.6.9.5

आ स्व॑धेत्या-श्राव॑यति । अस्तु॑ स्व॑धेति॒ प्रत्या॑श्राव॑यति ।

स्व॒धा नम॑ इति॒ वषट्क॑रोति । स्व॒धाका॑रो हि पि॒तृणा॑म् ।

सोम॑म॒ग्रे य॒जति॑ । सोम॑ प्र॒याजा॑ हि पि॒तरः॑ । सोमं॑ पि॒तृम॑न्तं य॒जति॑ ।

स॒म्॒व॒त्स॒रो वै सो॒मः॑ पि॒तृ॒मा॒न् । स॒म्॒व॒त्स॒रमे॒व तद्-य॑जति ।

पि॒तृ॒न्-ब॒र्हि॒षदो॑ यजति । 65 (10)

T.B.1.6.9.6

ये वै य॒ज्वानः॑ । ते पि॒तरो॑ ब॒र्हि॒षदः॑ । ता॒ने॒व तद्-य॑जति ।

पि॒तृ॒न्ग्नि॒ष्वात्ता॑न् यजति । ये वा अ॒य॒ज्वानो॑ गृ॒हमे॒धिनः॑ ।

ते पि॒तरो॑ऽग्नि॒ष्वात्ताः॑ । ता॒ने॒व तद्-य॑जति । अ॒ग्निं क॑व्य॒वाह॑नं य॒जति॑ ।

य ए॒व पि॒तृ॒णाम॒ग्निः॑ । तमे॒व तद्-य॑जति । 66 (10)

T.B.1.6.9.7

अथो॑ यथाऽग्नि॒ः स्वि॑ष्ट॒कृतं॑ य॒जति॑ । ता॒दृ॒गे॒व तत् । ए॒तत्ते॑ तत् ये

च त्वा॒मन्वि॑ति ति॒सृषु॑ स्र॒क्तीषु॑ नि॒दधा॑ति । तस्मा॒दा तृ॒तीया॑त् पु॒रुषा॑न्ना॒म

न गृ॑ह्णन्ति । ए॒ता॒वन्तो॑ ही॒ज्यन्ते॑ । अत्र॑ पि॒तरो॑ यथाभा॒गं

म॒न्दध्व॑मित्या॒ह । ह्री॒का हि पि॒तरः॑ । उ॒द॒ञ्चो॑ निष्क्रामन्ति ।

ए॒षा वै म॑नु॒ष्याणां॑ दिक् । स्वा॒मे॒व तद्-दि॒शम॑नु निष्क्रामन्ति । 67 (10)

T.B.1.6.9.8

आ॒ह॒वनी॑य-मु॒पति॑ष्ठन्ते । न्ये॒वास्मै॑ तद्ध॒नुव॑ते । यथ्स॒त्याह॑वनी॒ये ।

अथान्यत्र॑ चरन्ति । आ॒त॒मि॒तो॒रुप॑तिष्ठन्ते । अ॒ग्निमे॒वोप॑द्र॒ष्टारं॑ कृ॒त्वा ।

पितॄन्-निरवदयन्ते । अन्तं वा एते प्राणानां गच्छन्ति ।

य आतमितोरुपतिष्ठन्ते । सुसन्दृशं त्वा वयमित्याह । 68 (10)

T.B.1.6.9.9

प्राणो वै सुसन्दृक् । प्राणमेवात्मन्-दधते । योजा न्विन्द्र ते हरी इत्याह ।

प्राणमेव पुनरयुङ्क्त । अक्षन्नमीमदन्त हीति गार्हपत्य-मुपतिष्ठन्ते ।

अक्षन्नमीमदन्ताथ त्वोपतिष्ठामह इति वावैतदाह । अमीमदन्त पितरः

सोम्या इत्यभि प्रपद्यन्ते । अमीमदन्त पितरोऽथ त्वाऽभि प्रपद्यामह

इति वावैतदाह । अपः परिषिञ्चति । मार्जयत्येवैनान् । 69 (10)

T.B.1.6.9.10

अथो तर्पयत्येव । तृप्यति प्रजया पशुभिः । य एवं वेद ।

अप बर्हिषावनूयाजौ यजति । प्रजा वै बर्हिः ।

प्रजा एव मृत्योरुत्सृजति । चतुरः प्रयाजान् यजति । द्वावनूयाजौ ।

षट्थसंपद्यन्ते । षड्वा ऋतवः () । 70 (10)

T.B.1.6.9.11

ऋतूनेव प्रीणाति । न पत्न्यन्वास्ते । न सम्याजयन्ति । यत्पत्न्यन्वासीत ।

यत्सम्याजयेयुः । प्रमायुका स्यात् । तस्मान्नान्वास्ते ।

न सम॑या॒जयन्ति॑ । प॒त्नियै॑ गो॒पीथा॑य । 71 (9) (हो॑ता॒र – मा॒ज्यभा॑गौ यजति॑
– सन्त॑तमव॑द्यति – व्यावृ॑त्त्यै – ब॒र्हिषदो॑ यजति॑ – तमे॒व तद् यज॑-
त्यनु॑ निष्क्राम॑न्त्या – है – नान् – ऋ॒तवो॑ – +नव॑ च) (A9)

1.6.10 अनुवाकं 10 – त्र्यम्बकहवींषि

T.B.1.6.10.1

प्रति॑पू॒रुषमे॑कक॒पालान्॑ निर्व॑पति । जा॒ता ए॒व प्र॒जा रु॒द्रान्नि॑रव॒दय॑ते ।
एक॑मतिरि॒क्तम् । ज॒निष्य॑माणा ए॒व प्र॒जा रु॒द्रान्नि॑रव॒दय॑ते ।
एक॑क॒पाला भ॑वन्ति । एक॑धै॒व रु॒द्रं नि॑रव॒दय॑ते । नाभि॑घारयति ।
यद॑भि॒घार॑येत् ॥ अ॒न्तर॑व॒चारि॑णं रु॒द्रं कु॑र्यात् । ए॒कोल्मु॑केन॑ यन्ति । 72 (10)

T.B.1.6.10.2

तद्धि॑ रु॒द्रस्य॑ भा॒गधे॑यम् ॥ इ॒मां दि॑शं य॒न्ति । ए॒षा वै रु॒द्रस्य॑ दिक् ।
स्वा॒यामे॒व दि॒शि रु॒द्रं नि॑रव॒दय॑ते । रु॒द्रो वा अ॑प॒शुका॒या आ॑हु॒त्यै
नाति॑ष्ठत । अ॒सौ ते प॒शुरि॑ति॒ निर्दि॑शेद्यं द्वि॒ष्यात् । यमे॒व द्वेष्टि॑ ।
तम॑स्मै प॒शुं निर्दि॑शति । यदि॒ न द्वि॒ष्यात् ।
आ॒खुस्ते॑ प॒शुरि॑ति ब्रूयात् । 73 (10)

T.B.1.6.10.3

न॒ ग्राम्यान् प॒शून् हि॒नस्ति॑ । नार॒ण्यान् । चतु॒ष्पथे॑ जु॒होति॑ ।

ए॒ष वा अ॒ग्नीनां॑ प॒ड्बी॒शो नाम॑ । अ॒ग्नित्ये॒व जु॒होति॑ ।

म॒ध्यमे॑न॒ पर्णे॑न जु॒होति॑ । सु॒ग॒ध्येषा॑ । अ॒थो ख॒लु ।

अ॒न्तमे॑नै॒व हो॑त॒व्यम् ॥ अ॒न्तत॑ ए॒व रु॒द्रं नि॒रव॑दयते । 74 (10)

T.B.1.6.10.4

ए॒ष ते रु॒द्र भा॒गः स॒ह स्व॒स्राऽम्बि॑कयेत्याह । श॒र॒द्वा अ॒स्याम्बि॑का॒ स्वसा॑ ॥

तया॒ वा ए॒ष हि॒नस्ति॑ । य॒ऽहि॒नस्ति॑ । तयै॒वैन॑ऽस॒ह श॑मयति ।

भे॒षजं॑ ग॒व इ॒त्याह॑ । या॒वन्त॑ ए॒व ग्रा॒म्याः प॒शवः॑ ।

तेभ्यो॑ भे॒षजं॑ करोति । अ॒वा॒म्ब रु॒द्रम॑दि॒मही॑त्याह ।

आ॒शि॒षमे॑वैता॒माशा॑स्ते ॥ 75 (10)

T.B.1.6.10.5

त्र्य॒म्बकं॑ य॒जाम॑ह इत्याह । मृ॒त्योर् मु॒क्षीय॑ मा ऽमृ॒तादि॑ति वावै॒तदा॑ह ।

उ॒त्कि॑रन्ति । भ॒गस्य॑ ली॒प्सन्ते॑ । मू॒ते कृ॒त्वाऽऽस॑जन्ति । यथा॒ जनं॑

य॒तेऽव॑सं करोति । ता॒दृगे॒वतत्॑ । ए॒ष ते रु॒द्र भा॒ग इ॒त्याह॑ नि॒रव॑त्यै ।

अ॒प्रती॑क्ष॒माय॑न्ति । अ॒पः परि॑षिञ्चति () । रु॒द्रस्या॑न्त॒र्हि॒त्यै ।

प्र वा ए॒ते॒ऽस्मा॒-ल्लो॒का॒च्च्य॑वन्ते । ये त्र्य॑म्ब॒कैश्चर॑न्ति ।

आ॒दि॒त्यं च॒रुं पु॒नरे॑त्य॒ निर्व॑पति । इ॒यं वा॑ अ॒दि॒तिः ।

अ॒स्यामे॒व प्र॒ति ति॑ष्ठन्ति । 76 (16) (य॒न्ति - ब्रू॒यान् - नि॒रव॑दयते -
शा॒स्ते - सि॒ञ्चति॑ षट्च) (A10)

Prapaataka Korvai with starting Padams of 1 to 10 Anuvaakams :-

(अ॒नु॒म॒त्यै - वै॒श्वदे॑वे॒न ताः॑ सृ॒ष्टा - स्त्रि॒वृत् - प्र॒जा॒प॒तिः स॒वि -
तो॒त्तर॑स्यां - दे॒वा॒सु॒राः सो॒ऽग्नि॑र् - यत् प॒त्नी -
वै॒श्वदे॑वे॒न ता॑ व॒रु॒णप्र॑धा॒सै - र॒ग्नये॑ दे॒वेभ्यः॑ - प्र॒ति॒पू॒रुषं॑ द॒श)

Korvai with starting Padams of 1, 11, 21 Series of Dasanis :-

(अ॒नु॒म॒त्यै - प्र॒थम॑जो व॒त्सो - ब॒हु॒रू॒पा हि॑ प॒शव॑ - स्त॒स्मात् पृ॒थमा॑त्रं
- य॒द॒ग्नये॑ऽनी॒कव॑त - उ॒धारं वा॑ - अ॒ग्नये॑ दे॒वेभ्यः॑ -
ऋ॒तू॒ने॒व षट्॑त्स॒प्ततिः॑)

First and Last Padam of 6th Prapaatakam :-

(अनु॒म॒त्यै॒ – प्र॒ति॒ ति॒ष्ठ॒न्ति॒)
–

। हरिः॑ ओँ ।

। कृष्ण यजुर्वेदीय तैत्तिरीय ब्राह्मणे प्रथमाष्टके षष्ठः प्रपाठकः समाप्तः ।

Details of Dasani & Vaakyams for Ashtakam 1 –
Prapaatakam 6 – (TB 1.6)

	Dasani	Vaakyams
Anuvakam 1	11	116
Anuvakam 2	7	70
Anuvakam 3	10	104
Anuvakam 4	5	56
Anuvakam 5	6	60
Anuvakam 6	6	62
Anuvakam 7	6	58
Anuvakam 8	9	95
Anuvakam 9	11	109
Anuvakam 10	5	56
Total →	76	786

1.7 प्रथमाष्टके सप्तमः प्रपाठकः – राजसूयानुब्राह्मणं

1.7.1 अनुवाकं 1 – शुनासीरीयेन्द्रतुरीयपञ्चावत्तीयापामार्गहोमाः

T.B.1.7.1.1

ए॒तद्-ब्रा॒ह्म॒णा॒न्ये॒व प॒ञ्च ह॒वी॒षि॑ । अ॒थेन्द्रा॑य शु॒नासी॑राय
 पु॒रोडा॑शं द्वा॒दश॑क॒पालं॑ निर्व॒पति॑ । स॒म्व॑त्स॒रो वा इन्द्रा॑ शु॒नासी॑रः ।
 स॒म्व॑त्स॒रेणै॒वास्मा॑ अ॒न्नम॑व रु॒न्धे । वा॒यव्यं॑ प॒यो भ॑वति ।
 वा॒युर्वै वृ॒ष्ट्यै॑ प्र॒दाप॑यिता । स ए॒वास्मै॑ वृ॒ष्टिं प्र॒दाप॑यति ।
 सौ॒र्य एक॑क॒पालो॑ भ॒वति॑ । सूर्ये॑ण वा अ॒मुष्मिन् लो॒के वृ॒ष्टिर्धृ॑ता ।
 स ए॒वास्मै॑ वृ॒ष्टिं नि॑ यच्छति । 1 (10)

T.B.1.7.1.2

द्वा॒दश॑ग॒वो सी॒रं दक्षि॑णा स॒मृद्ध्यै॑ । दे॒वासुराः॑ स॒म्य॑त्ता आ॒सन् ।
 ते दे॒वा अ॒ग्निम॑ब्रुवन् । त्वया॑ वी॒रेणा॑सुरा॒न-भि॑भवामेति ।
 सौ॒ब्रवी॑त् । त्रेधा॑ऽह॒मात्मानं॑ वि॒करि॑ष्य इति । स त्रेधा॑ ऽऽत्मानं॑ व्य॒कुरु॑त ।
 अ॒ग्निं तृ॑तीयम् । रु॒द्रं तृ॑तीयम् । व॒रुणं॑ तृ॑तीयम् । 2 (10)

1.7.1.3

सोऽब्रवीत् । क इदं तुरीयमिति । अहमितीन्द्रोऽब्रवीत् ।
 सं तु सृजावहा इति । तौ समसृजेताम् । स इन्द्रस्तुरीय-मभवत् ।
 यदिन्द्र-स्तुरीय-मभवत् । तदिन्द्र-तुरीयस्येन्द्र-तुरीयत्वम् ।
 ततो वै देवा व्यजयन्त । यदिन्द्रतुरीयं निरूप्यते विजित्यै । 3 (10)

T.B.1.7.1.4

वहिनी धेनुर्-दक्षिणा । यद्-वहिनी । तेनाग्नेयी । यद्-गौः ।
 तेन रौद्री । यद्-धेनुः । तेनैन्द्री । यथस्त्री सती दान्ता ।
 तेन वारुणी समृद्ध्यै । प्रजापतिर्-यज्ञमसृजत । 4 (10)

T.B.1.7.1.5

तं सृष्टं रक्षाऽस्यजिघांसन् । स एताः प्रजापति-रात्मनो
 देवता निरमिमीत । ताभिर्वै स दिग्भ्यो रक्षांसि प्राणुदत ।
 यत् पञ्चावत्तीयं जुहोति । दिग्भ्य एव तद्-यजमानो रक्षांसि प्राणुदते ।
 समूढं रक्षः संदग्धं रक्ष इत्याह । रक्षाऽस्येव संदहति ।
 अग्नये रक्षोघ्ने स्वाहेत्याह । देवताभ्य एव विजिग्यानाभ्यो
 भागधेयं करोति । प्रष्टिवाही रथो दक्षिणा समृद्ध्यै । 5 (10)

T.B.1.7.1.6

इन्द्रो॑ वृ॒त्रञ् ह॒त्वा । अ॒सुरान् प॒राभा॒व्य । नमु॑चिमासुरं॒ नाल॑भत ।
 तञ् श॒च्याऽगृ॒ह्णात् । तौ स॒मल॑भेताम् । सोऽस्मा॑-द॒भिः शु॒नत॑रोऽभवत् ।
 सोऽब्र॑वीत् । स॒न्धाञ् स॒न्दधा॑वहै । अथ॒ त्वाऽव॑ स्रक्ष्यामि ।
 न मा शु॒ष्केण॑ ना॒र्द्रेण॑ हनः । 6 (10)

T.B.1.7.1.7

न दि॒वा न न॑क्तमि॒ति । स ए॒त॒मपां॑ फे॒नम॑सिञ्चत् । न वा ए॒ष शु॒ष्को
 ना॒र्द्रो व्यु॑ष्टा ऽसीत् । अनु॑दितः सूर्यः । न वा ए॒तद्-दि॒वा न न॑क्तम् ।
 तस्यै॒तस्मिन्॑ लो॒के । अ॒पां फे॒नेन॑ शि॒र उ॑दवर्तयत् । तदे॒नम॑न्ववर्तत ।
 मि॒त्रद्रु॑गिति । 7 (9)

T.B.1.7.1.8

स ए॒तान॑पा॒मार्गा॑न॒जन॑यत् । तान॑जुहोत् । तैर्वै स रक्षा॑स्यपा॒हत॑ ।
 यद॑पा॒मार्ग॑ हो॒मो भ॑वति । रक्ष॑सा-म॒प॒हत्यै॑ । ए॒कोल् मु॒केन॑ यन्ति ।
 तद्धि॑ रक्ष॑सां भा॒गधे॑यम् । इ॒मां दि॒शं य॑न्ति । ए॒षा वै रक्ष॑सां दिक् ।
 स्वा॒यामे॑व दि॒शि रक्षा॑सि हन्ति । 8 (10)

T.B.1.7.1.9

स्व॒कृत॑ इ॒रिणे॑ जु॒होति॑ प्र॒दरे॑ वा । ए॒तद् वै रक्ष॑सामा॒यत॑नम् ।
 स्व॒ ए॒वाय॑तने॒ रक्षा॑सि ह॒न्ति । पर्ण॑मये॒न सु॒वेण॑ जु॒होति॑ ।
 ब्र॒ह्म वै पर्णः॑ । ब्र॒ह्मणै॑व रक्षा॑सि ह॒न्ति । दे॒वस्य॑ त्वा स॒वितुः॑
 प्र॒सव॑ इत्याह । स॒वितृ॑प्र॒सूत॑ ए॒व रक्षा॑सि ह॒न्ति । ह॒तर् रक्षो॑ ऽव॒धिष्म॑
 रक्ष॑ इत्याह । रक्ष॑सा॒ स्तृत्यै॑ () । यद्व॒स्ते तद्-दक्षि॑णा नि॒रव॑त्यै ।
 अ॒प्रती॑क्ष॒मा य॑न्ति । रक्ष॑सा-म॒तर्-हि॑त्यै । 9 (13)

(य॒च्छति॑ - वरु॑णं तृ॒तीयं॑ - वि॒जित्या॑ - अ॒सृज॑त - स॒मृद्ध्यै॑ - ह॒नो
 - मि॒त्रद्रु॑गिति॑ - ह॒न्ति - स्तृत्यै॑ त्री॒णि च) (A1)

1.7.2 अनुवाकं 2 – देविकावहवींषि

T.B.1.7.2.1

धा॒त्रे पु॒रोडा॑शं द्वा॒दश॑क॒पालं॑ नि॒र्वप॑ति । स॒म्व॑त्स॒रो वै धा॒ता ।
 स॒म्व॑त्स॒रेणै॒वास्मै॑ प्र॒जाः प्र॑ज॒नय॑ति । अ॒न्वे॒वास्मा॑ अ॒नुम॑ति॒र्मन्य॑ते ।
 रा॒ते रा॒का । प्र॒ सि॒नीवा॑ली ज॒नय॑ति । प्र॒जास्वे॒व प्र॑जा॒तासु॑ कु॒ह्वा वाचं॑
 द॒धाति॑ । मि॒थुनौ॑ गा॒वौ दक्षि॑णा स॒मृद्ध्यै॑ । आ॒ग्नावै॒ष्णव॑-मे॒काद॑शक॒पालं॑
 नि॒र्वप॑ति । ऐ॒न्द्रावै॒ष्णव॑-मे॒काद॑शक॒पालम् । 10 (10)

T.B.1.7.2.2

वै॒ष्ण॒वं त्रि॒क॒पा॒ल॒म् । वी॒र्यं॑ वा॒ अ॒ग्निः॑ । वी॒र्य॑मिन्द्रः॑ । वी॒र्यं॑ वि॒ष्णुः॑ ।
 प्र॒जा ए॒व प्र॒जा॒ता वी॒र्ये॑ प्र॒ति॒ष्ठा॒प॒य॒ति । तस्मा॑त् प्र॒जा वी॒र्या॑वतीः ।
 वा॒म॒न ऋ॒षभो॑ व॒ही दक्षि॑णा । यद्व॒ही । ते॒ना॒ग्ने॒यः॑ । यदृ॒षभः॑ । 11 (10)

T.B.1.7.2.3

ते॒नैन्द्रः॑ । यद्वाम॑नः । ते॒न वै॒ष्ण॒वः स॒मृ॒द्ध्यै॑ । अ॒ग्नी॒षो॒मी॒य-
 मे॒का॒द॒श॒क॒पा॒लं निर्व॑पति । इन्द्रा॑सो॒मी॒य-मे॒का॒द॒श॒क॒पा॒ल॒म् ।
 सौ॒म्यं च॒रु॒म् । सो॒मो वै रे॒तो॒धाः॑ । अ॒ग्निः प्र॒जा॒नां प्र॒ज॒न॒यि॒ता ।
 वृ॒द्धा॒नामिन्द्रः॑ प्र॒दा॒प॒यि॒ता । सो॒म ए॒वा॒स्मै रे॒तो द॑धाति । 12 (10)

T.B.1.7.2.4

अ॒ग्निः प्र॒जां प्र॒ज॒न॒य॒ति । वृ॒द्धा॒मिन्द्रः॑ प्र॒य॒च्छ॒ति । ब॒भ्रुर्-दक्षि॑णा
 स॒मृ॒द्ध्यै॑ । सो॒मा॒पौ॒ष्णं च॒रुं निर्व॑पति । ऐन्द्रा॑पौ॒ष्णं च॒रु॒म् ।
 सो॒मो वै रे॒तो॒धाः॑ । पू॒षा प॒शूनां॑ प्र॒ज॒न॒यि॒ता । वृ॒द्धा॒नामिन्द्रः॑ प्र॒दा॒प॒यि॒ता ।
 सो॒म ए॒वा॒स्मै रे॒तो द॑धाति । पू॒षा प॒शून् प्र॒ज॒न॒य॒ति । 13 (10)

T.B.1.7.2.5

वृ॒द्धा॒निन्द्रः॑ प्र॒यच्छ॑ति । पौ॒ष्णश्च॒रुर्-भ॑वति । इ॒यं वै पू॒षा ।
 अ॒स्यामे॒व प्र॒ति ति॑ष्ठति । श्या॒मो दक्षि॑णा स॒मृद्ध्यै॑ ।
 बहु॒ वै पु॒रुषो॑ऽमे॒ध्य-मु॑पगच्छति । वै॒श्वान॑रं द्वा॒दश॑कपालं निर्व॑पति ।
 स॒म्व॑त्सरो वा अ॒ग्निर्-वै॑श्वानरः । स॒म्व॑त्सरेणै॒वैन॑ स्व॒दय॑ति ।
 हि॒र॒ण्यं दक्षि॑णा । 14 (10)

T.B.1.7.2.6

प॒वि॒त्रं वै॑ हि॒र॒ण्यम् । पु॒नात्ये॑वैन॒म् । बहु॒ वै रा॑ज॒न्यो ऽनृ॑तं करोति ।
 उ॒प जा॒म्यै ह॑रते । जि॒नाति॑ ब्रा॒ह्मण॑म् । व॒दत्य॑नृ॒तम् । अ॒नृते॑ खलु॒ वै
 क्रि॒यमा॑णो वरु॒णो गृ॑ह्णाति । वा॒रुणं॑ य॒वम॑यं चरुं निर्व॑पति ।
 वरु॒णपा॑शादे॒वैनं॑ मुञ्चति । अ॒श्वो दक्षि॑णा () । वा॒रुणो॑ हि दे॒वत॑याऽश्वः
 स॒मृद्ध्यै॑ । 15 (11) (ऐ॒न्द्रावै॑ष्णावमे॒काद॑शकपालं-य॒दृष॑भो- द॒धाति॑-पू॒
 षा प॒शून् प्र॑ज॒नय॑ति-हि॒र॒ण्यं दक्षि॑णा-दक्षि॒णैकं॑ च) (A2)

1.7.3 अनुवाकं 3 – रत्निनां हवींषि

T.B.1.7.3.1

रत्निनामे॒तानि॑ ह॒वी॒षि॑ भवन्ति । ए॒ते वै रा॒ष्ट्रस्य॑ प्र॒दा॒तारः॑ ।
 ए॒तेऽपा॒दा॒तारः॑ । य ए॒व रा॒ष्ट्रस्य॑ प्र॒दा॒तारः॑ । येऽपा॒दा॒तारः॑ ।
 त ए॒वास्मै॑ रा॒ष्ट्रं प्र॑यच्छन्ति । रा॒ष्ट्रमे॒व भ॑वति । यथ् स॒मा॒हृत्य॑ निर्व॒पेत्॑ ।
 अ॒रत्नि॑नः स्युः । य॒था॒य॒थं निर्व॑पति रत्नि॒त्वाय॑ । 16 (10)

T.B.1.7.3.2

यथ् स॒द्यो निर्व॑पेत् । या॒व॒तीमे॒केन॑ ह॒विषा॑ऽऽशि॒षम॑व रुन्धे ।
 ता॒व॒तीम॑व रुन्धीत । अ॒न्व॒हं निर्व॑पति । भु॒य॒सीमे॒वाशि॒षम॑व रुन्धे ।
 भू॒य॒सो य॒ज्ञक्र॑तूनु॒पैति॑ । बा॒र्ह॒स्प॒त्यं च॒रुं निर्व॑पति ब्र॒ह्म॒णो गृ॑हे ।
 मु॒ख॒त ए॒वास्मै॑ ब्र॒ह्म स॑ऽश्रयति । अथो ब्र॒ह्म॒न्ने॒व क्ष॑त्र-म॒न्वा॒र॒म्भ॑यति ।
 शि॒ति॒पृ॒ष्ठो द॑क्षिणा॒ समृ॑द्ध्यै । 17 (10)

T.B.1.7.3.3

ऐ॒न्द्र-मे॒का॒द॒श॒क॒पा॒ल॒ऽरा॒ज॒न्य॑स्य गृ॒हे । इ॒न्द्रि॒यमे॒वाव॑ रुन्धे । ऋ॒ष॒भो
 द॑क्षिणा॒ समृ॑द्ध्यै । आ॒दि॒त्यं च॒रुं म॑हिष्यै गृ॒हे । इ॒यं वा॑ अ॒दि॒तिः ।
 अ॒स्यामे॒व प्र॑ति॒तिष्ठ॑ति । धे॒नुर्-द॑क्षिणा॒ समृ॑द्ध्यै ।

भगा॑य च॒रुं वा॒वा॒ता॒यै गृ॒हे । भग॑मे॒वास्मिन् द॑धाति ।

विचि॑त्तग॒र्भा प॒ष्ठौही दक्षि॑णा॒ समृ॑द्ध्यै । 18 (10)

T.B.1.7.3.4

नैर्ऋ॑तं च॒रुं परि॑वृ॒क्त्यै गृ॒हे कृ॒ष्णानां॑ व्री॒हीणां॑ न॒खनि॑र्भिन्नम् ।
पा॒प्मान॑मे॒व निर्ऋ॑तिं नि॒रव॑दयते । कृ॒ष्णा कू॒टा दक्षि॑णा॒ समृ॑द्ध्यै ।

आ॒ग्नेय॑-म॒ष्टाक॑पालं॒ से॒नान्यो॑ गृ॒हे । से॒नामे॑वा॒स्य स॒ञ्ज॑यति ।

हि॒रण्यं दक्षि॑णा॒ समृ॑द्ध्यै । वा॒रुणं द॑शक॒पालं॒ सू॒तस्य॑ गृ॒हे ।

व॒रुण॑स॒वमे॑वाव-रु॒न्धे । म॒हानि॑र॒ष्टो दक्षि॑णा॒ समृ॑द्ध्यै ।

मा॒रुतं॑ स॒प्तक॑पालं॒ ग्राम॑ण्यो गृ॒हे । 19 (10)

T.B.1.7.3.5

अ॒न्नं वै म॒रुतः॑ । अ॒न्नमे॑वाव-रु॒न्धे । पृ॒श्निर्-दक्षि॑णा॒ समृ॑द्ध्यै ।

सा॒वि॒त्रं द्वा॑द॒शक॑पालं॒ क्षत्तु॑र्गृ॒हे प्र॑सू॒त्यै । उ॒प॒ध्वस्तो॑ दक्षि॑णा॒ समृ॑द्ध्यै ।

आ॒श्विनं॑ द्वि॒कपालं॑ स॒ंग्रही॑तुर्गृ॒हे । अ॒श्विनो॑ वै दे॒वानां॑ भि॒षजौ॑ ।

ता॒भ्यामे॑वा॒स्मै भे॑ष॒जं क॑रोति । स॒वा॒त्यौ दक्षि॑णा॒ समृ॑द्ध्यै ।

पौ॒ष्णं च॒रुं भा॑गदु॒घस्य॑ गृ॒हे । 20 (10)

T.B.1.7.3.6

अन्नं॑ वै पू॒षा । अन्न॑मे॒वाव॑ रुन्धे । श्या॒मो दक्षि॑णा॒ समृ॑द्ध्यै ।
 रौ॒द्रं गा॑वी॒धुकं॑ चरु॒मक्षा॑वापस्य॒ गृहे॑ । अन्त॑त ए॒व रु॒द्रं नि॑रव॒दय॑ते ।
 श॒बल॑ उ॒द्धारो॑ दक्षि॑णा॒ समृ॑द्ध्यै । द्वा॒दशै॑तानि॒ हवी॑ ऽ॒षि भ॑वन्ति ।
 द्वा॒दश॑ मा॒साः सम्॑व॒त्सरः॑ । सम्॑व॒त्सरे॑णै॒वास्मै॑ रा॒ष्ट्रमे॑व-रुन्धे ।
 रा॒ष्ट्रमे॑व भवति । 21 (10)

T.B.1.7.3.7

यन्न॑ प्र॒ति निर्व॑पेत् । र॒त्निन॑ आ॒शिषो॑ ऽव॒रुन्धी॑रन् । प्र॒ति निर्व॑पति ।
 इन्द्रा॑य सु॒त्राम्णो॑ पु॒रोडा॑श-मे॒काद॑शकपालम् । इन्द्रा॑या ऽ॒होमु॑चे ।
 आ॒शिष॑ ए॒वाव॑रुन्धे । अ॒यं नो॑ रा॒जा वृ॑त्र॒हा रा॒जा भू॑त्वा वृ॒त्रं
 व॑ध्यादि॒त्याह॑ । आ॒शिष॑मे॒वैता॑माशास्ते । मै॒त्रा-बा॒र्ह॒स्पत्यं॑ भवति ।
 श्वे॒तायै॑ श्वे॒तव॑त्सायै॒ दुग्धे॑ । 22 (10)

T.B.1.7.3.8

बा॒र्ह॒स्पत्ये॑ मै॒त्रम॑पि दधाति । ब्र॒ह्म चै॒वास्मै॑ क्ष॒त्रं च॑ स॒मीची॑ दधाति ।
 अथो॑ ब्र॒ह्मन्ने॒व क्ष॒त्रं प्र॑तिष्ठापयति । बा॒र्ह॒स्पत्ये॑न॒ पूर्वे॑ण प्र॒चर॑ति ।
 मु॒खत॑ ए॒वास्मै॑ ब्र॒ह्म स॑ ऽश्रयति । अथो॑ ब्र॒ह्मन्ने॒व क्ष॒त्र-म॑न्वारम्भयति ।

स्वयं कृता वेदिर्भवति । स्वयंदिनं बर्हिः । स्वयंकृत इध्मः ।
 अनभिजितस्या-भिजित्यै () । तस्माद्-राज्ञामरण्य-मभिजितम् ।
 सैव श्वेता श्वेतवत्सा दक्षिणा समृद्ध्यै । 23 (12)

(रनित्वाय - समृद्ध्यै - पष्ठौहि दक्षिणा समृद्ध्यै - ग्रामण्यो
 गृहे - भागदुघस्य गृहे-भवति - दुग्धे - अभिजित्यै द्वे च) (A3)

1.7.4 अनुवाकं 4 – देवसुवां हवींषि

T.B.1.7.4.1

देवसुवामेतानि हवींषि भवन्ति । एतावन्तो वै देवानां सवाः ।
 त एवास्मै सवान् प्रयच्छन्ति । त एनं सुवन्ते । अग्निरेवैनं
 गृहपतीनां सुवते । सोमो वनस्पतीनाम् । रुद्रः पशूनाम् ।
 बृहस्पतिर्-वाचाम् । इन्द्रो ज्येष्ठानाम् । मित्रः सत्यानाम् । 24 (10)

T.B.1.7.4.2

वरुणो धर्मपतीनाम् । एतदेव सर्वं भवति । सविता त्वा प्रसवानां
 सुवतामिति हस्तं गृह्णाति प्रसूत्यै । ये देवा देवसुवः स्थेत्याह ।
 यथा यजुरेवै तत् । महते क्षत्राय महत आधिपत्याय महते
 जानराज्यायेत्याह । आशिषमेवैतामाशास्ते ।

ए॒ष वो॑ भ॒रता॑ रा॒जा सो॒मोऽस्मा॑कं ब्रा॒ह्मणा॑नाञ्च॒ राजे॑त्याह ।

तस्मा॑त्-सो॒मरा॑जानो ब्रा॒ह्मणाः॑ । प्र॒ति त्य॑न्नाम॒ राज्य॑म॒धायी॑त्याह । 25 (10)

T.B.1.7.4.3

रा॒ज्यमे॒वास्मि॑न् प्र॒ति द॑धाति । स्वां॑ त॒नुवं॑ वरु॒णो अ॑शि॒श्रेदि॑त्याह ।

वरु॑णस॒वमे॒वा-वरु॑न्धे । शु॒चे॑र्मि॒त्रस्य॑ व्र॒त्या अ॑भूमे॒त्याह॑ ।

शु॒चिमे॒वैनं॑ व्र॒त्यं करो॑ति । अ॒मन्म॑हि म॒हत ऋ॑तस्य॒ नामे॑त्याह ।

म॒नुत॑ ए॒वैन॑म् । सर्वे॑ व्रा॒ता वरु॑णस्या॒ भूव॑न्नित्याह ।

सर्व॑व्रा॒तमे॒वैनं॑ करो॑ति । वि मि॒त्र ए॒वैर॑राति-म॒तारी॑दित्याह । 26 (10)

T.B.1.7.4.4

अ॒राति॑मे॒वैनं॑ ता॒रय॑ति । अ॒सूषु॑दन्त॒ यज्ञि॑या ऋ॒तेने॑त्याह ।

स्व॒दय॑त्ये॒वैन॑म् । व्यु॒ त्रि॒तो ज॑रि॒माणं॑ न आ॒नडि॑त्याह ।

आ॒युरे॒वास्मि॑न् द॒धाति॑ । द्वा॒भ्यां वि॑मृ॒ष्टे । द्वि॒पाद्-य॑ज॒मानः॑ प्र॒तिष्ठि॑त्यै ।

अ॒ग्नी॒षोमी॑यस्य॒ चैका॑द॒शक॑पा॒लस्य॑ दे॒वसु॑वां च ह॒विषा॑म॒ग्नये॑

स्वि॒ष्टकृ॑ते॒ सम॑व॒द्यति॑ । दे॒वता॑भिरे॒वैन॑-मु॒भय॑तः॒ परि॑गृ॒ह्णाति॑ ।

वि॒ष्णु॒क्रमा॑न् क्र॒मते॑() । वि॒ष्णुरे॒व भू॑त्वामा॒न् लो॒का-न॑भिज॒यति॑ । 27

(11) (सत्याना॑-म॒धायी॑त्या॒-हा॒तारी॑दि॒त्याह॑-क्र॒मत॑ एकं॑ च) (A4)

1.7.5 अनुवाकं 5 – अभिषेकार्थमपांग्रहग्रहणम्

T.B.1.7.5.1

अ॒र्थे॒तः॒ स्त्वे॒ति॒ जु॒हो॒ति॒ । आ॒हु॒त्यै॒वैना॑ नि॒ष्क्री॒य गृ॒ह्णा॒ति॒ ।

अ॒थो॒ ह॒विष्कृ॑तानामे॒वाभि॑घृ॒तानां॑ गृ॒ह्णा॒ति॒ । व॒हन्ती॑नां गृ॒ह्णा॒ति॒ ।

ए॒ता वा॒ अ॒पाꣳ रा॒ष्ट्रम् । रा॒ष्ट्रमे॒वास्मै॑ गृ॒ह्णा॒ति॒ । अ॒थो॒ श्रि॒यमे॒वैन॑म॒भि
व॒हन्ति॑ । अ॒पां प॒तिर॒सीत्या॑ह । मि॒थुन॑मे॒वाकः॑ । वृ॒षाꣳस्यू॒र्मिरि॒त्याह॑ । 28

(10)

T.B.1.7.5.2

ऊ॒र्मि॒मन्त॑मे॒वैनं॑ क॒रोति॑ । वृ॒षसे॒नोꣳसी॒त्याह॑ । से॒नामे॒वा॒स्य सꣳश्य॑ति ।

व्र॒जक्षि॑तः स्त्वे॒त्याह॑ । ए॒ता वा॒ अ॒पां वि॑शः । वि॒शमे॒वास्मै॑ प॒र्यू॒हति॑ ।

म॒रुता॑मो॒जः स्त्वे॒त्याह॑ । अ॒न्नं वै॑ म॒रुतः॑ । अ॒न्नमे॒वा व॑रुन्धे ।

सू॒र्यव॑र्च॒सः स्त्वे॒त्याह॑ । 29 (10)

T.B.1.7.5.3

रा॒ष्ट्रमे॒व व॑र्च॒स्व्यकः॑ । सू॒र्यत्व॑च॒सः स्त्वे॒त्याह॑ । स॒त्यं वा॑ ए॒तत् ।

यद्-व॑र्ष॒ति । अ॒नृतं॑ य॒दात॑प॒ति व॑र्ष॒ति । स॒त्यानृ॑ते ए॒वाव॑रुन्धे ।

नैनꣳ स॒त्यानृ॑ते उ॒दिते॑ हिꣳस्तः । य ए॒वं वै॑द । मा॒न्दाः स्त्वे॒त्याह॑ ।

राष्ट्रमे॒व ब्र॒ह्मव॑र्चस्य॒कः । 30 (10)

T.B.1.7.5.4

वा॒शाः स्थे॑त्याह । रा॒ष्ट्रमे॒व व॑श्य॒कः । श॒क्वरीः स्थे॑त्याह ।

प॒शवो॑ वै श॒क्वरीः । प॒शूने॒वाव॑ रु॒न्धे । वि॒श्वभृ॑तः स्थे॑त्याह ।

रा॒ष्ट्रमे॒व प॑यस्व्य॒कः । ज॒नभृ॑तः स्थे॑त्याह । रा॒ष्ट्रमे॒वेन्द्रि॑याव्य॒कः ।

अ॒ग्नेस्ते॑जस्याः स्थे॑त्याह । 31 (10)

T.B.1.7.5.5

रा॒ष्ट्रमे॒व ते॑जस्व्य॒कः । अ॒पामो॑षधी॒नाञ् र॑सः स्थे॑त्याह ।

रा॒ष्ट्रमे॒व म॑धव्य॒मकः । सा॒रस्व॑तं ग्र॒हं गृ॑ह्णाति । ए॒षा वा॑ अ॒पां पृ॑ष्ठम् ।

य॒त्सर॑स्वती । पृ॒ष्ठमे॒वैन॑ञ् स॒माना॑नां करोति । षोड॑शभिर्-गृह्णाति ।

षोड॑शक॒लो वै पु॑रुषः । या॒वाने॑व पु॒रुषः () । तस्मि॑न् वी॒र्यं॑ दधाति ।

षोड॑शभिर्-जुहोति षोड॑शभिर्-गृह्णाति । द्वात्रि॑ञ्शथ् संप॑द्यन्ते ।

द्वात्रि॑ञ्शदक्षरा ऽनु॒ष्टुक् । वा॒गनु॒ष्टुप् सर्वा॑णि छन्दा॑ञ्सि ।

वा॒चैवैन॑ञ् सर्वे॑भिः छन्दा॑भि-रभिषि॑ञ्चति । 32 (16)

(ऊ॒र्मि॑रित्या॒ह - सू॒र्यव॑र्चसः स्थे॑त्याह - ब्र॒ह्मव॑र्चस्य॒क -

स्ते॒ज॒स्याः॑ स्थे॒त्या॒है॒व – पु॒रु॒षः॑ षट्च॑) (A5)

1.7.6 अनुवाकं 6 – अभिषेकार्थजलसंस्कारः

T.B.1.7.6.1

दे॒वी॒रा॒पः॑ सं॒ म॒धु॒म॒ती॒र्-म॒धु॒म॒ती॒भिः॑ सृ॒ज्य॒ध्व॒मि॒त्या॒ह ।

ब्र॒ह्म॒णै॒वै॒नाः॑ सꣳ सृ॒जति॑ । अ॒ना॒धृ॒ष्टाः॑ सी॒दते॒त्या॒ह । ब्र॒ह्म॒णै॒वै॒नाः॑ सा॒दय॑ति ।

अ॒न्त॒रा हो॒तुश्च॑ धि॒ष्णि॒यं ब्रा॒ह्म॒णा॒च्छꣳ सि॒नश्च॑ सा॒दय॑ति ।

आ॒ग्ने॒यो वै हो॒ता ॥ ऐ॒न्द्रो ब्रा॒ह्म॒णा॒च्छꣳसी॑ ।

ते॒ज॒सा चै॒वे॒न्द्रि॒येण॑ चो॒भय॑तो रा॒ष्ट्रं प॒रि॒गृ॒ह्णाति॑ । हि॒र॒ण्ये॒नोत् पु॑नाति ।

आ॒हु॒त्यै हि प॒वि॒त्रा॒भ्यामु॒त्पु॒नन्ति॑ व्या॒वृ॒त्यै । 33 (10)

T.B.1.7.6.2

श॒त॒मा॒नं भ॑वति । श॒ता॒युः॑ पु॒रु॒षः॑ श॒ते॒न्द्रि॒यः॑ ।

आ॒यु॒ष्ये॒वे॒न्द्रि॒ये प्र॑ति॒तिष्ठ॑ति । अ॒नि॒भृ॒ष्टम॑सी॒त्या॒ह । अ॒नि॒भृ॒ष्टꣳ ह्ये॒तत् ।

वा॒चो ब॑न्धु॒रि॒त्या॒ह । वा॒चो ह्ये॑ष ब॒न्धुः॑ । त॒पो॒जा इ॒त्या॒ह ।

त॒पो॒जा ह्ये॒तत् । सो॒म॒स्य दा॑त्रमसी॒त्या॒ह । 34 (10)

T.B.1.7.6.3

सोमस्य ह्येतद्वात्रम् । शुक्रा वः शुक्रेणोत्पुनामीत्याह । शुक्रा ह्यापः ।
 शुक्रं हिरण्यम् । चन्द्राश्चन्द्रेणेत्याह । चन्द्रा ह्यापः । चन्द्रं हरण्यम् ।
 अमृता अमृतेनेत्याह । अमृता ह्यापः । अमृतं हिरण्यम् । 35 (10)

T.B.1.7.6.4

स्वाहा राजसूयायेत्याह । राजसूयाय ह्येना उत्पुनाति । सधमादौ
 द्युम्निनीरुर्ज एता इति वारुण्यर्चा गृह्णाति । वरुणसवमेवा वरुन्धे ।
 एकया गृह्णाति । एकधैव यजमाने वीर्यं दधाति । क्षत्रस्योल्बमसि
 क्षत्रस्य योनिरसीति तार्प्यं चोष्णीषं च प्रयच्छति सयोनित्वाय ।
 एकशतेन दर्भपुञ्जीलैः पवयति । शतायुर्वै पुरुषः शतवीर्यः ।
 आत्मैकशतः । 36 (10)

T.B.1.7.6.5

यावानेव पुरुषः । तस्मिन् वीर्यं दधाति । दध्याशयति ।
 इन्द्रियमेवा-वरुन्धे । उदुम्बर-माशयति । अन्नाद्यस्याव रुद्ध्यै ।
 शष्पाण्याशयति । सुराबलि-मेवैनं करोति । आविद एता भवन्ति ।
 आविदमेवैनं गमयन्ति । 37 (10)

T.B.1.7.6.6

अ॒ग्नि॒रे॒वैनं॑ गा॒हर्॒पत्ये॑नावति । इन्द्र॑ इन्द्रि॒येण॑ । पू॒षा प॒शुभिः॑ ।
मि॒त्राव॑रुणौ प्रा॒णापा॑नाभ्याम् । इन्द्रो॑ वृ॒त्राय॑ वज्रमुदयच्छत् ।
स दि॒वम॑लिखत् । सो॒ऽर्य॒म्णः प॑न्था अभवत् । स आ॒वि॒त्रे
द्या॒वापृ॑थि॒वी धृ॒तव्र॑ते इति द्या॒वापृ॑थि॒वी उपा॑धावत् । स आ॒भ्यामे॒व
प्र॒सूत॑ इन्द्रो॑ वृ॒त्राय॑ वज्रं प्रा॒हरत् । आ॒वि॒त्रे द्या॒वापृ॑थि॒वी धृ॒तव्र॑ते
इति॑ यदाह । 38 (10)

T.B.1.7.6.7

आ॒भ्यामे॒व प्र॒सूतो॑ यज॒मानो॑ वज्रं भ्रातृ॒व्याय॑ प्रहरति ।
आ॒वि॒त्रा दे॒व्यदि॑तिर्-विश्वरू॒पीत्या॑ह । इयं॑ वै दे॒व्यदि॑तिर्-विश्वरू॒पी ।
अस्या॑मे॒व प्र॒ति ति॑ष्ठति । आ॒वि॒त्रोऽय॑मसा॒वामु॑ष्याय॒णोऽस्यां॑ वि॒श्यस्मिन्
राष्ट्र॑ इत्याह । वि॒शैवैन॑ राष्ट्र॒ेण॑ सम॒र्धय॑ति । मह॑ते क्ष॒त्राय॑ मह॒त
आधि॑पत्याय मह॑ते जा॒नरा॑ज्यायेत्याह । आ॒शिष॑मे॒वैता॑माशास्ते ।
एष॑ वो॒ भर॑ता राजा सोमो॑ऽस्माकं ब्रा॒ह्मणा॑नाञ् राजे॑त्याह ।
तस्मा॑त् सोम॒राजा॑नो ब्रा॒ह्मणाः॑ । 39 (10)

T.B.1.7.6.8

इन्द्रस्य वज्रोऽसि वार्त्रघ्न इति धनुः प्रयच्छति विजित्यै ।
 शत्रुबाधनाः स्थेतीषून् । शत्रून्नेवास्य बाधन्ते । पात मा प्रत्यञ्चं
 पात मा तिर्यञ्चमन्वञ्चं मा पातेत्याह । तिस्रो वै शरव्याः ।
 प्रतीची तिरश्च्यनूची । ताभ्य एवैनं पान्ति । दिग्भ्यो मा पातेत्याह ।
 दिग्भ्य एवैनं पान्ति । विश्वाभ्यो मा नाष्ट्राभ्यः पातेत्याह () ।
 अपरिमितादेवैनं पान्ति । हिरण्यवर्णवुषसां विरोक इति
 त्रिष्टुभा बाहू उद्-गृह्णाति । इन्द्रियं वै वीर्यं त्रिष्टुक् । इन्द्रियमेव
 वीर्य-मुपरिष्ठादात्मन्-धत्ते । 40 (14) (व्यावृत्त्यै-दात्रमसीत्याहा-मृतं
 हिरण्य-मेकशतो-गमयन्-त्याह-ब्राह्मणा-नाष्ट्राभ्यः पातेत्याह
 चत्वारि च) (A6)

1.7.7 अनुवाकं 7 – दिग्व्यास्थापनम्

T.B.1.7.7.1

दिशो व्यास्थापयति । दिशामभिजित्यै । यदनु प्रक्रामेत् ।
 अभि दिशो जयेत् । उत्तु माद्येत् । मनसाऽनु प्रक्रामति ।

अभि दि॒शो॑ जयति । नो॒न्मा॑द्यति । समि॒धमा॑ तिष्ठे॒त्याह॑ ।

तेज॑ ए॒वाव॑रुन्धे । 41 (10)

T.B.1.7.7.2

उ॒ग्रामा॑ तिष्ठे॒त्याह॑ । इ॒न्द्रि॒यमे॒वाव॑ रुन्धे । वि॒राज॑मा तिष्ठे॒त्याह॑ ।
अ॒न्नाद्य॑मे॒वाव॑ रुन्धे । उ॒दी॒ची॒मा तिष्ठे॒त्याह॑ । प॒शूने॒वाव॑ रुन्धे ।
ऊ॒र्ध्वा॒मा तिष्ठे॒त्याह॑ । सु॒वर्ग॑मे॒व लो॒क-म॑भिजयति । अ॒नूज्जि॑हीते ।
सु॒वर्ग॑स्य लो॒कस्य॑ सम॒ष्ट्यै॑ । 42 (10)

T.B.1.7.7.3

मा॒रुत॑ ए॒ष भ॑वति । अ॒न्नं वै॑ म॒रुतः॑ । अ॒न्नमे॒वाव॑ रुन्धे ।
ए॒कवि॑ंश॒तिक॑पा॒लो भ॑वति प्र॒तिष्ठि॑त्यै । योऽ॒र॒ण्ये ऽनु॑वा॒क्यो ग॑णः ।
तं म॑ध्यत उप॒दधा॑ति । ग्रा॒म्यैरे॒व प॒शुभि॑-रा॒र॒ण्यान् प॒शून् प॑रिगृह्णाति ।
तस्मा॑द्-ग्रा॒म्यैः प॒शुभि॑रा॒र॒ण्याः प॒शवः॑ प॒रिगृ॑हीताः । पृथि॑र्वे॒न्यः ।
अ॒भ्यषि॑च्यत । 43 (10)

T.B.1.7.7.4

स रा॒ष्ट्रं ना॑भवत् । स ए॒तानि॑ पा॒र्थान्य॑पश्यत् । तान्य॑जुहोत् ।
तैर्वै॑ स रा॒ष्ट्र-म॑भवत् । यत्पा॒र्थानि॑ जुहोति । रा॒ष्ट्रमे॒व भ॑वति ।

बार्हस्पत्यं पूर्वेषामुत्तमं भवति । ऐन्द्रमुत्तरेषां प्रथमम् ।

ब्रह्म चैवास्मै क्षत्रं च समीची दधाति ।

अथो ब्रह्मन्नेव क्षत्रं प्रतिष्ठापयति । 44 (10)

T.B.1.7.7.5

षट्पुरस्ता-दभिषेकस्य जुहोति । षडुपरिष्ठात् । द्वादश सं पद्यन्ते ।

द्वादश मासाः सम्वत्सरः । सम्वत्सरः खलु वै देवानां पूः ।

देवानामेव पुरं मध्यतो व्यवसर्पति । तस्य न कुतश्च नोपाव्याधो भवति ।

भूताना-मवेष्टीर्-जुहोति । अत्रात्र वै मृत्युर्-जायते ।

यत्र यत्रैव मृत्युर्-जायते () । तत एवैनमवयजते ।

तस्माद्-राजसूयेनेजानः सर्वमायुरेति । सर्वे ह्यस्य मृत्यवोऽवेष्टाः ।

तस्माद्-राजसूयेनेजानो नाभिचरितवै ।

प्रत्यगेन-मभिचारः स्तृणुते । 45 (15)

(रुन्धे-समष्ट्या-असिच्यत-स्थापयति-जायते पञ्च च) (A7)

1.7.8 अनुवाकं 8 – अभिषेकः

T.B.1.7.8.1

सोमस्य त्विषिरसि तवेव मे त्विषिर्भूयादिति शार्दूलचर्मोपस्तृणाति ।
यैव सोमे त्विषिः । या शार्दूले । तामेवाव रुन्धे ।
मृत्योर्वा एष वर्णः । यच्छार्दूलः । अमृतं हिरण्यम् ।
अमृतमसि मृत्योर्मा पाहीति हिरण्य-मुपास्यति ।
अमृतमेव मृत्योरन्तर्-धत्ते । शतमानं भवति । 46 (10)

T.B.1.7.8.2

शतायुः पुरुषः शतेन्द्रियः । आयुष्येवेन्द्रिये प्रति तिष्ठति ।
दिद्योन्मा पाहीत्युपरिष्ठादधि निदधाति । उभयत एवास्मै शर्म दधाति ।
अवेष्टा दन्दशूका इति क्लीबं सीसेन विध्यति । दन्दशूका-नेवाव
यजते । तस्मात् क्लीबं दन्दशूका दंशुकाः । निरस्तं नमुचेः
शिर इति लोहितायसं निरस्यति । पाप्मानमेव नमुचिं निरवदयते ।
प्राणा आत्मनः पूर्वेऽभिषिच्या इत्याहुः । 47 (10)

T.B.1.7.8.3

सो॒मो॒ राजा॑ वरु॒णः । दे॒वा ध॑र्म॒सुव॑श्च ये । ते ते वाच॑ सुव॒न्तां
 ते ते प्रा॒णं सु॑व॒न्तामि॑त्याह । प्रा॒णाने॑वात्म॒नः पूर्वा॑-नभिषि॑ञ्चति ।
 यद्-ब्रू॒यात् । अ॒ग्नेस्त्वा ते॑जसा ऽभिषि॑ञ्चामीति । तेज॑स्व्ये॒व स्या॑त् ।
 दु॒श्चर्मा॑ तु भवे॑त् । सोम॑स्य त्वा द्यु॒म्नेना॑-भिषि॑ञ्चामीत्याह ।
 सौ॒म्यो वै दे॒वतया॑ पु॒रुषः॑ । 48 (10)

T.B.1.7.8.4

स्वयै॑वैनं दे॒वतया॑ ऽभिषि॑ञ्चति । अ॒ग्ने-स्तेज॑सेत्याह ।
 तेज॑ ए॒वास्मिन् द॑धाति । सूर्य॑स्य वर्च॑सेत्याह । वर्च॑ ए॒वास्मिन् द॑धाति ।
 इन्द्र॑स्ये-न्द्रि॒येणे॑त्याह । इन्द्रि॒यमे॒वास्मिन् द॑धाति । मि॒त्रावरु॑णयोर्-
 वीर्ये॑णेत्याह । वीर्य॑मे॒वास्मिन् द॑धाति । मरु॒तामो॒जसे॑त्याह । 49 (10)

T.B.1.7.8.5

ओज॑ ए॒वास्मिन् द॑धाति । क्ष॒त्राणां॑ क्ष॒त्रप॑तिरसीत्याह । क्ष॒त्राणामे॑वैनं
 क्ष॒त्रप॑तिं करोति । अति॑ दि॒वस्पा॑हीत्याह । अत्य॑न्यान् पा॒हीति॑ वावैतदाह ।
 स॒माव॑वृ॒त्रन्न-ध॑रागुदी॒ची-रि॑त्याह । रा॒ष्ट्रमे॒वास्मिन्
 ध्रु॒वम॑कः । उ॒च्छे॑षणेन जुहोति । उ॒च्छे॑षणभा॒गो वै रु॒द्रः ।

भाग॑धे॒ये॒नै॒व रु॒द्रं॑ नि॒रव॑दयते । 50 (10)

T.B.1.7.8.6

उद॑ङ्प॒रेत्य॑ग्नी॒द्ध्रे जु॑होति । ए॒षा वै रु॒द्रस्य॑ दिक् ।

स्वा॒यामे॑व दि॒शि रु॒द्रं नि॒रव॑दयते । रु॒द्र य॑त्ते क्र॒यी परं॑ ना॒मेत्या॑ह ।

यद्वा अ॒स्य क्र॒यी परं॑ ना॒म । ते॒न वा ए॒ष हि॑नस्ति । य॒ञ् हि॑नस्ति ।

ते॒नै॒वैन॑ञ् सह॑ श॒मय॑ति । तस्मै॑ हु॒तम॑सि य॒मेष्ट॑मसीत्या॑ह ।

य॒मादे॒वास्य॑ मृ॒त्युम॑वयजते । 51 (10)

T.B.1.7.8.7

प्र॒जाप॑ते न त्वदे॒तान्य॑न्य इति॑ तस्यै॑ गृ॒हे जु॑हुयात् ।

यां का॒मये॑त रा॒ष्ट्रम॑स्यै॒ प्रजा॑ स्या॒दिति॑ । रा॒ष्ट्रमे॒वास्यै॑ प्र॒जा भ॑वति ।

पर्ण॑-मये॒ना-ध्व॑र्यु-रभि॒षिञ्च॑ति । ब्र॒ह्मव॑र्च॒समे॒वास्मिन्-त्वि॑षिं दधाति ।

औ॒दु॒म्बरे॑ण रा॒ज॒न्यः । ऊ॒र्जमे॒वास्मिन्-न्न॑न्नाद्यं दधाति । आ॒श्वत्थे॑न वै॒श्यः ।

वि॒शमे॒वास्मिन् पु॑ष्टिं दधाति । नै॒यग्रो॑धे॒न ज॒न्यः() ।

मि॒त्राण्ये॒वास्मै॑ कल्पयति । अथो॑ प्र॒तिष्ठि॑त्यै । 52 (12)

(भव - त्याहुः - पुरुष - ओजसेत्याह - निरवदयते - यजते -
जन्यो द्वे च) (A8)

1.7.9 अनुवाकं 9 – स्थारोहणम्. विजयः

T.B.1.7.9.1

इन्द्रस्य वज्रोऽसि वार्त्रघ्न इति रथमुपावहरति विजित्यै ।
मित्रावरुणयोस्त्वा प्रशास्त्रोः प्रशिषा युनज्मीत्याह ।
ब्रह्मणैवैनं देवताभ्यां युनक्ति । प्रष्टिवाहिनं युनक्ति ।
प्रष्टिवाही वै देवरथः । देवरथ-मेवास्मै युनक्ति । त्रयोऽश्वा भवन्ति ।
रथश्चतुर्थः । द्वौ सव्येष्ठसारथी । षट्थं संपद्यन्ते । 53 (10)

T.B.1.7.9.2

षड्वा ऋतवः । ऋतुभिरेवैनं युनक्ति । विष्णुक्रमान्-क्रमते ।
विष्णुरेव भूत्वैमान् लोकानभिजयति । यः क्षत्रियः प्रतिहितः ।
सोऽन्वारभते । राष्ट्रमेव भवति । त्रिष्टुभाऽन्वारभते ।
इन्द्रियं वै त्रिष्टुक् । इन्द्रियमेव यजमाने दधाति । 54 (10)

T.B.1.7.9.3

म॒रुतां॑ प्र॒सवे॑ जे॒षमि॒त्याह॑ । म॒रुद्भिरे॒व प्र॒सूत॑ उ॒ज्जय॑ति । आ॒प्तं म॒न॒
इ॒त्याह॑ । यदे॒व म॒नसै॒प्सीत्॑ । तदा॑पत् । रा॒जन्यं॑ जि॒नाति॑ ।
अ॒नाक्रान्त॑ ए॒वाक्रम॑ते । वि॒ वा ए॒ष इन्द्रि॑येण वी॒र्येण॑द॒र्ध्यते॑ ।
यो रा॒जन्यं॑ जि॒नाति॑ । स॒महमिन्द्रि॑येण वी॒र्येणे॑त्याह । 55 (10)

T.B.1.7.9.4

इन्द्रि॑यमे॒व वी॒र्यमा॑त्मन्-ध॒त्ते । प॒शूनां॑ म॒न्युर॑सि तवे॒व मे
म॒न्युर्भूया॑दिति॒ वारा॑ही उ॒पान॑हावुप मु॒ञ्चते॑ । प॒शूनां॑ वा ए॒ष म॒न्युः ।
यद् व॑राहः । तेनै॒व प॒शूनां॑ म॒न्युमा॑त्मन् ध॒त्ते । अ॒भि वा इ॒यञ्
सुषु॑वाणं का॒मय॑ते । तस्यै॒श्वरेन्द्रि॑यं वी॒र्यमा॑दातोः ।
वारा॑ही उ॒पान॑हावुपमु॒ञ्चते॑ । अ॒स्या ए॒वान्त॑र्ध॒त्ते ।
इन्द्रि॑यस्य वी॒र्यस्या॑ना॒त्यै । 56 (10)

T.B.1.7.9.5

नमो॑ मा॒त्रे पृ॒थिव्या॑ इ॒त्याहा॑हिञ् सायै॑ । इ॒यद॑स्या-यु॒रस्या॑यु॒र्मे
धे॒हीत्या॑ह । आ॒युरे॒वात्मन्-ध॒त्ते । ऊ॒र्गस्यूर्जं॑ मे धे॒हीत्या॑ह ।
ऊ॒र्जमे॒वात्मन् ध॒त्ते । यु॒ङ्क्षि॑सि॒ वर्चो॑ऽसि॒ वर्चो॑ मयि॒ धे॒हीत्या॑ह ।

वर्च॑ ए॒वा॒त्मन् ध॑त्ते । ए॒क॒धा ब्र॑ह्मण॒ उप॑ हरति । ए॒क॒धै॒व यज॑मान॒
आयु॑रूर्जं॒ ँव॑र्चो॒ दधा॑ति । रथ॑विमो॒चनी॑या जुहोति॒ प्रति॑ष्ठित्यै । 57 (10)

T.B.1.7.9.6

त्रयो॑ऽश्वा भवन्ति । रथ॑श्चतु॒र्थः । तस्मा॑-च्चतु॒र्जुहो॑ति । यदु॒भौ
सहा॑वतिष्ठेताम् । समा॑नं लो॒कमि॑याताम् । सह॑ संग्रही॒त्रा रथ॑वाह॒ने रथ॑
माद॑धाति । सु॒वर्गादि॑वैनं लो॒काद॑न्तर्दधाति । ह॒सः शु॒चिष॑दित्या दधाति ।
ब्रह्म॑णै॒वैन॑-मुपावहरति । ब्रह्म॑णा ऽऽदधाति () ।
अति॑च्छन्द॒सा ऽऽद॑धाति । अति॑च्छन्दा॒ वै सर्वा॑णि छन्दा॒सि ।
सर्वे॑भिरे॒वैनं॑ छन्दो॒भि-रा॑दधाति । वर्ष॑ वा ए॒षा छ॑न्दसाम् ।
यदति॑च्छन्दाः । यदति॑च्छन्द॒सा द॑धाति । वर्ष॑मै॒वैन॑ समाना॑नां
करो॑ति । 58 (17) (प॒द्यन्ते॑ - द॒धाति॑ - वी॒र्ये॑णेत्याहा -
ना॒त्यै - प्र॑ति॒ष्ठित्यै॑ - ब्रह्म॑णाऽऽद॒धाति॑ सप्त॒ च) (A9)

1.7.10 अनुवाकं 10 – आसने समुपवेशः सर्वैस्सेव्यत्वं च

T.B.1.7.10.1

मि॒त्रो॒ऽसि॒ वरु॑णो॒ऽसीत्या॑ह । मै॒त्रं वा॑ अ॒हः । वारु॑णी रा॒त्रिः ।
 अ॒हो॒रा॒त्राभ्या॑-मे॒वैन॑-मु॒पाव॑हरति । मि॒त्रो॒ऽसि॒ वरु॑णो॒सीत्या॑ह ।
 मै॒त्रो वै दक्षि॑णः । वारु॑णः स॒व्यः । वै॒श्वदे॑व्यामि॒क्षा ॥
 स्वमे॒वैनौ॑ भा॒गधे॑य-मु॒पाव॑हरति । स॒महं॑ वि॒श्वैर्दे॑वै-रि॒त्याह॑ । 59 (10)

T.B.1.7.10.2

वै॒श्वदे॑व्यो वै प्र॒जाः । ता ए॒वाद्याः॑ कुरु॒ते । क्ष॒त्रस्य॑ ना॒भिर॑सि
 क्ष॒त्रस्य॑ यो॒नि-र॒सीत्य॑धी॒वास॑मा-स्तृ॒णाति॑ स॒योनि॑त्वाय ।
 स्यो॒नामा॑सीद सु॒षदा॑मासीदे॒त्याह॑ । यथा॑ यजु॒रेवै॑ तत् ।
 मा त्वा हि॒ऽसीन् मा॑ मा हि॒ऽसीदि॑त्याहा-हि॒ऽसायै॑ ।
 निष॑साद धृ॒तव्र॑तो वरु॑णः प॒स्त्या॑स्वा सा॒म्राज्या॑य सु॒क्रतु॑रि॒त्याह॑ ।
 सा॒म्राज्य॑मे॒वैनं॑ सु॒क्रतुं॑ करोति । ब्र॒ह्मा(३)॑न्त्व॒ राज॑न्-ब्र॒ह्माऽसि॑
 स॒विता॑ऽसि स॒त्यस॑व इ॒त्याह॑ ।
 स॒वितार॑-मे॒वैनं॑ स॒त्यस॑वं करोति । 60 (10)

T.B.1.7.10.3

ब्रह्मा(३)न्त्व॑ राजन्-ब्रह्मा॑सीन्द्रो॑ऽसि सत्यौजा॑ इत्याह ।
 इन्द्र॑मेवैन॑ सत्यौज॑सं करोति । ब्रह्मा(३)न्त्व॑ राजन्-ब्रह्मा॑सि
 मित्रो॑ऽसि सुशे॑व इत्याह । मित्र॑मेवैन॑ सुशे॑वं करोति ।
 ब्रह्मा(३)न्त्व॑ राजन्-ब्रह्मा॑सि वरुणो॑ऽसि सत्यध॑र्मेत्याह ।
 वरुण॑मेवैन॑ सत्यध॑र्माणं करोति । सविता॑ऽसि सत्य॑सव इत्याह ।
 गाय॑त्री-मेवै॑तेनाभिव्याहरति । इन्द्रो॑ऽसि सत्यौजा॑ इत्याह ।
 त्रिष्टु॑भ-मेवै॑तेनाभि-व्याहरति । 61 (10)

T.B.1.7.10.4

मित्रो॑ऽसि सुशे॑व इत्याह । जग॑ती-मेवै॑तेनाभिव्याहरति ।
 सत्य॑मेता दे॒वताः । सत्य॑मेतानि छन्दा॑ऽसि । सत्य॑मेवाव रुन्धे ।
 वरुणो॑ऽसि सत्यध॑र्मेत्याह । अनुष्टु॑भ-मेवै॑तेनाभिव्याहरति ।
 सत्या॑नृते वा अनुष्टु॑प् । सत्या॑नृते वरुणः ।
 सत्या॑नृते ए॒वावरु॑न्धे । 62 (10)

T.B.1.7.10.5

नैन॑ स॒त्यानृ॒ते उ॒दिते॑ हि॒स्तः । य ए॒वं वे॒द । इन्द्र॑स्य वज्रो॑ऽसि
 वार्त्र॑घ्न इति स्फ्यं प्रयच्छति । वज्रो॑ वै स्फ्यः ।
 वज्रे॑णैवास्मा॑ अवरपर॑ रन्धयति । एव॑ हि तच्छ्रेयः ।
 यदस्मा॑ एते र॒थ्येयुः॑ । दि॒शोऽभ्यय॑ राजा॑ ऽभू॒दिति॑ पञ्चाक्षान्-प्रयच्छति ।
 एते॑ वै सर्वे॑ऽयाः । अपरा॑जायिन-मे॒वैनं॑ करोति । 63 (10)

T.B.1.7.10.6

ओ॒दनमुद्ब्रु॑वते । पर॒मेष्ठी॑ वा ए॒षः । यदो॑दनः । पर॒मामे॒वैन॑ श्रियं
 गम॑यति । सु॒श्लोकां॑(4) सु॒मङ्गलां॑(4) स॒त्यरा॑जा(3)नित्याह ।
 आ॒शिषमे॒वैता॑मा शास्ते । शौनः॑ शो॒पमा॑ख्यापयते । वरु॑णपाशा-
 दे॒वैनं॑ मुञ्चति । परः॑ शतं भवति । श॒तायुः॑ पु॒रुषः॑ श॒तेन्द्रि॑यः() ।
 आयु॑ष्येवेन्द्रि॒ये प्र॑तितिष्ठति । मारु॑तस्य चै॒कवि॑श॒तिक॑पालस्य
 वैश्व॑दे॒व्यै चा॑मिक्षाया अ॒ग्नये॑ स्विष्ट॒कृते॑ स॒मव॑द्यति ।
 दे॒वता॑भिरे॒वैन-मु॑भयतः परिगृह्णाति । अ॒पां न॒प्त्रे स्वा॑होर्जो
 न॒प्त्रे स्वा॑हा॒ऽग्नये॑ गृह॒पतये॑ स्वाहेति॑ तिस्र आ॒हुती॑र् जुहोति ।

त्रय॑ इ॒मे लो॒काः । ए॒ष्वे॒व लो॒केषु॑ प्र॒ति ति॑ष्ठति । 64 (16)

(दे॒वैरि॒त्याह॑ – स॒त्यस॑वं॒ करो॑ति – त्रि॒ष्टुभ॑मे॒वैते॑ना॒भि व्या॑हरति – स॒त्यानृ॑ते
ए॒वाव॑रुन्धे – करो॑ति – श॒तेन्द्रि॑यः षट्च) (A10)

Prapaataka Korvai with starting Padams of 1 to 10 Anuvaakams :-

(ए॒तद् ब्रा॑ह्म॒णानि॑ – धा॒त्रे – रा॒त्निनां॑ – दे॒वसु॑वा – म॒र्थे॒तो – दे॒वीर् –
दि॒शः – सो॒मस्ये॑ – न्द्र॒स्य – मि॒त्रो द॑श)

Korvai with starting Padams of 1, 11, 21 Series of Dasanis :-

(ए॒तद् ब्रा॑ह्म॒णानि॑ – वै॒ष्णवं॑ त्रि॒कपा॑ल – म॒न्नं वै पू॒षा – वा॒शाः स्था॑त्याह
– दि॒शो व्या॑स्था॒पय॑ – त्पु॒दङ्प॑रेत्य –
ब्र॒ह्मा(३)न्त्व॑ राजं॒ चतु॑ष्षष्टिः

First and Last Padam of 7th Prapaatakam :-

(ए॒तद् ब्रा॑ह्म॒णानि॑ – प्र॒ति ति॑ष्ठति)

। हरिः ओँ ।

। कृष्ण यजुर्वेदीय तैत्तिरीय ब्राह्मणे प्रथमाष्टके

सप्तमः प्रपाठकः समाप्तः ।

=====

**1.7Details of Dasani & Vaakyams for Ashtakam 1 –
Prapaatakam 7 – TB 1.7**

	Dasani	Vaakyams
Anuvakam 1	9	93
Anuvakam 2	6	61
Anuvakam 3	8	82
Anuvakam 4	4	41
Anuvakam 5	5	56
Anuvakam 6	8	84
Anuvakam 7	5	55
Anuvakam 8	7	72
Anuvakam 9	6	67
Anuvakam 10	6	66
Total →	64	677

1.8 प्रथमाष्टके अष्टमः प्रपाठकः – राजसूयानुब्राह्मणं

1.8.1 अनुवाकं 1 – संसृपां हवींषि दश

T.B.1.8.1.1

वरुणस्य सुषुवाणस्य दशधेन्द्रियं वीर्यं पराऽपतत् ।
तथ्सꣳ सृद्धिरनु समसर्पत् । तथ्सꣳ सृपाꣳ सꣳ सृत्वम् ।
अग्निना देवेन प्रथमे ऽहन्ननु प्रायुङ्क्त । सरस्वत्या वाचा द्वितीयै ॥
सवित्रा प्रसवेन तृतीयै ॥ पुष्पा पशुभिश्चतुर्थै ।
बृहस्पतिना ब्रह्मणा पञ्चमे । इन्द्रेण देवेन षष्ठे ।
वरुणेन स्वया देवतया सप्तमे । 1 (10)

T.B.1.8.1.2

सोमेन राज्ञाऽष्टमे । त्वष्टा रूपेण नवमे । विष्णुना यज्ञेनाप्नोत् ।
यथ्सꣳ सृपो भवन्ति । इन्द्रियमेव तद्-वीर्यं यजमान आप्नोति ।
पूर्वा पूर्वा वेदिर्भवति । इन्द्रियस्य वीर्यस्यावरुद्ध्यै ।
पुरस्ता-दुपसदाꣳ सौम्येन प्रचरति । सोमो वै रेतोधाः ।
रेत एव तद्-दधाति () । अन्तरा त्वाष्ट्रेण ।
रेत एव हितं त्वष्टा रूपाणि विकरोति । उपरिष्ठाद्-वैष्णवेन ।

य॒ज्ञो वै वि॒ष्णुः॑ । य॒ज्ञ ए॒वान्त॑तः प्र॒ति ति॑ष्ठति । 2 (15)

(स॒प्तमे॑ – द॒धाति॑ पञ्च॑ च) (A1)

1.8.2 अनुवाकं 2 – दशपेयः

T.B.1.8.2.1

जा॒मि वा ए॒तत् कु॑र्वन्ति । यथ्सद्यो दी॒क्षय॑न्ति सद्यः सोमं क्री॑णन्ति ।
पु॒ण्डरि॒स्रजां॑ प्रयच्छत्यजा॑मित्वाय । अ॒ङ्गिर॑सः सु॒वर्गं लो॑कं य॑न्तः ।
अ॒प्सु दी॑क्षातपसी प्रावे॑शयन् । तत् पु॒ण्डरी॑क-मभवत् ।
यत् पु॒ण्डरि॒स्रजां॑ प्रयच्छति । साक्षादे॒व दी॑क्षातपसी अ॒वरु॑न्धे ।
द॒शभि॑र्वथ्सतरैः सोमं क्री॑णाति । द॒शाक्ष॑रा वि॒राट् । 3 (10)

T.B.1.8.2.2

अ॒न्नं वि॒राट् । वि॒राजै॑वान्नाद्यम॒व रु॑न्धे । मु॒ष्करा॑ भवन्ति से॒न्द्रत्वा॑य ।
द॒शपे॑यो भवति । अ॒न्नाद्य॑स्याव॒रुद्ध्यै॑ । श॒तं ब्रा॑ह्मणाः पि॒बन्ति॑ ।
श॒तायुः॑ पु॒रुषः॑ श॒तेन्द्रि॑यः । आ॒युष्ये॑वेन्द्रि॒ये प्र॒ति ति॑ष्ठति ।
स॒प्तद॑श॒ स्तोत्रं॑ भवति । स॒प्तद॑शः प्र॒जाप॑तिः । 4 (10)

T.B.1.8.2.3

प्र॒जाप॑ते॒राप्त्यै॑ । प्र॒का॒शाव॑ध्व॒र्यवे॑ द॒दाति॑ । प्र॒का॒श-मे॒वैनं॑ ग॒मय॑ति ।
 स्रज॑मुद्-गा॒त्रे । व्ये॑वास्मै॑ वा॒सय॑ति । रु॒क्मं॑ हो॒त्रे ।
 आ॒दि॒त्यमे॒वास्मा॑ उ॒न्नय॑ति । अ॒श्वं प्र॑स्तोतृ॒प्रति॑हर्तृ॒भ्याम्॑ ।
 प्रा॒जाप॑त्यो वा अ॒श्वः । प्र॒जाप॑ते॒राप्त्यै॑ । 5 (10)

T.B.1.8.2.4

द्वा॒दश॑-प॒ष्ठौही॑र्-ब्र॒ह्मणे॑ । आ॒युरे॑वाव-रु॒न्धे । व॒शां मै॑त्राव॒रुणा॑य ।
 रा॒ष्ट्रमे॒व व॑श्य॒कः । ऋ॒षभं॑ ब्रा॒ह्मणा॑च्छ॒सिने॑ । रा॒ष्ट्र-मे॒वेन्द्रि॑या॒व्यकः॑ ।
 वा॒ससी॑ ने॒ष्टापो॑तृ॒भ्यां । प॒वित्रे॑ ए॒वास्यै॑ते । स्था॒रि य॑वा॒चित-
 म॒च्छावा॑काय । अ॒न्तत॑ ए॒व व॑रु॒णम॑व॒ यज॑ते । 6 (10)

T.B.1.8.2.5

अ॒न॒ड्वाह॑-म॒ग्नीधे॑ । वह्नि॒र्वा अ॑न॒ड्वान् । वह्नि॒रग्नी॑त् । वह्नि॒नैव॑ वह्नि॒
 य॒ज्ञस्या॑व॒रुन्धे॑ । इन्द्र॑स्य सु॒षुवा॑णस्य त्रे॒धेन्द्रि॑यं वी॒र्यं॑ प॒राऽप॑तत् ।
 भृ॒गु-स्तृ॑तीय-म॒भवत् । श्रा॒यन्ती॑यं तृ॒तीयम् । स॒रस्व॑ती तृ॒तीयम् ।
 भा॒र्गवो॑ हो॒ता भ॑वति । श्रा॒यन्ती॑यं ब्र॒ह्मसा॑मं भ॒वति॑ () ।
 वा॒रव॑न्तीय-म॒ग्निष्टो॑म-सा॒मम् । सा॒रस्व॑ती॒रपो॑ गृ॒ह्णाति॑ ।

इन्द्रि॒यस्य॑ वी॒र्य॑स्याव॒-रु॒द्ध्यै॑ । श्राय॑न्तीयं ब्र॒ह्म॒सामं॑ भवति ।
 इन्द्रि॒यमे॒वास्मिन्॑ वी॒र्यं॑ श्रयति । वार॑वन्तीय-मग्नि॒ष्टोम॑-सामम् ।
 इन्द्रि॒यमे॒वास्मिन्॑ वी॒र्यं॑ वारयति । 7 (17) (वि॒राट् - प्र॒जाप॑ति - रश्चः॑
 प्र॒जाप॑ते॒राप्त्यै॑ - यज॑ते - ब्र॒ह्म॒सामं॑ भवति सप्त च) (A2)

1.8.3 अनुवाकं 3 – दिशामवेष्टयः, पशुबन्धः, सात्यदूतहवींषि च

T.B.1.8.3.1

ई॒श्वरो॑ वा ए॒ष दि॒शोऽनु॑न्-मदि॒तोः॑ । यं दि॒शोऽनु॑ व्यास्थापयन्ति ।
 दि॒शाम॑वेष्टयो भवन्ति । दि॒क्ष्वे॒व प्र॑ति तिष्ठत्यनु॒न्मादा॑य । पञ्च॑ दे॒वता॑
 यज॑ति । पञ्च॑ दि॒शः॑ । दि॒क्ष्वे॒व प्र॑ति तिष्ठति । ह॒विषो॑ ह॒विष॑ इष्ट्वा
 बा॒र्ह॒स्पत्य॑-म॒भिघा॑रययति । यज॑मानदे॒वत्यो॑ वै बृ॒ह॒स्पतिः॑ ।
 यज॑मानमे॒व ते॒जसा॑ सम॒र्धय॑ति । 8 (10)

T.B.1.8.3.2

आ॒दि॒त्यां म॒ल्हां॑ गर्भि॒णीमा॑ ल॒भते॑ । मा॒रुतीं॑ पृ॒श्निं प॑ष्ठौहीम् ।
 वि॒शं चै॒वास्मै॑ रा॒ष्ट्रं च॑ समी॒ची द॑धाति । आ॒दि॒त्यया॑ पू॒र्वया॑ प्र॒चर॑ति ।
 मा॒रुत्यो॑त्तरया । रा॒ष्ट्र ए॒व वि॒शम॑नुब॒ध्नाति॑ । उ॒च्चैरा॑दि॒त्याया॑ आ॒श्राव॑यति ।
 उपा॑ंशु मा॒रुत्यै॑ । तस्मा॑द्-रा॒ष्ट्रं वि॒शम॑तिवदति ।

गर्भिण्यादित्या भवति । 9 (10)

T.B.1.8.3.3

इन्द्रियं वै गर्भः । राष्ट्र-मेवेन्द्रियाव्यकः । अगर्भा मारुती ।
विड्वै मरुतः । विशमेव निरिन्द्रियामकः । देवासुराः सम्यक्ता आसन् ।
ते देवा अश्विनोः पूषन्-वाचः सत्यं संनिधाय ।
अनृतेनासुरा-नभ्यभवन् । तेऽश्विभ्यां पूष्णे पुरोडाशं द्वादशकपालं
निरवपन् । ततो वै ते वाचः सत्यमवारुन्धत । 10 (10)

T.B.1.8.3.4

यदश्विभ्यां पूष्णे पुरोडाशं द्वादशकपालं निर्वपति ।
अनृतेनैव भ्रातृव्या-नभिभूय । वाचः सत्यमवरुन्धे ।
सरस्वते सत्यवाचे चरुम् । पूर्वमेवोदितम् । उत्तरेणाभि गृणाति ।
सवित्रे सत्यप्रसवाय पुरोडाशं द्वादशकपालं प्रसूत्यै । दूतान्-प्रहिणोति ।
आविद एता भवन्ति । आविदमेवैनं गमयन्ति () ।
अथो दूतेभ्य एव न छिद्यते ।
तिसृधन्वं शुष्कदृतिर्-दक्षिणा समृद्ध्यै । 11 (12)

(अ॒र्ध॒य॒ति – भ॒व – त्प॒रु॒न्ध॒त – ग॒म॒य॒न्ति द्वे च॑) (A3)

1.8.4 अनुवाकं 4 – प्रयुजां हवींषि द्वादश

T.B.1.8.4.1

आ॒ग्ने॒य-म॒ष्टाक॑पालं॒ निर्व॑पति । तस्मा॑-च्छि॒शिरे॑ कुरु॒पञ्च॑ालाः
प्रा॒ञ्चो॑ या॒न्ति । सौ॒म्यं च॒रुम् । तस्मा॑द्-वस॒न्तं व्य॑वसायादयन्ति ।
सा॒वि॒त्रं द्वा॒दश॑कपालम् । तस्मा॑त्-पु॒रस्ता॑द्-यवा॒नां स॒वि॒त्रा वि॒रु॒न्ध॒ते ।
बा॒र्ह॒स्प॒त्यं च॒रुम् । स॒वि॒त्रैव॑ वि॒रु॒ध्य । ब्र॒ह्म॒णा यवा॑नादधते ।
त्वाष्ट्र॑-म॒ष्टाक॑पालम् । 12 (10)

T.B.1.8.4.2

रूपा॑ण्येव तेन कुर्वते । वै॒श्वान॑रं द्वा॒दश॑कपालम् ।
तस्मा॑ज्जघ॒न्ये नै॒दा॒घे प्र॒त्यञ्चः॑ कुरु॒पञ्च॑ाला या॒न्ति ।
सा॒र॒स्व॒तं च॒रुं निर्व॑पति । तस्मा॑त्-प्रा॒वृषि॑ सर्वा॒ वाचो॑ वदन्ति ।
पौ॒ष्णेन॑ व्य॒वस्य॑न्ति । मै॒त्रेण॑ कृषन्ते । वा॒रु॒णेन॑ वि॒धृता॑ आसते ।
क्षै॒त्र॒प॒त्येन॑ पाचयन्ते । आ॒दि॒त्येना॑दधते । 13 (10)

T.B.1.8.4.3

मा॒सि॒मा॒स्ये॒तानि॑ ह॒वी॒षि॑ नि॒रु॒प्या॒णी॒त्याहुः॑ । ते॒नै॒वर्तून्-प्र॒यु॒ङ्क्ते॑ इति॑ ।

अथो॑ ख॒ल्वाहुः॑ । कः॑ स॒म्व॑त्स॒रं जी॒विष्य॑तीति॑ ।

षडे॒व पूर्वे॑द्यु॒र्निरु॒प्याणि॑ । षडु॑त्तरे॒द्युः । ते॒नै॒वर्तून्-प्र॒यु॒ङ्क्ते॑ ।

दक्षि॑णो रथ॒वाहन॑वाहः पूर्वे॑षां दक्षि॑णा । उत्तर॑ उत्तरे॑षाम् ।

स॒म्व॑त्स॒रस्यै॒वान्तौ॑ यु॒नक्ति॑ () । सु॒वर्ग॑स्य लो॒कस्य॑ स॒मष्ट्यै॑ । 14 (11)

(त्वाष्ट्र॑माष्ट॒कपालं॑ - दध॑ते - यु॒नक्त्ये॑कं च) (A4)

1.8.5 अनुवाकं 5 - सौत्रामणिः, पशवः, हवींषि च

T.B.1.8.5.1

इन्द्र॑स्य सु॒षुवा॒णस्य॑ द॒शधे॑न्द्रि॒यं वी॒र्यं॑ प॒राऽप॑तत् । स यत् प्र॒थमं॑

नि॒र॒ष्ठीव॑त् । तत्-क्व॑लम॒भवत् । यद्-द्वि॒तीयम् । तद्-ब॑दरम् ।

यत्-तृ॒तीयम् । तत्-क॑र्कन्धु । यन्न॑स्तः । स सि॒ंहः ।

यदक्ष्योः॑ । 15 (10)

T.B.1.8.5.2

स शार्दूलः॑ । यत्-कर्ण॑योः । स वृ॒कः । य ऊ॒र्ध्वः । स सोमः॑ ।

या ऽवा॑ची । सा सु॒रा । त्रयाः॑ स॒क्तवो॑ भवन्ति ।

इन्द्रि॒यस्याव॑-रु॒द्ध्यै । त्रया॑णि लो॒मानि । 16 (10)

T.B.1.8.5.3

त्विषि॑मे॒वाव रु॒न्धे । त्रयो॑ ग्र॒हाः । वी॒र्य॑मे॒वाव रु॒न्धे । ना॒म्ना द॑श॒मी ।

न॒व वै पु॑रु॒षे प्रा॒णाः । ना॒भिर्द॑श॒मी । प्रा॒णा इन्द्रि॑यं वी॒र्य॑म् ।

प्रा॒णाने॒वेन्द्रि॑यं वी॒र्यं य॑ज॒मान आ॒त्मन्-ध॑त्ते । सी॒सेन

क्ली॒बाच्छ॑ष्पाणि क्री॒णाति । न वा ए॒तद॒यो न हि॑रण्यम् । 17 (10)

T.B.1.8.5.4

यथ्-सी॒सम् । न स्त्री॑ न पु॒मान् । यत्-क्ली॒बः । न सो॒मो न सु॒रा ।

यथ्-सौ॒त्राम॑णी स॒मृद्ध्यै । स्वा॒द्वीं त्वा॑ स्वा॒दुने॑त्याह ।

सो॒ममे॒वैनां॑ करो॒ति । सो॒मोऽस्य॑श्चि॒भ्यां प॑च्यस्व स॒रस्व॑त्यै

प॑च्यस्वेन्द्रा॒य सु॒त्राम्णो॑ प॑च्यस्वेत्याह । ए॒ताभ्यो॑ ह्ये॒षा दे॒वता॑भ्यः प॑च्यते ।

ति॒स्रः स॒सृ॒ष्टा व॑सति । 18 (10)

T.B.1.8.5.5

ति॒स्रो हि रा॒त्रीः क्री॒तः सो॒मो व॑सति । पु॒नातु॑ ते परि॒स्रुत॑मिति य॒जुषा॑

पु॒नाति॑ व्यावृ॒त्त्यै । प॒वित्रे॑ण पु॒नाति॑ । प॒वित्रे॑ण हि सो॒मं पु॒नन्ति॑ ।

वा॒रेण॑ श॒श्वता॑ तनेत्याह । वा॒रेण॑ हि सो॒मं पु॒नन्ति॑ ।

वा॒युः पू॒तः प॒वि॒त्रेणे॑ति नै॒तया॑ पु॒नीया॑त् । व्यृ॒द्धा ह्ये॑षा ।

अ॒ति॒प॒वि॒त॒स्यै॑तया पु॒नीया॑त् । कु॒वि॒दङ्गे॑-त्य॒नि॒रु॒क्तया॑

प्रा॒जा॒प॒त्यया॑ गृ॒ह्णा॑ति । 19 (10)

T.B.1.8.5.6

अ॒नि॒रु॒क्तः प्र॒जा॒प॒तिः । प्र॒जा॒प॒ते॒राप्त्यै॑ । ए॒क॒य॒र्चा गृ॒ह्णा॑ति ।

ए॒क॒धै॒व य॒ज॒मा॒ने वी॒र्यं॑ द॒धा॑ति । आ॒श्वि॒नं धू॒म्र॒मा ल॑भते ।

अ॒श्वि॒नौ वै दे॒वानां॑ भि॒षजौ॑ । ता॒भ्यामे॒वास्मै॑ भे॒षजं॑ क॒रो॑ति ।

सा॒र॒स्व॒तं मे॒षम् । वा॒ग्वै सर॑स्वती । वा॒चै॒वैनं॑ भि॒षज्य॑ति () ।

ऐ॒न्द्र॒मृष॑भ॒ः से॒न्द्र॒त्वाय॑ । 20 (11) (अ॒क्ष्योर् - लो॒मानि॑ - हि॒र॒ण्यं -

व॒स॒ति - गृ॒ह्णा॑ति - भि॒षज्य॑त्ये॒कं च॑) (A5)

1.8.6 अनुवाकं 6 - सौत्रामणिः, पशवः, हवींषि च

T.B.1.8.6.1

यत्-त्रि॒षु यू॒पेष्वा॑-ल॒भेत॑ । ब॒हि॒र्धा ऽस्मा॑दि॒न्द्रि॒यं वी॒र्यं॑ द॒ध्या॑त् ।

भ्रा॒तृ॒व्य॒मस्मै॑ ज॒नये॑त् । ए॒क॒यू॒प आ॑ल॒भते॑ ।

ए॒क॒धै॒वास्मि॑-त्रि॒न्द्रि॒यं वी॒र्यं॑ द॒धा॑ति । ना॒स्मै भ्रा॒तृ॒व्यं ज॒नय॑ति ।

नै॒तेषां॑ प॒शूनां॑ पु॒रोडा॑शा भवन्ति । ग्र॒हपु॑रोडाशा ह्ये॒ते ।

यु॒वꣳ सु॒राम॑मश्चि॒नेति॑ स॒र्वदे॒वत्ये॑ या॒ज्यानु॑वाक्ये भवतः ।

स॒र्वा ए॒व दे॒वताः॑ प्रीणाति । 21 (10)

T.B.1.8.6.2

ब्रा॒ह्मणं॑ प॒रि॒क्रीणी॑या-दु॒च्छे॑षणस्य पा॒तार॑म् । ब्रा॒ह्मणो॑ ह्याहु॒त्या
उ॒च्छे॑षणस्य पा॒ता । य॒दि ब्रा॒ह्मणं॑ न वि॒न्देत् । व॒ल्मी॒कव॑पायाम॒व न॑येत् ।

सै॒व त॒तः प्रा॑यश्चि॒त्तिः । यद्-वै सौ॑त्राम॒ण्यै व्यृ॑द्धम् । त॒दस्यै॑
स॒मृद्ध॑म् । ना॒नादे॒वत्याः॑ प॒शव॑श्च पु॒रोडा॑शाश्च भवन्ति स॒मृद्ध्यै॑ ।

ऐ॒न्द्रः प॒शूनामु॑त्त॒मो भ॑वति । ऐ॒न्द्रः पु॒रोडा॑शानां प्रथ॒मः । 22 (10)

T.B.1.8.6.3

इ॒न्द्रि॒ये ए॒वास्मै॑ स॒मीची॑ दधाति । पु॒रस्ता॑-द॒नूया॒जानां॑ पु॒रोडा॑शैः
प्र॒चर॑ति । प॒शवो॑ वै पु॒रोडा॑शाः । प॒शूने॒वाव रु॑न्धे ।

ऐ॒न्द्र-मे॒काद॑शकपालं निर्व॒पति॑ । इ॒न्द्रि॒यमे॒वाव-रु॑न्धे ।

सा॒वि॒त्रं द्वा॒दश॑कपालं प्र॒सूत्यै॑ । वा॒रुणं॑ द॒शक॑पालम् ।

अ॒न्त॒त ए॒व व॑रुणम॒व-य॑जते । व॒ड॒बा द॑क्षिणा । 23 (10)

T.B.1.8.6.4

उ॒त वा ए॒षाऽश्व॑ꣳ सू॒ते । उ॒ताश्व॑तर॒म् । उ॒त सोम॑ उ॒त सुरा॑ ॥
यथ्-सौ॒त्राम॑णी॒ समृ॑द्ध्यै । बा॒र्हस्प॑त्यं प॒शुं चतु॑र्थ-
म॒तिप॑वि॒तस्या॑ल॒भते॑ । ब्र॒ह्म वै दे॒वानां॑ बृ॒हस्प॑तिः । ब्र॒ह्मणै॑व य॒ज्ञस्य॑
व्यृ॒द्धम॑पि-व॒पति॑ । पु॒रोडा॑शवा॒नेष प॒शुर्भ॑वति । न ह्ये॒तस्य॑ ग्र॒हं
गृ॒ह्णन्ति॑ । सोम॑प्र॒तीकाः पि॒तर-स्तृ॑ष्णु॒तेति॑ श॒तातृ॑ष्णायाꣳ
सम॑वनयति । 24 (10)

T.B.1.8.6.5

श॒तायुः॑ पु॒रुषः॑ श॒तेन्द्रि॑यः । आ॒युष्ये॑वेन्द्रि॒ये प्र॑ति॒तिष्ठ॑ति ।
दक्षि॑णेऽनौ जुहोति । पा॒पव॑स्य॒सस्य॑ व्यावृ॒त्त्यै । हि॒रण्य॑मन्तरा धा॒रय॑ति ।
पू॒तामे॒वैनां॑ जुहोति । श॒तमा॑नं भवति । श॒तायुः॑ पु॒रुषः॑ श॒तेन्द्रि॑यः ।
आ॒युष्ये॑वेन्द्रि॒ये प्र॑ति तिष्ठति । यत्रै॒व श॒तातृ॑ष्णां धा॒रय॑ति । 25 (10)

T.B.1.8.6.6

तन्नि॑दधाति प्र॒तिष्ठि॑त्यै । पि॒तृन् वा ए॒तस्ये॑न्द्रि॒यं वी॒र्यं॑ गच्छति ।
यꣳ सोमो॑ऽति॒पव॑ते । पि॒तृणां॑ या॒ज्या-नु॒वाक्या॑भिरुप तिष्ठते ।

यदे॒वास्य॑ पि॒तृनि॑न्द्रि॒यं वी॒र्यं॑ गच्छति । तदे॒वाव॑ रुन्धे ।
 तिसृ॑भिरुप॒ तिष्ठते॑ । तृती॒ये वा इ॒तो लो॒के पि॒तरः॑ । ताने॒व प्री॑णाति ।
 अथो॒ त्रीणि॑ वै य॒ज्ञस्ये॑न्द्रि॒याणि॑ () । अध्व॒र्युर्-होता॑ ब्र॒ह्मा ।
 त उप॑तिष्ठन्ते । यान्ये॒व य॒ज्ञस्ये॑न्द्रि॒याणि॑ । तैरे॒वास्मै॑ भेष॒जं
 करो॑ति । 26 (14) (प्री॒णाति - प्र॒थमो - दक्षि॑णा - स॒मव॑नयति दृ
 धारय॑ - तीन्द्रि॒याणि॑ च॒त्वारि॑ च) (A6)

1.8.7 अनुवाकं 7 – राजसूयस्याग्रे कर्तव्यं पवित्राख्यमग्निष्टोममहः

T.B.1.8.7.1

अग्नि॑ष्टोममग्र आ॒हरति॑ । य॒ज्ञमु॒खं वा॑ अग्नि॑ष्टोमः । य॒ज्ञमु॒खमे॒वारभ्य॑
 स॒वमा॑क्रमते । अथै॒षो-ऽभिषे॑चनीय-श्चतु॒स्त्रिंश॑पवमानो भवति ।
 त्रय॑स्त्रिंश॒द्वै दे॒वताः॑ । ता ए॒वाप्नो॑ति । प्र॒जाप॑ति-श्चतु॒स्त्रिंशः॑ ।
 तमे॒वाप्नो॑ति । स॒ंशर॑ एष स्तो॒माना॑मयथापूर्वम् ।
 यद्-विष॑माः स्तो॒माः । 27 (10)

T.B.1.8.7.2

ए॒ता॒वा॒न् वै य॒ज्ञः । या॒वा॒न्-प॒व॒मा॒नाः । अ॒न्तः श्ले॒ष॒णं त्वा अ॒न्य॒त् ।
य॒थ्-स॒माः प॒व॒मा॒नाः । ते॒ना॒स॒श्रः । ते॒न य॒था॒पूर्व॒म् ।
आ॒त्म॒नै-वा॒ग्नि॒ष्टोमे॒न॒ध॒र्नो॒ति । आ॒त्म॒ना पु॒ण्यो भ॒व॒ति ।
प्र॒जा वा उ॒क्था॒नि । प॒श॒व उ॒क्था॒नि() । य॒दु॒क्थ्यो भ॒व॒त्य॒नु
सं॒त॒त्यै । 28 (11) (स्ती॒माः - प॒श॒व उ॒क्थान्ये॒कं च) (A7)

1.8.8 अनुवाकं 8 – अभिषेचनीये साममन्त्रविशेषः

T.B.1.8.8.1

उ॒प त्वा जा॒म॒यो गि॒र इति॑ प्र॒ति॒प॒द्भ॒व॒ति । वा॒ग्वै वा॒युः ।
वा॒च ए॒वैषो॑ऽभि॒षे॒कः । स॒र्वा॒सा॒मे॒व प्र॒जा॒ना॒सू॒य॒ते ।
स॒र्वा ए॒नं प्र॒जा रा॒जेति॑ व॒द॒न्ति । ए॒त॒मु॒ त्यं द॒श॒क्षि॒प इ॒त्या॒ह ।
आ॒दि॒त्या वै प्र॒जाः । प्र॒जा॒ना॒मे॒वैते॑न सू॒य॒ते । य॒न्ति वा ए॒ते य॒ज्ञ॒मु॒खा॒त् ।
ये स॒म्भा॒र्या अ॒क्र॒न् । 29 (10)

T.B.1.8.8.2

य॒दा॒ह प॒व॒स्व वा॒चो अ॒ग्रि॒य इति॑ । ते॒नै॒व य॒ज्ञ॒मु॒खा॒न्-न॒य॒न्ति ।
अ॒नु॒ष्टु॒क्-प्र॒थ॒मा भ॒व॒ति । अ॒नु॒ष्टु-गु॒त्त॒मा । वा॒ग्वा अ॒नु॒ष्टु॒क् ।

वा॒चै॒व प्र॒यन्ति॑ । वा॒चो॑द्यन्ति । उ॒द्व॒तीर्-भ॒वन्ति॑ । उ॒द्व॒द्वा अ॒नु॒ष्टु॒भो रू॒पम् ।
आ॒नु॒ष्टु॒भो रा॒ज॒न्यः । 30 (10)

T.B.1.8.8.3

तस्मा॒दु॒द्व॒तीर्-भ॒वन्ति॑ । सौ॒र्य॑नु॒ष्टु-गु॒त्त॒मा भ॒वति॑ ।
सु॒व॒र्ग॒स्य लो॒क॒स्य सं॒त॒त्यै । यो॒ वै स॒वादे॑ति । नै॒नꣳ स॒व उप॑नमति ।
यः सा॒मभ्य॑ ए॒ति । पा॒पी॒या॒न्त्-सु॒षु॒वा॒णो भ॒वति॑ ।
ए॒तानि॑ ख॒लु वै सा॒मानि॑ । यत्पृ॒ष्ठानि॑ । यत्पृ॒ष्ठानि॑ भ॒वन्ति॑ । 31 (10)

T.B.1.8.8.4

तै॒रे॒व स॒वा॒न्नै॒ति । या॒नि दे॒व॒रा॒जा॒नाꣳ सा॒मानि॑ । तै॒र॒मु॒ष्मिन् लो॒क
ऋ॒ध्नो॑ति । या॒नि म॒नु॒ष्य॒रा॒जा॒नाꣳ सा॒मानि॑ । तै॒र॒स्मिन् लो॒क ऋ॒ध्नो॑ति ।
उ॒भयो॑रे॒व लो॒कयो॑र्-ऋ॒ध्नो॑ति । दे॒वलो॑के च म॒नु॒ष्यलो॑के च ।
ए॒क॒वि॒ꣳशो ऽभि॑षे॒चनी॑य-स्यो॒त्त॒मो भ॒वति॑ । ए॒क॒वि॒ꣳशः
के॒श॒व॒पनी॑यस्य प्रथ॒मः । स॒प्त॒द॒शो द॑शपे॒यः । 32 (10)

T.B.1.8.8.5

वि॒ड्वा ए॒क॒वि॒ꣳशः । रा॒ष्ट्रꣳ स॒प्त॒द॒शः । वि॒श ए॒वै॒तन्-
म॒ध्य॒तोऽभि॑षि॒च्य॒ते । तस्मा॒द्वा ए॒ष वि॒शां प्रि॒यः ।

वि॒शो हि म॑ध्यतोऽभि॒षिच्य॑ते । यद्वा ए॒नम॑दो दि॒शोऽनु॑ व्या॒स्थाप॑यन्ति ।
तथ्-सु॒वर्गं लो॒क-म॑भ्या॒रोह॑ति । यदि॒मं लो॒कं न प्र॑त्यव॒रोहे॑त् ।
अति॒ जनं॒ वैया॑त् । उद्वा मा॒द्येत् () । यदेष॑ प्र॒तीची॑न-स्तो॒मो भ॑वति ।
इममे॒व तेन॑ लो॒कं प्र॑त्यव॒रोह॑ति । अथो॑ अ॒स्मिन्ने॒व लो॒के
प्रति॑ तिष्ठत्य-नु॒न्मादा॑य । 33 (13) (अ॒क्रन् - रा॒जन्यो - भ॑वन्ति -
द॒शपे॑यो - मा॒द्येत् त्री॑णि च) (A8)

1.8.9 अनुवाकं 9 - अभिषेचनीयविषययो रुक्मयोः स्तुतिः

T.B.1.8.9.1

इयं॑ वै र॒जता॑ । अ॒सौ ह॑रिणी । यद्-रु॒क्मौ भ॑वतः । आ॒भ्यामे॒वैन-
मु॒भय॑तः परि गृह्णाति । वरु॒णस्य॑ वा अ॒भिषि॑च्यमा॒नस्या॑पः ।
इन्द्रि॒यं वी॑र्यं निर॒घ्नन् । तथ्-सु॒वर्णं॑ हिर॒ण्य-म॑भवत् ।
यद्-रु॒क्म-म॑न्तर्-दधाति । इन्द्रि॒यस्य॑ वी॒र्यस्या॑नि॒र्घाता॑य ।
श॒तमा॑नो भवति श॒तक्ष॑रः () । श॒तायुः॑ पुरु॒षः श॑तेन्द्रि॒यः ।
आयु॑ष्ये॒वेन्द्रि॑ये प्रति तिष्ठति । आयु॑र्वै हिर॒ण्यम् ।
आयु॑ष्या ए॒वैन-म॑भ्यति क्षरन्ति । तेजो॑ वै हिर॒ण्यम् ।

ते॒ज॒स्या॒ ए॒वैन॑म॒भ्यति॑ क्षरन्ति । वर्चो॑ वै हि॒रण्य॑म् ।

वर्च॑स्या॒ ए॒वैन॑म॒भ्यति॑ क्षरन्ति ।

34 (18) (शत॑क्षरो॒ऽष्टौ च॑) (A9)

1.8.10 अनुवाकं 10 – व्युष्टिद्विरात्रं राजसूयान्ते कर्तव्यम्

T.B.1.8.10.1

अप्रति॑ष्ठितो वा ए॒ष इ॒त्याहुः॑ । यो राज॑सूये॒न यज॑त इति ।

यदा वा ए॒ष ए॒तेन॑ द्विरा॒त्रेण॑ यजते । अथ॑ प्रति॒ष्ठा ।

अथ॑ सम्॒व॒त्स॒रमा॑प्नोति । याव॑न्ति सम्॒व॒त्स॒रस्या॑-हो॒रात्रा॑णि ।

ताव॑तीरे॒तस्य॑ स्तो॒त्रीयाः॑ । अ॒हो॒रात्रे॑ष्वे॒व प्रति॑ तिष्ठति ।

अ॒ग्नि॒ष्टोमः॑ पूर्॒वम॑हर्-भवति । अ॒ति॒रात्र॑ उत्तरम् । 35 (10)

T.B.1.8.10.2

नानै॒वाहो॑रात्रयोः प्रति तिष्ठति । पौ॒र्ण॒मास्यां॑ पूर्॒वम॑हर्-भवति । व्य॒ष्ट॒काया॑-

मु॒त्तर॑म् । नानै॒वार्ध॑ मा॒सयोः॑ प्र॒ति॒तिष्ठ॑ति । अ॒मा॒वा॒स्यायां॑ पूर्॒वम॑हर्-भवति ।

उ॒द्वृष्ट॑ उत्तरम् । नानै॒व मा॒सयोः॑ प्रति तिष्ठति ।

अथो॑ खलु । ये ए॒व स॒मान॑पक्षे पु॒ण्याहे॑ स्याताम् ।

तयोः॑ का॒र्यं॑ प्र॒ति॒ष्ठित्यै॑ । 36 (10)

T.B.1.8.10.3

अप॒श॒व्यो॑ द्वि॒रात्र॑ इ॒त्याहुः॑ । द्वे॒ ह्ये॒ते छ॒न्दसी॑ । गा॒य॒त्रं च॑ त्रै॒ष्टुभं॑ च ।
जग॑तीमन्त॒र्यन्ति॑ । न ते॒न जग॑ती कृ॒तेत्याहुः॑ ।
यदे॒नां तृ॒तीय॑सवने॒ कुर्व॑न्तीति । यदा॒ वा ए॒षाऽही॑नस्याहर् भज॑ते ।
सा॒ह॒स्य॑ वा स॒वनम् । अथै॒व जग॑ती कृ॒ता । अथ॑ प॒श॒व्यः () ।
व्यु॒ष्टि॒र्वा ए॒ष द्वि॒रात्रः॑ । य ए॒वं वि॒द्वान् द्वि॒रात्रे॑ण यज॑ते ।
व्ये॒वास्मा॑ उच्छ॒ति । अथो॒ तम॑ ए॒वप॑हते । अ॒ग्नि॒ष्टोम॑-मन्त॒त आ॑हरति ।
अ॒ग्निः सर्वा॑ दे॒वताः॑ । दे॒वता॑स्वे॒व प्र॑ति तिष्ठति । 37 (17)

(उत्तरं – प्रतिष्ठित्यै – पशव्यः सप्त च) (A10)

Prapaataka Korvai with starting Padams of 1 to 10 Anuvaakams :-

(वरु॑णस्य – जा – मी॒श्वर – आ॒ग्ने॒य – मि॒न्द्र॒स्य – यत् त्रि –
ष्व॒ग्नि॒ष्टोम – मु॒प त्वे – यं वै रज॑ता – ऽप्र॑तिष्ठि॒तो द॑श)

Korvai with starting Padams of 1, 11, 21 Series of Dasanis :-

(वरु॑णस्य – यद॒श्वि॒भ्यां – य॑त् त्रि॒षु – तस्मा॑दु॒द्वतीः॑ स॒प्त॒त्रिं॑शत्)

First and Last Padam of 8th Prapaatakam :-

वरुणस्य – प्रति तिष्ठति ।
–

। हरिः ओं ।

। कृष्ण यजुर्वेदीय तैत्तिरीय ब्राह्मणे प्रथमाष्टके अष्टमः प्रपाठकः समाप्तः ।

। कृष्ण यजुर्वेदीय तैत्तिरीय ब्राह्मणे प्रथमाष्टकं समाप्तम् ।

Details of Dasani & Vaakyams for Ashtakam 1 –

Prapaatakam 8 – TB 1.8

	Dasani	Vaakyams
Anuvakam 1	2	25
Anuvakam 2	5	57
Anuvakam 3	4	42
Anuvakam 4	3	31
Anuvakam 5	6	61
Anuvakam 6	6	64
Anuvakam 7	2	21
Anuvakam 8	5	53
Anuvakam 9	1	18
Anuvakam 10	3	37
Total →	37	409

Details for Full Ashtakam 1

	Anuvaakam	Dasani	Vaakyams
Prapaatakam 1	10	80	831
Prapaatakam 2	6	50	511
Prapaatakam 3	10	65	666
Prapaatakam 4	10	66	690
Prapaatakam 5	12	62	662
Prapaatakam 6	10	76	786
Prapaatakam 7	10	64	677
Prapaatakam 8	10	37	409
Total →	78	500	5232